

**NATIONAL ASSEMBLY OF
SEYCHELLES**

Monday 28th February 2022

The Assembly met at 09.07am

National Anthem

Moment of Reflection

Mr Speaker in the Chair

MR SPEAKER

Mersi. Bonzour tou Manm Onorab e bonzour nou telespektater e oditer. Byenveni pou nou travay Lasanble pou sa Lendi le 28 Mars. Alor lo *Order Paper* nou a komans avek Prezantasyon Dokiman Madanm Clerk.

MADAM CLERK

Mersi Mr Speaker. Bonzour tou bann Manm e tou dimoun ki a lekout. Mr Speaker i annan detrwa bann S.I. ki pe ganny prezante bomaten. So nou demann bann Manm e tou piblik pou annan en pe pasyans.

S.I. 100 of 2021 Land Reclamation Authorisation, 2021. S.I. 101 of 2021 Fisheries (Mahe Plateau Trap and Line Fishery) Regulations, 2021, (Commencement) Notice.

S.I. 102 of 2021 Broadcasting and Telecommunication (Per-second Billing by Operators of Public Land Mobile Network) (Amendment) Regulations, 2021. S.I. 103 of 2021 Road Act (Public Roads) Proclamation, 2021.

S.I. 104 of 2021 Licences Broadcasting and Telecommunication) Regulations, 2021 S.I. 105 of 2021 Minor Offences (Fixed Penalties) (Amendment) Regulations, 2021.

S.I. 106 of 2021 Business Tax (Exemption of Tax to Farming Partnerships and Farming Entities) Order, 2021.

S.I. 107 of 2021 Business Tax (Exemption of Tax to Individual Fisheries and Individual Farmers) Order, 2021.

S.I. 108 of 2021 Business Tax (Amendment of Schedules) Regulations, 2021.

S.I. 109 of 2021 Seychelles Pension Fund (Benefits) (Amendment) (no,2) Regulations, 2021.

S.I.1 of 2022 Court Fees (Supreme Court) and Costs (Amendment of First Schedule) Rules, 2022. S.I.2 of 2022 Masters of the Supreme Court (Amendment of Jurisdiction and Powers) Rules, 2022.

S.I.3 of 2022 Land Reclamation (Retrospective Authority) (No.2) Order, 2021.

S.I.4 of 2022. International Trade Zone (Employment) (Amendment) Regulations, 2022.

S.I.5 of 2022. Income and Non-Monetary Benefits Tax (Amendment of Second Schedule) Regulations, 2022.

S.I.6 of 2022. Anti-Money Laundering and Countering the Financing of Terrorism (Amendment) Regulations, 2022.

S.I.7 of 2022. Anti-Money Laundering and Countering the Financing of Terrorism (National Risk Assessment) Regulations, 2022.

S.I.8 of 2022. Anti-Money Laundering and Countering the Financing of Terrorism (Counter-measures) Regulations, 2022.

S.I.9 of 2022 Development Bank of Seychelles Debt Guarantee Order, 2022.

S.I.10 of 2022 Export of Fishery Products (Designated Landing Sites) Order, 2022.

S.I.11 of 2022 Anti-Money Laundering and Countering the Financing of Terrorism (Cross Border Declaration) Regulations, 2022.

S.I.12 of 2022 Prevention of Terrorism (Implementation of

United Nations Security Council Resolutions on Suppression of Terrorism) (Amendment) Regulations, 2022.

S.I.13 of 2022 Prevention of Proliferation Financing (Amendment) Regulations, 2022.

S.I.14 of 2022 Officials Oaths (Amendment of Schedules) Order, 2022.

S.I.15 of 2022 Cybercrimes and Other Related Crimes Act, 2021 (Commencement) Notice, 2022.

S.I.16 of 2022 Land Reclamation (Retrospective Authority) Order, 2022.

S.I.17 of 2022 Land Reclamation (Retrospective Authority) (No.2) Order, 2022.

S.I.18 of 2022 Notification of Proposal Reclamation of Cascade under section 6(2) and (3) of Cap 106.

S.I.19 of 2022 International Trade Zone (Coronavirus Special Leave) (Temporary Measures) (Expiration of Specified Period) Order, 2022.

S.I.20 of 2022. Road Transport (Closing of Market Street to Vehicular Traffic) Order, 2022.

S.I.21 of 2022 Road Transport (Closing of Rue Felix Paul to Vehicular Traffic) Order, 2022.

S.I.22 of 2022 Customs Management (Passenger Allowance) (Amendment) Regulations, 2021. Mersi Mr Speaker.

MR SPEAKER

Mersi Madanm Clerk. Ou ava rebran lalenn. E nou a pas lo First Reading Public Bills Madanm Clerk.

MADAM CLERK

Mersi Mr Speaker. *This Act may be cited as the Communications Act, 2021 and shall come into operation on such date as the Minister may, by notice in the Gazette, appoint.*

This Act may be cited as the Tertiary Education (Amendment) Act, 2021, and shall be read and construed as one with the Tertiary Education Act, Act 12 of 2011, which is hereinafter referred to as the "principal Act".

This Act may be cited as the Nature Reserves and Conservancy Act, 2021 and shall come into operation on such date as the Minister may, by notice in the Gazette, appoint.

This Act may be cited as the Seychelles Parks and Garden Authority Act, 2021 and shall come into operation on such date as the Minister may,

by notice published in the Gazette, appoint.

This Act may be cited as the Financial Consumer Protection Act, 2022 and shall come into operation on such date as the Minister may by notice in the Gazette, appoint. Mersi Mr Speaker.

MR SPEAKER

Mersi Madanm Clerk. Bon prezan nou'n pare pou rebran Repons lo Leta Lanasyon. E mon apel Onorab Doyace Porice.

HON DOYACE PORICE

Mersi Mr Speaker. Bonzour Mr Speaker. Bonzour tou mon bann koleg MNAs. Bonzour tou bann dimoun ki pe ekoute, espesyalman distrik Baie Sainte Anne.

Mon pou komans mon lentervansyon lo diskour Leta Lanasyon, par remersye Bondye nou papa pou sa kouraz e determinasyon ki mon la ozordi bomaten dan sa Setyenm Lasanble.

Sa sanzman 2020 in anmenn nou dan en vre sanzman, kot nou'n antre dan en storm, kot nou koz en tanpet pou apepre 2an, ki'n kout lavi serten nou Seselwa. E sa se COVID-19.

Mr Speaker i en tes, wi i en tes ki nou'n gannyen. Me nou pa konnen kot i sorti, nou osi antre dan en lekonomi byen fay, ek en kof vid, e osi avek en ta det.

E sa nouvo Gouvernman in bezwen rod sipor pou kapab refer sa pei e fer sir ki tou travayer i kontinyen travay, e ganny en lapey, ki pou soutenir nou fanmir.

Erezman, Mr Speaker, ozordi Sesel in ganny en Prezidan elekte par la mazorite Seselwa, en zonm ki for e determinen, en zonm ki krwar dan nou Bondye papa tou pwisan.

In annan sa bon relasyon avek son met, sa i pa'n per sa tanpet. Li ek son Gouvernman in rod en fason pou anmenn en prevansyon pou son pep. E sa se rod vaksen, pou protez tou Seselwa, i pa'n bezwen aste, in ganny pou nanryen.

Me avek vaksinasyon in ede osi pou ouver nou pei, pou nou lekonomi retourn, e ganny en pe larzan pou met dan sa kof, kot tou Seselwa i benefisyen, menm etranze ki travay Sesel osi i benefisyen.

Wi avek sa relasyon ki nou Prezidan Wavel Ramkalawan i annan avek son Bondye in ede, tir nou en pe dan sa tanpet, e fer nou rev vin vre. Parey

sanson i dir, *"It is no secret what God can do."*

Alor mon enplor avek nou pep pou annan pasyans, ekout nou Prezidan ek son Gouvernman, mon asir zot ki dousman, dousman, nou pou arive defet sa tanpet, annou kontinyen priye.

Diskour Leta Lanasyon, pou mwan mon'n byen apresye avek. Bokou keksoz in ganny fer resorti, e mwan Doyace, Barbara Porice, ne Stravens, mon santi sa transformasyon, ki nou Prezidan Ramkalawan ek son Gouvernman pe anmennen dan nou pti pei Sesel.

Kot bokou keksoz pe bouze, e mon zil Praslin i form par ladan, en distrik parey Baie Sainte Anne, in annan bokou pe ganny fer, e i annan ankore bokou pou fer.

Me mon apresye ki nou Prezidan ek son Gouvernman pe fer zot mye, vi ki nou tou nou konnen ki Praslin ti ganny neglize, par sa Gouvernman lepase.

Laliberte lekspresyon in vin larealite. Sesel konmela nou kapab eksprim nou, mannyer nou anvi, me si nou annan keksoz pou dir.

Ki nou pe war Mr Speaker, parfwa sa pe anmenn bokou lanmertim, anver nou piblik,

akoz i annan pe zis rabase, e zot pa pe koz laverite - plis mansonz, zanmen zot war ki byen anver sa Gouvernman.

Zot toultan annan ban lespri negativ zis zot pe bat latet nou Seselwa. E sa pa ede anver progresyon nou pei. Ozordi bokou nou pe antre dan en lanplwa, apre ki sa tanpet ki ti anmenn bokou ki ti perdi zot travay.

Me pa bokou ki ankor pe espere, i annan serten travay. I annan serten zot ki pe swazir travay, e sa i arive dan mon distrik.

Kot ansanm avek *DA* nou'n deza pas atraver e nou demann avek serten sa bann travayer pou revwar zot desizyon, pou ede ki nou avanse e aret swazir travay.

Minister Lanplwa ek son lekip i la pou zot, atraver zot ban lofis dan tou distrik. E la Mr Speaker, mon pou lans en lapel avek bann ki dan lanplwa, pou silvouple protez zot plas, kontinyen travay dir.

Akoz mon dir sa, nou annan serten travayer ki ankor pe trenn lipye, sirtou bann ki travay dan bann Minister, pa akoz ou pa kontan sa Gouvernman, ki ou bezwen fer tousala.

Bondye i dir kontan ou prosen parey li i kontan nou.

Alor protez u dipen, pou ou anmenn kot u fanmir, e osi ede atraver sa transformasyon ki nou Prezidan in koz lo la.

Mr Speaker, bokou dimoun in sorti lo *welfare*, mon vremen apresye sa fason ki nouvo *CEO* ek son lekip pe travay kot *ASP*.

Bokou pe sey fer zot mye, akoz nou bezwen re aziste nou fason viv, e aret depan lo lasistans sosyal. E mon vremen apresye ki sa bann labi in fini. Annou ede pou prodwi, non pa ede pou detri, akoz sa ki vremen dan bezwen pa pou gannyen.

E ler pa gannyen nou blanm Gouvernman, kan saler nou pa pe pran nou responsabilite. Tou keksoz i annan fason fer, pou anmenn la realite dan nou pep.

Ozordi Mr Speaker, tou pe koz pri lavi, wi pri lavi i ser, lo zil i pli ser ankor. Si nou tou nou realize, ki pri lavi en bann lannen i ser, annou aret blanm Gouvernman *LDS* pou sa.

Si Gouvernman oparavan, pa ti donn bal dan nou larzan lepep Seselwa, koripsyon dan tou keksoz, annan plizyer kont aletranze, nou Seselwa pa konnen, e krwar tou keksoz i an roz.

Me proverb i dir "100an pou le voler en zour pou le met."

Mr Speaker, se sa osi ki'n ede pou fer lavi ser, Lopozisyon pe fer konmsi zot pa konn ditou.

Serten i dir ki dimoun in dir ki zot pa konnen mannyer pou azout en bout ek en lot, ale vwar ki zot menm ki pe dir sa, napa okenn Seselwa ki anvi krwar dan zot.

Sanzman 2020 in montre zot ki Seselwa ti anvi ekoute. Alor oli problem? Dir zot bann lantouraz otour zot, sirtou bann ki zot pos i plen, pou ede zot osi, pa zis Gouvernman, si zot krwar dan linite dan sa pti pei Sesel, pa zis blanmen, tou lazournen zot pe kakay menm keksoz.

Zot leker pe desire, akoz Prezidan Ramkalawan pe *travel* plis ki zot, ozordi nou fer zot konnen ki sa zonm ek son Gouvernman pe travay, pa pe donn sa ki nou pa nonmen.

Mwan koman en Manm proporsyonnel *LDS* mon krwar dan prensip sa Gouvernman, me mon pou sipliye ki Gouvernman i get dan *welfare* nou zabitan nou zil, akoz nou soufer plis ki Mahé.

Mon enplor avek *CEO STC* pou donn nou en laboutik *retail*, parey *hypermarket*, ki nou osi nou a benefisye, akoz nou annan serten laboutik lo Praslin ki pa pe respekte *RRP*.

Mr Speaker i vremen ankouraze pou vwar lakantite touris ki pe antre dan nou pei, kot pe ed lekonomi nou pei, me nou defi i sa bann vagabon ki pe fer touris pa kontan, par fason ki zot fer.

Me avek en travay lekip lo Praslin, ansanm avek lapolis, nou pou kapab ede aranz sa travay, e annan en dyalog avek sa ki pe *disturb* dan lasosyete.

Parey nou konnen ki si napa touris nou lekonomi pa pou marse. Kot i konsern later ek lakaz, nou tou nou konnen ki mannyer ti pase dan lepase, e la avek sa nouvo Minis, nouvo *PS* pou later, pe revwar fason fer, kot pou napa labi.

Ler ou ganny en morso later, oubyen en lakaz, ou pa retourn pou rod en lot, pou anpes ou kanmarad ki dan bezwen gannyen li osi.

Sa osi Mr Speaker in arive lo Praslin, spesyalman Baie Sainte Anne, kot bokou zot in benefisye atraver 2 ou 3 morso later, oubyen annan plizyer batiman pou fer biznes.

Nou zenn pe espere, e fatigue pey lakaz lwe ki in ariv vremen ser. Gouvernman *LDS* i krwar dan lazistis, e nou pa krwar dan fer koripsyon.

Nou pe fer en lapel ek tou nou zabitan pou kontinyen fer zot kontribisyon, pou ede fer sa

transformasyon dan sa Minister, kot nou tou nou a benefisyè avèk en bout sa gato.

Mr Speaker, kot i konsèrn lagrikiltir i annan bokou ki'n fer atraver sa Minister, me i ankòr annan bokou pou fer, sirtou lo mon zil Praslin, kot i annan labi lo sa bann later.

I annan serten ferye ki ankòr pe trenn lipye, zot pran later ek vorasite, e pa pe fer naryen lo la, kot nou annan en lalis dimoun ki pe espere, pe esper en morso later pou prodwi.

Me avèk sa vizit ki Minis ek son lekip ti fer tou resaman nou bann MNAs lo zil, lo sa zil nou'n kapab annan en bon dyalog, lo sa size, e nou pare pou ed sa Minister pou realiz sa devlopman lo sa bann later.

Pa zis dan lagrikiltir, peser osi pou benefisyè byento, avèk bann nouvo lenfrastriktir ki pe konstri, e pou sa nou dir en gro mersi Minis Dezinyen ek son lekip ki'n vreman pouse pou fer rev sa bann peser vin vre lo nou pti zil, e osi zil pros.

Zabitan Praslin i deza konnen ki sa proze en bann lannen ti la, me person pa ti pe get ladan, zis ganny promet demen/tanto. Mr Speaker, menm pou later endistriyel lo Ile Eve ti parey.

Dezord pa ti manke lo sa zil, donn later zot bann dalon, pey bonmarse ek Gouvernman apre vann li de milyon ek bann milyonner.

Ozordi mon vreman apresye travay ki Minis Devika ek son tim pe fer pou lezot pti biznesmenn lo Praslin, e Zil Pros a benefisyè zot osi.

Travay pe kontinyen e nou pe swiv li de pros. Lasante nou pep pe amelyore apre sa gro tanpet ki mon mansyonnen lo komansman. Nou remersye Minis Lasante ek son lekip pou sa travay ekselans ki zot in fer, pou redwir sa tanpet.

Me i reste nou tou Seselwa pou nou pran nou prekosyon ek nou responsabilite, atraver tou maladi, wi sa Minister i annan bokou pou fer ankòr.

Mon vreman apresye ki nou Lopital Baie Sainte Anne in ganny repare e pe kontinyen akòz ti annan bokou pou fer. Apre vizit Minis ek son lekip lo nou zil.

E byento zil pros pou ganny sa ki pou zot, lo La Digue, tousala se Gouvernman LDS ki'n prevwar pou fer, akòz tou sa letan nanryen pa'n ganny fer zot ti ankòr pe espere.

Mon'n apresye lafason piblikasyon ek lenformasyon, lo sa ki ganny fer lo nou zil, sa i

vin par sa zenn lekip *SBC* lo Praslin sa se Wendy, Nicole, Robin, Allison ki pe fer en bon travay, e toultan pare ler nou apel zot.

E pou sa mon felisit zot. Pa zis sa group Mr Speaker, nou'n osi ganny en lot zournalis sorti kot *Today*, Miss Sandra Rose, li i osi apre son larive i pe fer en bon travay pou nou pti zil.

Dan Minister Ledikasyon i pa'n fasil, akoz *COVID*, me Minister in fer zot mye pou nou zanfan kontinyen ganny ledikasyon, menm si in annan tou sa bann defi, zanfan in fer byen.

Mon get kot mwan menm, mon pti zanfan enn in *pass* tou lede son pos-segonder, kot in bezwen swazir enn ladan, e en lot osi in ganny en *pass*, kot mon'n vreman kontan, e pou sa mon swet zot bonn sans.

Me mon enplor avek Minister Ledikasyon pou get en kou dan *welfare* nou etidyan ki sorti lo zil ki'n ganny pos-segonder e osi Zil Pros, akoz i kout bokou pou sa ban paran.

Sa i en size ki nou bann *MNA* lo zil pou bezwen koz pros ek sa Minister. Kot i konsern Land Transport i annan travay ki'n komanse, me i annan bokou pou fer ankor, akoz nou

semen Praslin i annan en ta problemm.

Nou enplor avek Minister pou get nou en pe e vin kontinyen met koltar lo nou semen. Kot i konsern drog ki nou Prezidan in koz lo la, mon kapab dir ki in annan bokou pe ganny fer pou elimin sa pes ki pe vreman gat nou zenn.

E Praslin zil pros pa pe ganny eparnye. Mon salye nou nouvo *Compol* Mr Ted Barbe ek son de nouvo depite pou sanzman ki pe arive avek Lapolis lo Praslin tou resaman.

Me i ankor annan pou fer avek serten nou Lapolis, me nou konnen ki i pa fasil pou fer konpran imen, avek perseverans nou pou arive.

Mr Speaker, nou annan bann fo profet ki pe zis koze, akoz zot pa'n kapab fer naryen, e naryen pou sa pep. Gouvernman pe sey dres sa pye dibwa ki zot in fer li pous tord.

E menm nou bezwen plant en lot lagrenn nef pou kapab ganny enn dwat a lavenir. Mwan koman en Manm proporsyonnel pou *LDS* lo mon zil Praslin, mon anmenn bokou kontribisyon kot Gouvernman dan sa devlopman nou zil.

Mon annan en lofis byen konfortab lo Ile Eve, byento mon pou met mon lansenny direksyon kot mon lofis i ete

pou ed zabitan Praslin konnen kote i sitye sirtou bann ki pa konnen.

Mon annan mon clerk Ina Esparon, ki ed mwan bokou sirtou pandan mon labsans. Mon'n osi lans en group volontarya, ki ozordi nou'n fini vin en pti lazans, nou'n anrezistre, e nou pe travay pou zabitan Baie Sainte Anne.

Osi nou pe ed Gouvernman atraver bann pti proze dan distrik, zis parey sa *family fitness trail* ki nou pe fer. Nou'n ganny retar aköz in an deor nou kontrol, apre osi nou pe prevwar plis devlopman sportif ladan.

E byento nou pou fer son louvertir avek *blessing* nou Bondye papa. Mr Speaker nou pti lazans pe osi get ban pti proze semen, *ramp* pour bann dimoun enkapab, sirtou bann ki dan *wheel chair*.

Netwayaz nou distrik eksetera. Nou pa pe demann Gouvernman en sou, nou plito rod *sponsors*, avek bann biznesmenn. E sa pe al tre byen atraver nou kont labank.

Pandan sa lan edmi mon zwenn avek plizyer Lazans lo Praslin, kot nou'n diskrit lo lavenir nou distrik, parey Lasosyasyon Peser, Komite Kanser, bann *sportsmen*, mon'n osi asiste plizyer *meeting* avek

bann Minister ler zot vin lo Praslin, e osi ladministrasyon distrik.

Mon'n fer plizyer donasyon, par egzanp en pe materyo de baz kot Lopital Baie Sainte Anne, pou ede pandan *COVID*, menm fer en siny lapresyasyon pou tou bann travayer Lopital.

Serten lekipman *sport* pou tim *volleyball*, e *judo*, sipor pou lekol Baie Sainte Anne primer, al vizit bann dimoun mwen fortinen ki reste zis kot lakaz.

E sa i ed mwan vin pli pre ek mon zabitan. Se sa fason ki nou parti *LDS* i travay, e mwan mon toultan en fanm aktiv, e mon kontan partisipe. Mon santi ki mon bezwen fer plis ankor, pou siport mon zabitan dan mon distrik.

Mr Speaker Prezidan in dir nou ki nou bezwen travay ansanm dan linite ek kanmarad, be nou bann *MNA* lo zil ki enkli Onorab Wavel Woolcock, Onorab Churchill Gill, e mwan menm, nou annan sa linite.

E nou korpor byen ansanm kot i konsern nou Zil e pare pou nou fer nou zil bouz pli devan. Pa zis nou 3, nou 2 *DA* ki enkli Denis Anta, e Michael Jean-louis, e la nou annan nou *liaison officer* Vincent Cedras ki nou Prezidan in donn nou.

Sanpyon lo nou zil, napa fason ki keksoz pa pou bouze.

Pou terminen, mon pou dir en gro mersi nou Bondye papa pou gid mwan dan sa travay.

Mon osi pou dir en gro mersi nou Prezidan ek son *Cabinet*, pou sa travay ekselan ki zot pe fer, osi pran desizyon enportan pou nou pti pei Sesel.

Mon pou osi dir en gro mersi mon ban *sponsors*, mon lekip volontarya, bann zabitan Baie Sainte Anne, ki pe donn mwan sipor, atraver mon travay, kot mon touzour kont lo zot sipor, kot mon touzour kont lo zot pou siport mwan.

Pou anmenn plis sanzman dan nou distrik. Mersi i al pou ou osi Mr Speaker, ek ou lekip, *LGB*, *Chief Whip*, e tou mon bann koleg *MNAs LDS*, pou zot sipor ki zot in donn mwan pandan sa lan edmi dan sa setyenm Lasanble, avek zot tou in posib pou mwan.

Mersi tou mon fanmir espesyalman mon msye Harry, mon 3 zanfan Hansel, Keddy e Gretel, pou konpran mon travay, kot par ler mon bezwen kit zot, e al travay lo zil, e mon apresye zot sipor.

Mon dernyen parol Mr Speaker, se demann avek Lopozisyon pou les Prezidan Ramkalawan ek son lekip

travay, pou tir nou pei dan sa bann defi ki zot in met nou pandan 43 an.

Aret koz mansonz, koz sa ki byen. Kantmenm tousala mon pa pou zanmen les tonbe ! Ki Bondye i vers disan son garson lo nou e nou pei Sesel, mersi.

MR SPEAKER

Mersi Onorab. Mon ava aprezan pas laparol Onorab Paul Ernesta.

HON PAUL ERNESTA

Mr Speaker, koleg Onorab, bann ki mon'n zwenn, ki'n travay ansanm dan Sizyenm Lasanble, e bann osi ki nouvo, i annan bokou.

Akoz mon vwar bokou bann nouvo figir. E ni annan menm osi bann ki mon'n ganny sans travay avek pandan parkour mon lavi.

Mr Speaker, osi permet mwan dir en bonzour spesyal tou zabitan Takamaka ki mon'n deservi pandan sa 4an koman zot Manm Elekte.

E osi en lot bonzour spesyal pou zabitan Anse Boileau, distrik kot mon pe reste. Ser, frer pep Seselwa ki a lekout partou kot zot ete Sesel, ou aletranze, bonzour.

Mr Speaker, mon santi mwan privilezye pou ganny en

lot loportinite pou zwenn setyenm Lasanble e osi pou ekout e partisip dan deba lo Leta nou Nasyon ki ti ganny fer Mardi le 22 Fevriye, 2022.

Aprè ki mon'n ekout diferan lopinyon e reaksyon ki'n ganny donnen par nou bann frer ek ser ki pe viv lo sa later Sesel, e osi par mon prop leksperyans lavi vizavi sa ki nou'n ganny dir lo Leta nou Nasyon.

Mon santi ki mazorite nou popilasyon zot tre dezapwente, akoz pa sa ki zot ti pe ekspekte. Zot in antann plis glorifikasyon nou nouvo ladministrasyon e napa nanryen ki'n ganny dir pou zot.

Zot santi ki Prezidan Larepublik ek son bann *MNA* in dekonekte avek realite dan Sesel ozordi, e zot lanmen i nepli lo pou sa pep.

Sa i fer ki, zot in les tonbe sa fanmir ki pe trimouse avek bokou difikilte pou fer de bout zenn, akoz pri lavi ki pe kontinyelman ogmante.

Zot in les tonbe sa group travayer ki pe kontribye dan devlopman son pei. Sa zenn *graduate* e lezot dimoun ki pe rod loportinite travay. Zot in osi les tonbe sa zenn ki pe debourye pou li akonplir son rev e adapte avek bezwen son zenerasyon.

E finalman sa frer ek ser ki pe konstaman ganny diskriminen akoz son swa ek lopinyon i diferan. Koman en Manm konsernen parey tou mon bann koleg lo sa kote latab, i anmenn mwan pou koz lo sa vre realite lavi ki mazorite nou frer ek ser pe viv.

Me ki malerezman in ganny penn dan en zoli portre. Lenpresyon se ki zot in fer bokou pandan sa 15mwan, kan la realite pe dir le kontrè. E *Leader* Gouvernman li menm in admet ki zot pa ankor fer ase, zot letan i tro kourt.

En dimoun i dir mon, *MNA*, "ki mannyer *LGB* in dir ki zot pa ankor fer ase, me selman lemonn pe rekonnèt zot travay?" Me repons i senp, zot pe zis rekolte fri travay zot kanmarad.

Zis parey letan ou'n aste en loto, ou fer serten re modifikasyon, apre ou dir ou i'n fer sa loto. Me annou get en kou nou vre leta anba sa Gouvernman.

Premyerman, pri lavi ki pe kontinyelman ogmante i en gro konsern pou bokou nou bann fanmir.

Ozordi bokou Seselwa in realize ki promes ki ti ganny fer avek zot pour ki pri lavi ti pou vin pli ba kan sa Gouvernman

ozordi i vin o pouvwar, i ti nanryen plis ki en promes.

Ler zot ti dan lopozisyon dimoun dan sa Gouvernman ti lager pou sey fer ki lemonn i mezir e vwar sa ki dapre zot, zot ti apel vre nivo lapovrete dan Sesel.

E Gouvernman sa letan ti fer sir ki zot bann demann ti ganny egzose e travay lo entrodwi departman neseler pou adres sa problem. Apre bann mezir respektif, tel ki *multi poverty index* ti ganny entrodwir.

E sa ti ganny met a laporte piblik pou zot kapab analize lo sit *web* Biro Statistik. Me depi ki zot o pouvwar nou pa war okenn bann *statistic multi poverty index* ni pou la povrete an zeneral ganny resorti.

Sa i aköz zot pe sey kasyet laverite, parey bann *MNA* lo lot kote latab ki'n entervenir in fer, e lezot ki pou swiv apre, mon konnen zot pou fer parey.

Me pou sa malere ki li i pe viv ladan toulezour i enposib pou li pa eksperyans sa sityasyon dir ki nou ladan. Nou koz lo lenflasyon ou lezot faktor *macro* ekonomik ki sa i baze lo zis en pti ponnyen marsandiz, san adres vre problem ki la devan nou.

Nou vwar ki pri komodite dan laboutik i kontinyelman

ogmante. E reste kole anler lo ledo malere parey sise lo sagren.

Me plis ki sa, nou vwar, ki aköz en sistenm kapitalis ki an plas napa okenn mezir pou sofgard nou sitwayen kont sa bann marsan ki pe abiz lo laliberte marse lib pou zot fer mannyer zot anvi ek sa pep.

Espesyalman dan en sityasyon pandemik, e kot lamazorite Seselwa ordiner i vilnerab e finansyerman dan difikilte. Ozordi nou pe vwar bann marsan in adopte en formil mazik pou determin zot bann pri.

Ler pri Dolar i monte pri marsandiz i mont pli o. Me Ler i desann vye *stock* zanmen fini. Mon bann ser e frer vre rezon aköz nou'n ganny dir ki Gouvernman pa kapab fer nanryen letan pri komodite pe tous plafon, set aköz en rezilta direk sa marse lib ki *LDS* ti lager pou met an plas.

Aköz dapre zot marse lib ti pou fer pri lavi desann. E sanmenm sa marse lib ki sa bann marsan pe abiz lo la ozordi. Nou vwar ki sa i zis benefisyè kartel marsan ki asize e koze pou fer sir ki zot pa perdi ditou lo kote profi.

Par egzanp, ozordi dan menm distrik ou pou pas dan detrwa laboutik, ou pou vwar

diferans dan pri pou menm komodite ki ant R5 a 25, i annan menm ki plis de fwa.

E sa i montre nou ki i annan marsan malonnet ki pe fer 100 a 200 pousan profi lo nou pti malere. Ser, frer Seselwa, ou ki'n perdi ou *pouvoir d'achat*, kot yer ek mil rounpi ou ti kapab ganny ou, ou sak konmisyon debaz.

Ozordi ni menm lanmwaye ou sak ou pa kapab ranpli ek menm kantite larzan. Sa Prezidan pa enterese avek ou. Li menm par son prop labous in dir, ki i annan marsan ki malonnet parey mon'n fek montre pli boner.

Me in lav son lanmen avek nou, parey Pilat ti fer ek Zezi. Ozordi nou pe vwar kot bokou desizyon Gouvernman pe benefisye serten biznesmenn, non pa nou Seselwa ordiner.

Malerezman nou pa pe vwar okenn reform ki pe ganny fer pou met plis larzan dan pos Seselwa ordiner. Me bann desizyon ki pe ganny pran, i plito dan lentere bann ki pli ris.

I annan en dikton ki dir" pa tir dile ek park me plito tir dile ek bef!" Led enternasyonal i ganny donnen ek *business*, me sa senp travayer i preski enposib pou li ganny en pti *loan*.

E Gouvernman pa dir nanryen lo la. O kontrer, plis Seselwa i ganny presyon pou mentenir zot bann obligasyon finansyer, akoz bann Polisi e direktiv Gouvernman in vin pli agresiv pou fer sir tou sa pti larzan ki sa pov travayer i gannyen, i pa zanmen mank antre dan pos sa Gouvernman.

E san en lespwar ki sa larises i reganny partaze ek li menm en zour. Annefe nou pe vwar plis depans i ganny fer lo transportasyon delegasyon pou vizit o nivo lokal e enternasyonal ki lo ed zanfan lekol par egzanp.

Kot la nou pe zis donn semen pou bann *businessmen* fer donasyon pou zot ganny serten benefis an retour. Depi ler lannen in konmanse tanzantan nou pe antann diferan departman governmantal e parastatal pe anons logmantasyon pri dan zot bann servis.

Par egzanp *PUC*, ki reprezant en parti sibstansyel bidze Seselwa ordiner, in la an Zanvye fer monte son pri. Sa i swiv pri transportasyon piblik *SPTC* ki in monte resaman.

STC li ozordi i vir ledlo lo sa malere par negliz rezondet son legzistans. Mr Speaker, i pa premye fwa ki komodite i manke dan pei, e pa premye fwa

ki *STC* i fer vin komodite par avyon.

Me diferans ant ozordi ek yer, se *STC* ki ti abzorv bann kou an plis kan ti nesese pou asire ki pri i reste abordab. Me ozordi *STC* pe pas tou sa bann kou direk lo nou malere.

Sa sityasyon 40 ekek Roupri en kilo ponmdeter ki nou'n eksperyanse tou resaman i en legzanp tipik.

Nou osi pe vwar kot nou bann Seselwa ordiner ki travay dan servis piblik zot bann benefis parey logmantasyon saler, *long service allowances* e lezot ankor in *freeze* pou 2 lannen konsekitiv.

Selman de lot kote zot, zot pe pran tou sa ki pou zot, par donn zot lekor gro, gro saler ek *allowances* apenn enn an dan lofis.

Me dan bokou ka sa bann pozisyon an plis ki zot in kree oubyen pe kontinyen kree pa nesese man priyorite pou pei dan sa moman kritik. Anfen nou vwar ki lavi i meyer sirtou pou sa ki deza annan.

Kot zot, zot pa ganny nesese man afekte par sityasyon aktyel pei. De lot kot i annan sa group, ki li menm i pli vilnerab, li i ganny dir i bezwen fer plis sakrifis. Li i a kontinyen vey anba pye, letan

sa pti group, zot, zot oule manz tou fri anler lo pye.

Letan nou pou fer levanter, kabri pou'n fini manz salad. Mr Prezidan ou pep pe demann ou pou get zot osi silvouple. Donn zot en pti poursantaz dan \$700 milyon ki ou'n dir i annan dan rezerv ki zot osi ava kapab respire.

Mr Speaker, sa i anmenn mwan lo size lanplwa ki osi en lot konsern pou nou pep la deor. Bokou konparezon in ganny fer ek Seselwa ki pe travay Sesel ek sa Seselwa ki pe reste e travay aletranze.

Koman en Dirizan mon fyer pou mon nasyon nenport ki landrwa kot zot ete. Mon pa pou zanmen annan preferans ni pou enn, ni pou lot akoz nou tou nou en Seselwa. Me, an menm tan mon rekonnèt ki nou tou nou pe viv dan diferan sirkonstans.

Parey aletranze, nou travayer Seselwa ki pe reste e travay Sesel zot osi zot travay dir. Annou get sa ansenyan ki donn tou pou edik nou zanfàn, zot letan i fini dan preparasyon *lesson plan* ouswa koriz bann lesen.

Sa travayer lasante, sa mason ek tou lezot travayer ki serten napa ni *weekend*, ni lizour, ni aswar, ni konze piblik, ni menm botan ek movetan, zot

pe debourye menm pou kontribye dan sa pei.

I malere ki rekonpans tou zot sakrifis ozordi, olye ganny sa lankourazman nesese pour ki zot anmenn plis prodiktivite, zot ganny trete koman parese e ganny dir zot pe trenn lipye.

Zot ganny menase zot bouse manze e zot vin viktim transformasyon. Annefe, nou ki konnen ki tousala pe ganny fer pou viktimiz serten travayer, e osi pou tir latansyon lo lenkonpetans sa nouvo ladministrasyon.

Aktyelman i annan en bann malis malisye ki pe byen arive dan landrwa travay. Serten travayer pe ganny targete anba preteks performans e *professionalism*.

Si ou lopinyon i diferan ek sa ki pou sa Gouvernman, ouswa ou kestyonn serten move desizyon, gara ou !

I annan lenstans kot nou'n vwar en travayer konpetan ek bokou leksperyans, in ganny tire e ranplase par enn ki mank konpetans, oubyen napa leksperyans zis parey sa ki'n arive Oktob lannen pase.

Natirelman sa i met retar dan landrwa travay. Apre sa senp travayer, li ki ganny blanmen letan keksoz pa marse.

An plis ki sa, sa bann dimoun ki'n ganny tire ler pou zot al rod en travay, zot ganny dir ki zot *over qualified*. Tousala i bann *pretext* ki pe ganny servi pou pa donn dimoun travay akoz zot pa siport sa Gouvernman.

Mr Speaker, eski nou kapab dir, ki Sesel i vreman pour tou son zanfan, ouswa i nepli annan ek nou, pa ek nou?

Mankman lanplwa i vreman en konsern pou nou pep. E sa Gouvernman pa pe montre gran lentere dan sa problem. O kontrer zot donn lanmen pou pini Seselwa.

Ant Zanbye e Desanm lannen pase, sa Gouvernman in donn laprouvasyon pou anploy plis ki 14mil travayer etranze. Pre 7mil ladan i bann nouvo laplikasyon.

Sa in fer ki dan peryod Zanbye a Novanm 2021 in annan en pti pe plis ki 24,000 mil travayer etranze ki annan *GOP* dan pei. Nou osi, me i pa fini la.

Nou pe vwar lenzistis e faver ki pe ganny arive kot i konsern bann dimoun ki pe rod en lanplwa. Sa zenn profesyonnel e lezot travayer ki pe esper repons zot laplikasyon pou en louvraz, zot, zot kontinyen vey petet pouvwar napa.

Tandis ki serten manm fanmir, zanmi e aktivis serten parti politik, pe ganny apwente dan diferan pozisyon.

Donk Kestyon, se ki mannyer sa zenn *graduate*, sa manman, sa papa ou lezot manm fanmir pour kapab ganny en lanplwa, letan ki son sans in fini ganny bloke akoz bann faver ki pe ganny donnen ek bann desizyon ki baze lo en Polisi kapitalis ki pe ganny aplike?

Nou bezwen fer byen atansyon akoz sa fason fer pe re anmenn sa sistenm klas kot sa ki annan pou pli annan e sa ki napa pou pli napa. Nou aksyon ozordi, pou annan son konsekans demen.

Letan nou pe koz demen, permet mwan Mr Speaker, tous en pe lo lazenes ki nou fitir. I malere pou vwar ki Lazenés i Malere pou vwar ki sa ladres pa'n koz lo fason pou ed sa zenn pou li kapab realiz son rev e an menm tan adapte avek sirkonstans e bezwen son zenerasyon.

Lazenés i santi ki sa Gouvernman in oubliy zot. Nou pei i annan en potansyel enorm letan nou get bann kalite ki nou lazenés i posede. Zot byen edike, ranpli ek lenerzi e kreativite, zot osi annan bann bon nide tre revolisyoner.

Atraver loportinite ki zot in gannyen o kour letan in permet zot vin sa ki zot oule vini. Legzanp i devan nou, nou pe vwar nou lazenés pe *champion* bokou bann linisyativ dan pei.

E bokou zot in adopte en lespri travay dir ki olye les zot ganny trennen dan kouran negativite. E sa i donn nou lespwar.

Nou kote latab nou rekonnèt e lev sapo ek tou sa bann zenn ki pe fer byen e nou ankouraz zot pou zot kontinyen e menm fer pli byen ankor.

Mr Speaker, letan ki mon lo sa pwen, mon oule fer en *shout out*, pou Clementina Agricole Mr Speaker. En zenn ki an se moman Maurice dan kalifikasyon zwe *Commonwealth* e in ganny en Meday Lor.

Mon kontan letan mon pe dir sa Mr Speaker, mon vwar *MNA Bel Air* ki zis a kote mwan, li osi i dir sa en zenn Bel Air.

Avek sa Mr Speaker, mon pou demann tou nou bann koleg Onorab pou nou donn en lanmen Clementina ek tou lezot zenn ki pe fer byen dan zot domenn, pou nou sipot zot, en sipor pou zot. Mersi Mr Speaker.

(APPLAUSE)

HON PAUL ERNESTA

E mon demann Lasanble, pou donn li e tou lezot zenn pou kontinyen sa sipor. E nou lans en lapel ek Gouvernman, pou li fer plis pou protez e valoriz sa potansyel ek talan ki zot in erite.

Lazenes i merit pli ganny gete, sirtou sa group ki pli vilnerab. Akoz letan zot ganny met a lekar, bann fleo sosyal parey vyolans, labi drog, kriminalite e lezot ankor i vin zot dalon.

Ozordi logmantasyon dan bann ka vyolans ek krim dan pei sirtou parmi nou lazenes in vin alarman e trakasan. Sa i en menas pou sekirite nou nasyon ek nou lekonomi.

Yer zot ti kritik Gouvernman, akoz dapre zot, Gouvernman pa ti pe met ase divan anba lezel sa zenn pou li anvole.

Ozordi anba direksyon sa menm group dimoun nou pe vwar par zot desizyon e aksyon ki lazenes i pa zot priyorite. Zot pe met bann gro, gro det lo sa prop zenn ki ankor lo bann lekol ouswa menm pa ankor ne pou satisfere vorasite ozordi.

Resours ki sipoze al ver devlopman lazenes, pe ganny resikle pou satisfere lezot dezir. Sa in fer ki ozordi dan distrik

napa gran, gran program lazenes ki pe ganny enplimante.

Zot osi bezwen trouv pli bon mwayen pou servi potansyel e lenerzi nou lazenes dan transformasyon nou pei, parey zot in dir. Ki olye komersyaliz *sex toys*, sonny kabri, e bat kannel.

Mr Speaker, sa Gouvernman pe donn fo lespwar nou bann zenn sportif, letan zot pe dir ki zot pe target Meday Olenpik pou sa prosen 6an. Bann ki fer sport zot konn tre byen, ki sa i enposib arive.

Akoz pandan sa 2an, bann aktivite sportif pa ti pe ganny pratike dan Sesel akoz *COVID*. E i annan bokou travay ki bezwen ganny fer, annou komans marse avan taye.

Mr Speaker, i annan osi sa group ansyen etidyan lekol *STA*, zot dir mon, demann ek Gouvernman, kan ki zot pou ganny zot lot bout larzan konpansasyon delo popilasyon *La Misère*.

Sa zenerasyon i bokou diferan avek nou zenerasyon yer, e zot pe swiv nou de pre. Mon anvi vwar nou fason viv yer i pas ek sa nouvo zenerasyon. Mon ankor rapel mon zenes, ki mannyer nou ti viv dan nou kominote.

Sa menm kominote ti zwenn ek mon paran pou fer

mon grandi. Mon ti ganny enstri bann bon valer, tel parey lanmour, tolerans ek disiplin. Mr Speaker mon dernyen pwen i ganny dedye lo nou bann bon valer ki pe komans kit nou.

Koman en kretyen, mon apresye ki ozordi nou pe ganny demande pou sant dan menm liv kantik. E lafason ki nou gran met i demann nou pou viv. Sa lapel lontan ti pe ganny fer.

Sa ti depi letan Prezidan Faure, ki malerezman serten ti sourd lo li. Letan i ti pe dir annou koste pou Sesel, lot kote ti pe pile. Me ozordi nou pe fer meakoulpa. Akoz nou pe rekolte sa fri ki nou ti senmen yer pou nou ganny semen pase. I malere malgre tou sa zoli parol - aktyelman koman mon pe koze, i annan mon frer ek ser, ou mwan menm ki kapab pe ganny targete. E nou osi pe vwar lot kote latab, ki pe sourd lo demann zot prop dirizan.

Zot ancor pe dir annou pile. Koman Dirizan tou i konmans ek nou, nou bezwen pare pour pardonnen e nou bezwen senser dan nou parol.

Annou pratik sa ki nou prese, annou komans fer sa premye pa. Aret, mon repete ancor, arete, aret viktimiz Seselwa. Malgre zot pe fer krwar ki nou tou nou egal, e i nepli annan ek nou pa ek nou.

Me larealite pe montre lekotrer, nou pti Sesel in vin en *animal farm*. Nou'n pri dan en krwaze semen kot en kiltir laenn pe ranplas lanmour, bann move desizyon pe ganny glorifye, e vanzans pe ranplas rekonsilyasyon.

Sa Nasyon i tro pti e frazil pou ankouraz sa bann pratik. Koman en Nasyon nou tou nou bezwen ini e annan tolerans ek konpasyon anver kanmarad.

Nou bezwen konmans apresye nou frer ek ser pour sa ki i ete. I responsabilite, Gouvernman pou asire ki tou Seselwa i ganny menm loportinite pou devlop son potansyel san okenn entimidasyon ou viktimizasyon, e kot son drwa i ganny respekte o maksimonm.

Kot bann lespri vanzans ek lanmertim pa ganny pratike dan landrwa travay, dan lakour e menm antre zanmi, akoz diferans dan lopinyon. Nou bezwen arete sa nivo divizyon ki pe gradyelman anvair nou pei.

Nou pep i bezwen en lanvironnman kot i ganny ankouraze pou viv en lavi ini dan son diversite. Nou merit vitman re entrodwir sa kiltir ki ladministrasyon avan ti pe enkilke.

Kot nou annan plis tolerans e lakseptans ver nou

ideoloji, nou lavi sosyal, nou preferans seksyèl e menm pwennvi politik ou relizyon. Sa zafer si yer ti fer, menm si i ti mal, nou osi ou bezwen fer parey, i bezwen arete.

O kontrè, zot bezwen fer pli byen parey zot ti dir zot pou fer. Mon zanfan, ou zanfan, sa zenerasyon ozordi pa kapab vin viktim lèpase person. Zot merit en lavi pli meyer parey zot ti ganny promet.

Annou donn zot bann bon legzanp atraver respe e tolerans ki ti nou bann bon valer yer. Pour sa arive fodre ki imedyatman nou aret ador Bondye lipokrizi.

Letan mon get dan sa Lasanble mon vwar en labondans loportinite ki kapab sov nou pep dan sa sityasyon. Me pou le moman tousala pe ganny gaspiye.

Annou pa zis get nou lekor, e bliy sa ki ti met nou la. Annou get nou pep e fer sa ki byen pou zot. Pa les zot ganny etoufe par bann fo lenformasyon, par bann desizyon ki pe anmenn plis fristrasyon, konfizyon e plis lenzistis sosyal.

Kot bann zoli promes eleksyon, parey "pou nepli annan ek nou pa ek nou", mon pou mont lo pye mon pou sekwe brans pou ou rekolte fri anba

pye, pa ganny kanmoufle, e vin zis en metafor pou ganny ou vot.

Nelson Mandela in deza dir.

MR SPEAKER

Ou'n ganny 30 minit Onorab. Ou a konklir.

HON PAUL ERNESTA

Mersi Mr Speaker, mon pe al konklir, "*There is no passion to be found playing small and settling for a life that is less than the one you are capable of living.*" Wi ser, frer pep Seselwa.

Ou *deserve* en lavi pli meyer ki sa enn ki sa Gouvernman pe fors ou aksepte. E ou osi pa bezwen ki ou per pou debout pou ou rezon.

Aprè tou, nou dan en pei lib. Donk mon swete ki ozordi zot pran kont tou sa ki mon'n dir, pou fer sir ki dan lavenir zot zentere i pe ganny pran a ker par en Gouvernman ki pa zis koze parey sa enn ki la me ki vremen fer Sesel vin pou tou son zanfan.

Mersi Mr Speaker e mersi tou dimoun a lekout.

MR SPEAKER

Mersi Onorab. Mon a pas laparol Onorab Sathya Naidu.

HON SATHYA NAIDU

Bonzour Mr Speaker, bonzour tou koleg isi dan Lasanble Nasyonal. En bonzour spesyal pou zabitan Saint Louis.

En group zabitan ki'n toultan rezilyan, malgre serten defi ki lavi par ler i kapab anmennen. Mr Speaker louvertir nou Lasanble i en levennman ki enportan. I mark komansman nou lannen travay, i kwensid avek diskour lo Leta nou Nasyon par Prezidan Larepiblik. I osi en levennman ki anmenn ansanm *leadership* nou pei dan en sel landrwa.

Alors mon war li koman en mank respe total lo lapar bann Manm dan Lopozisyon, baze lo lafason ki zot ti'n abiye. Sa mantalite 43an i ankor avek zot i aparet !

Mr Speaker fodre ki nou etabli bann pli bon standar, se ler nou pe fer sa, ki nou a pe deservi en demokrasi modern.

Alors mon pe propoze ki nou revwar *Standing Orders* pou rektifye sa tandans, pou fer sir ki zot viv dan sa letan ki nou ladan. Mr Speaker Lopozisyon i annan en rol krisyal pou zwe.

Napa nanryen mal ler ou a pe fer kritik, o tan sa ki ou pe dir i vre, fodre ki dan laverite, dan bann kritik ki zot a pe fer i

annan osi bann solisyon. Mon'n ekout mon bann koleg atantivman.

Menm si par ler i pa fasil pou dizer tou sa ki zot annan pou dir. Malerezman apard Onorab Churchill Gill ki'n fer bann kontribisyon valab dan son diskour, mon pa pou kapab dir parey pou larestan Onorab.

Pou larestan Onorab ki'n koz apre li, e menm avan li, ziska prezan. Mr Speaker mon krwar in plis ki ler pou Lopozisyon evalye zot rol. Mon konnen i difisil pou zot fer sa tranzisyon.

Ler ou, ouswa ou parti in o pouwar pou 43an. Laplipar bann problem bann problem ki nou pei pe fer fas avek ozordi, se gra sa zot e zot parti. Alors byensir i pou difisil pou zot fer sa tranzisyon.

Ozordi nou pe sey rezourd sa bann menm problem. E nou pe fer progre Mr Speaker. Ozordi i nepli annan viktimizasyon. Detrwa de ekspresyon pe renye e nou a pe viv dan en demokrasi ki vibran kot drwa tou dimoun pe ganny respekte.

E annou pa bliye koripsyon i nepli en persepsyon, i reel. E nou annan en Gouvernman ki annan sa lavolonte politik pou adres li.

E i mon lobligasyon pou fer pase santiman zabitan saint Louis, pou dir kwa ki zot panse lo Lopozisyon. Zot santi ki zot a pe gaspiy letan e zot devret vin bokou pli prodiktiv ler zot a pe desarz zot fonksyon.

Mr Speaker diskour par Prezidan, ti enn ki ti fran e onnet. In fer nou reflexir en pe lo bann lakonplisman son ladministrasyon pandan en dirasyon ki pa'n fasil ditou.

In osi fer sir ki nou reflexir en pe lo bann defi ki li ansanm avek son ladministrasyon pe fer fas avek. In pran bann mezir pou adres serten sa bann problem. Pou fer sir ki i anliny avek lekspektasyon pep Seselwa, ki baze lo Manifesto ki zot, zot ti vote pour.

E manifesto i adres plan travay nou Gouvernman pandan en dirasyon 5an. Se sa ki pep Seselwa ti vote pour. Travay dir Mr Speaker, ozordi dan sosyete tou dimoun i bezwen fer zot bout.

Si an ka zot oule akonplir okenn keksoz dan lavi, malgre okenn difikilte ki zot kapab rankontre. Nou pa bezwen regard tro lwen pou ganny en legzanp briyan. sa se nou Prezidan.

Le 22 Fevriye i ti'n delivre Leta Lanasyon. Zis avan sa i ti'n vizit plizyer pei, zwenn bann

dirizan o monn, reprezant nou pei dan diferan *forum*. E in met en zefor adisyonnal pou konekte avek nou *diaspora*.

Kot i a pe valoriz zot pou sa ki zot ete, en Seselwa. I a pe met Sesel lo map lemonn Mer Speaker, e mwan mon fyer a li.

Sak fwa nou Prezidan i vwayaze, i fer son mye pou fer sir ki i retourn en keksoz ki pou ede dan lavansman nou pei Mr Speaker. Ler i ti'n al *Abu Dhabi*, i ti'n retourn avek sa vaksen.

Avek vaksen mwan mon'n kapab pran mon vaksen, en bon pe nou nou'n kapab pran nou vaksen e nou'n kapab reouver nou frontyer. E ler nou frontyer in reouver, touris in antre, travay osi in annan, lekonomi pe rebran.

Se zis en Gouvernman *LDS* ki kapab anmenn en tel transformasyon, atraver bann bon desizyon ki byen kalkile Mr Speaker. Ler i ti'n al *Qatar*, i ti'n retournen, nou ti'n ganny en *field hospital*, 60 lili, 30 vantilater.

Ler mon pe koz lo vantilater, mon mazin en letan kot dan marse lemonn, ti annan mankman vantilater. Alors, annou valoriz sa ki ou nou gannyen.

La in koz lo *oxygen plant*, ti annan en lepok dan Sri Lanka, ler ka *COVID* ti pe tous

plafon, zot ti napa en *supply of oxygen* Mr Speaker. Ozordi nou annan en *leadership* ki pe regard lwen.

E sak fwa en desizyon pe ganny pran, i dan lentere pep Seselwa Mr Speaker. Sa se planifikasyon. Mon bezwen rekonnet osi zefor son koleg Minis Radegonde ki'n akonpanyi li dan tou son bann *overseas mission*.

E mon bezwen osi felisit li pou sa transformasyon imedyat ki li in fer dan son Departman ler in pran labar. E mon osi bezwen rekonnet tou bann travay dan Lasante ki'n permet ozordi ki ka *COVID* pe diminyen.

Zot zefor pa'n al anven. Mon rekonnet zot zefor. Me i annan en gran apresyasyon pou tou keksoz ki zot a pe fer pou Sesel.

Mr Speaker, sa lespri travay dir ki nou Prezidan i annan, *it has to spill over to all the Members of this Cabinet*. Laplipar zot, zot a pe perform byen.

Me i annan serten zot ki bezwen en zefor ekstra; zot zefor i bezwen paralel avek nou Prezidan. E ler mon tann bann bon keksoz lo zot, menm si mon pa'n travay avek zot tou lo en baz personnel, i fer mon fyer.

Akoz se sa lekip ki pe bouz Sesel de lavan, malgre tou defi. E dan sa lekip par anba bann Minis, nou annan bann *civil servants*.

E ler mon pe regard nou *civil service*, mwan personnelman ki ti oule vwar sa sanzman, mon ti oule vwar ki i annan en *wholesale changes* dan diferan Departman, imedyatman ou *tir* zot. Konmsi ki mon ti santi.

Me selman mon ti'n bezwen rekonnet, vre definisyon Sesel pou tou son zanfan. Sesel pou tou son zanfan, sa platform ki nou pe debout lo la, i pou promouvwar linite. E i donn tou dimoun en dezyenm sans.

En dezyenm sans pou ou osi sa *civil servant* pou transform ou lekor pou sa Departman ki i pe travay. Mr Speaker mon'n remarke ki serten zot, zot in fin i fer sa transformasyon, e mon santi ki zot in fer li akoz zot realize ki nou Gouvernman dizour i annan lentere pep Seselwa aker.

E i annan en bann ki vre zot trenn lipye e zot vreman parese. Mon pa pou kapab atann pou ganny en repons, 3 mwan ler mon'n fini anvoy pou en *email*, ouswa ler ou donn mwan en *phone call*, ou pou

donn mon en *update* ki pou sanz tou dimansyon en proze. I pa akseptab Mr Speaker! Politik dan landrwa travay, menm si zot ti'n dir tou sort kalite mansonz dan zot kongre, i devret en keksoz dan lepase.

E pou ou sa ki pe ekout mwan, e si ou pe angaz dan en tel pratik, i enportan ki ou sanz ou fason fer e ou form parti sa transformasyon.

Ler nou pe etabli en *result based framework* e kreasyon en *public service college*, i pou asire ki tou dimoun i performen e zot tou zot lo menm paz.

Mon akeyir sa lide avek lebra ouver. E sa i en keksoz ki bezwen arive deswit, parey mon koleg Onorab William in site. E mon totalman konpran tou bann rezon ki in met devan.

Ozordi nou annan en Gouvernman ki pe kontinyelman evalye son lekor. Alors i toutafe normal pou demann nou sitwayen pou regard anndan lo zot kwa ki ou a pe fer pou ou, ou fanmir, ou kominote, ou pei?

Mr Speaker, nou pei nepli kapab *afford* pou reste en *welfare state*, akoz kou sosyoekonomik i tro o. Nou bezwen en pep ki annan sa krwayans dan zot, pou kapab krwar dan sa abilite ki zot annan.

I pa fasil pou tir serten dimoun lo *welfare*, ler zot lavi antye zot in lo *welfare*. Nou bezwen tir zot selman, akoz i annan travay e fodre ki zot valoriz sa loportinite ki zot annan ozordi, vi ki nou lekonomi in rebran.

Mon vremen apresye e ankouraze pou vwar plizyer dimoun pe antre dan lanplwa, depi ler nou lekonomi in rebran. Serten pe menm fer 2 *job*, pou sa mon salye zot zefor eksepsyonnel.

An menm tan mon dezapwente, ler i annan en dimoun ki ganny en sans pou pran travay, zot pa pe pran, zot pe mazin 3 fwa. Mon bann zanmi, nou pe pas dan en peryod ki en pe difisil.

La i pa le moman pou ou swazir ki *job* ou pou fer ouswa konbyen *interview* ou pou manke. Lot kote i annan en group dimoun ki a pe rod travay.

Zot annan kalifikasyon, me pou en rezon ou lot zot pa pe ganny louvraz. Me lakantite ka ki mwan mon'n rankontre, i minim.

Me selman pou zot benefis, mon a pe propoze ki ler en *vacancy* i ganny pibliye, i enportan pou Departman Lanplwa konn stati sa pos, lakantite fwa bann aplikan in

anrezistre zot lentere ver sa pos, lakantite fwa in ganny rezete.

E lo ki baz *employers have to be taken to task to curtail abuse if any*. E an menm tan fodre ki nou rekonnèt ki i annan mankman mendev dan pei, dan plizyer sekter e pou ou toultan vwar etranze pe travay dan pei.

Pou ilistre mon pwen, bann fermye, apepre 4 mwan pase, ti'n eksprim zot dezapwentman, poudir ki zot pa pe kapab ogmant prodiksyon baze lo mankman travayer, e zot bezwen anploy bann *Bangladeshi*.

Akoz nou dan en sityasyon parey sa enn ki nou ladan. Sa i mon kestasyon, mon demande. Ki'n ariv avek nou lafors travayer. Mr Speaker sa pwazon drog e menm lalkol in annan en lenpak negativ lo nou lafors travayer.

Ler ou melanz sa 2, nou annan problem sosyal. Adiksyon, labi seksyel, vyolans domestik, fanmir ki'n kase, en nivo krim ki o e menm lapovrete.

Mon vreman kontan pou note ki nou a pe anmenn en lalit asarnen, san pitye ler, kont bann endividi ki pe dil dan drog, *and record numbers in terms of seizures* Mr Speaker. Bann

drug hot spot konmela pe ganny netwaye.

E menm si mon koleg pa la, mon ti a kontan demontre ouswa eksprim mon apresyasyon avek Onorab Labonte pou sa linisyativ ki li in pran.

Aprè mon'n vwar Baie Lazare in fer parey e menm Au Cap. Mon felisit mon bann koleg pou san zefor eksepsyonnel ki zot a pe mete pou netway sa bann *drug hotspot*.

Ki sa, k zot dan lepase ler zot ti dan Gouvernman, zot ti napa sa kouraz pou fer. Mr Speaker ledikasyon i en keksoz ki vreman enportan. Mon pa oule vwar en lot zenerasyon ki perdi zot direksyon.

Ler en zanfan pe koup en semen, nou dir li regard tou lede kote, pran bann prekosyon nesaser. Akoz nou pa pe fer parey pou edik zot lo danze drog, lalkol e ki sa vedir labi. Labi i pa en keksoz ki fasil pou konpran.

I kapab antre dan lavi en endividi dan diferan form. Ozordi en zenn i bezwen konnen ki savedir drog. Ki mannyer eski drog i kapab ganny ofer avek zot e ki leta lespri ki zot devret annan pou dir non.

Pou zot rekonnèt konsekans ki atase avek. *They have to know the harshest side to life* Mr Speaker. An plis ki sa ozordi, en bon pe zenn anba laz 18an, pe angaz dan relasyon seksyel.

Eski zot pe vreman ganny edike lo *safe sex*, konsantman bann lofans seksyel? Ki manner eski maladi i kapab ganny transmet seksyelman.

Ler ou dan en sityasyon kot ou a pe ganny forse, kwa ki ou pou vreman fer? Tousala se bann keksoz ki nou bezwen konsider seryezman Mr Speaker.

Fodre ki nou empower nou bann zenn pou pran bann desizyon ki korek. Senpleman dir non, drog i pa bon, pa pe al rezourd nanryen. Nou bezwen edik zot lo aköz, pou zot kapab deside lo tranzitwar ki zot lavi pou pran.

Ler mon pe fer referans avek desizyon byen enformen, fodre ki nou plas lanfaz lo *career guidance* ek *counselling*. Mon konn en pe zenn ki pa konnen ki i pou fer demen.

Zot pa konnen ki manner zot fitir i pou ete. I enportan depi a tre zenn-az nou a pe kiltiv en kiltir dan nou bann zanfan, pou dir demen ou, ou pe al vin en Dokter, en ners, en Avoka, en sarpantye, en fermye,

en mekanisyon, nenport Mr Speaker.

Me selman depi a tre zenn az, zot bezwen konnen ki bor zot pou ale. Nou bezwen en nouvo zenerasyon pou pran larelev Mr Speaker. I mon swe ki Minis respektif pe ekout mwan.

Serten pou dir, nou pe deza fer sa. Me dan mon lopinyon, i pa ase. Bokou plis i bezwen ganny fer, bokou plis i bezwen ganny fer pou edik nou bann zenn lo *financial management*.

Ki manner eski ou planifye ou fitir, ki manner ou pou fer en *saving*. E an menm tan akonplir en serten nivo stabilite finansyel, menm si pri lavi i en konsern pou nou tou e nou a pe rod solisyon pou adres li.

Nou zanfan, nou trezor, nou lavenir. Nou lavenir, swa i pou enn ki pou briyan, ouswa enn ki pou sonm baze lo desizyon ki nou pou pran ozordi.

Ozordi nou annan en Gouvernman ki pe fer son mye pou batir e konstri en pli meyer sosyete. Nou pe al revwar bann Lalwa ki konsern santans lo bann ka labi seksyel, *sexual harassment*, *hate speech* and *hate crime*.

Sa i bann mezir ki pe ganny pran ver en bon direksyon. Pou asire ki nou viv dan en sosyete, kot nou tou nou respekte kanmarad e annan latolerans pou asire ki dignite tou dimoun i ganny sofgarde Mr Speaker.

Mr Speaker, Lasanble Nasyonal in aprouv 65 lezislasyon. Serten ti pe adres defayans dan nou bann Lalwa.

Serten ti pe fer sir ki nou Lalwa i ganny modernize, kot nou pe enplimant bann *forums*, ouswa bann kriter pou fer sir ki nou kapab fer sa transformasyon *digital*. E in osi annan restriktirasyon bann departman gouvènmantal pou re anforse zot.

Kreasyon bann antite, tel ki *Infrastructure Agency, Cultural Heritage and Arts Institute*. Nou'n konbat kont terorizm, in annan plizyer Lalwa Finansyel ki nou'n fer pase pou fer sir ki nou zwenn bann norm enternasyonal.

E vi ki mon lo topik Lasanble Nasyonal, mon ti a voudre dir ki savedir *serving a modern democracy*. *Serving a modern democracy* se ler ou a pe reprezant aspirasyon ou pep e ou pa pe regarde si en size i favorab politikman, wi ou non.

Mr Speaker pep Seselwa, mon bann zabitan spesifikman

zot oule vwar en Lasanble ki pare pou diskite bann size ki sansib. Pa sa vedir sa ki nou pe al dir i final.

Annou diskite en size tel ki *same sex marriage* par enstan, wi ou non? Diskriminasyon kanabis, legalizasyon. Ouswa pou regarde lo laspe medisinal, annou diskite, wi ou non?

Abortion, eski nou fer li legal, wi ou non? Annou diskite, fodre ki nou fer li. se la kot nou a pe reprezant aspirasyon pou bann zabitan.

Mr Speaker ler nou pe al lo *serving a modern democracy*, mon pou bezwen koz lo lipokrizi ki mon war dan politik. Avan ki nou komans travay, plizyer Onorab i angaz zot dan bann diferan konversasyon pou demande mannyer ou ete mon frer ? Mon korek.

Be si ou kapab koz koumsa, akoz eski nou pa koz koumsa tou dilon ler nou pe travay dan sa *Chamber* Mr Speaker !

Nou pep i oule linite. Nou pep i oule linite Mr Speaker. E mon pe lans en lapel avek mon kanmarad lo lot kote latab pou sanz zot fason fer. Akoz lipokrizi napa isi lo sa kote. Mersi Mr Speaker.

Mon ava al lo mon distrik Mr Speaker. (Onorab Pillay ou

ti'n koze, les mwan koze. Ou ti premye pou koze, silvouple.)

MR SPEAKER

Onorab Naidu *carry-on, carry on.*

HON SATHYA NAIDU

Mr Speaker i en plezir e en loner pou deservi mon distrik. Tanzantan zot ti'n mansyonn sanzman radikal. Be mon pou zis dir en mo, mon pa pou al tro lwen ladan.

Akoz bann eksper pou mal enterpret tou keksoz ki ganny dir. Sanzman radikal, se ler ou pran *sudation* Sathanarayanan Naidu e ou met li isi dan sa Lasanble. *Enough said.*

(APPLAUSE)

HON SATHYA NAIDU

Saint Louis, mon bezwen dir en distrik ki annan en kantite problem. Me selman mon annan en bon lekip ki pe ed mwan pou adres sa bann problem.

E sak fwa mon rankontre problem, par ler i aparet en pe difisil, par ler ou a pe monte desann pou ou rezourd menm problem. E se pourtant pou sa rezon mon'n fer bann kritik lo *civil service.*

Akoz zot bezwen donn mwan en koudmen pou mon kapab fer bouze mon distrik. Me selman fodre ki zot koman bann zabitan osi zot lekspektasyon i en pe realistik.

Pou 6an, la nou pe regard proze distrik, ti napa. Ki'n arive? Nou'n perdi R3.2 milyon Mr Speaker. Se sa ki en o zofisye dan Gouvernman Lokal in fer resorti avek mwan.

E dan lepase mon ti annan selman 200mil. E sa 200mil ti'n al ver konstrikasyon en miray pou donn konpansasyon baze lo aksyon Gouvernman lepase.

Pou 15an sa madanm in bezwen monte desann, zot in donn li tou sort kalite lenfirmite. E mwan mon pa'n kapab toler sa, e nou'n deservi sa 200mil.

Sa lannen nou annan R740 mil. Savedir nou kapab fer plis ki en proze. E landrwa ki mon pe mazine se kot Sant Kominoter Saint Louis i ete.

Sant Kominoter Saint Louis ler mon'n antre, mon'n war toudsort kalite aksyon, ouswa aktivite delenkan pe arive.

Mon vwar en manmay pous par lao miray, pe pran en bout asis, pe koupe konmsi nanryen ditou. Mon war en

zenn fiy ki sipoze pe al lekol, pe bwar lalkol, a laz 12an.

E zot, zot a vin dir, vin regard bann manrmay anba pye mang, zot konnen kwa ki pe arive? Mwan mon pe al anmenn en transformasyon dan sa landrwa.

Deza o fir a mezir ki mon pe koze, en miray pe monte. Sa larzan R740mil, laplipar sa larzan pe al ganny itilize pour re sirfas sa laplenn, pou met en sistenm drenaz, pou asire ki ler lapli i tonbe, i pa pou parey en basen naze.

Ler mon pe regard sa *basketball court*, nou pe al re sirfas sa *basketball court*, rod *sponsorship* pou met en *changing room*. E mon oule transform sa sant kominoter osi, pou zot benefis sa bann manrmay, pou zot benefis.

E mon ti'n demande, lo kote *projects*, zot ti'n dir i pou kout R450mil. Me selman napa larzan dan Bidze sa lannen. Alors mon pou bezwen atann lannen prosen.

Be ou konnen kwa, mon pa pe al atann, mon pe al lans en lapel avek Kominote Biznes pou donn mon en koudmen. E mon pe al lo en *nationwide drive* pou mon kapab ganny donasyon ase sifizan pou mwan kapab transform sa landrwa.

Pou fer sir ki Lendi ziskan Dimans i annan aktivite pou epanouisman sa bann manrmay.

Ozordi zot kapab vwar mon koman en lennmi, me kekfwa demen zot a realize sa ki mon pe fer i dan zot lentere, malgre toudsort kalite mansonz ki kapab ganny dir lo mwan Mr Speaker.

Mr Speaker lo kote lakaz, sa lannen i annan en gran probabilite nou pou ganny 6 *unit* ankor. Lannen pase lafanmir Adela ti'n rantre, sa i en keksoz vreman pozitiv ki'n arive.

E se gras a zefor ki Onorab Arissol in mete pandan son manda pou Saint Louis. Pou fer sir ki sa fanmir ki'n atann pou se pa konbyen letan, i finalman ganny en lozman ki apropiye.

E pou sa mon dir mersi Onorab Arissol. Laplipar bann *housing estate* lo en baz nasyonal pa'n ganny mentenir ditou. E la i fer mon mazin ex *Gees*, apepre 22 *unit* i bezwen renovasyon ase mazer, ki devret pe arive.

E mon vreman kontan pou note ki dan mwan Avril i annan en gran posibilite ki kapital pou ganny enzekte pou kapab fer travay renovasyon. Dan Coco, mon konnen sa sityasyon pizon

pe vreman afekte zot e fer zot lavi en matir.

Me ankor enn fwa, i annan en larzan ki'n ganny bidzete pou kapab adres sa. Kot Harrison Flats, kot sa *parking bay* i ete, nou anvizaze *extend* sa, so ankor enn fwa progre i annan menm.

Lo kote proze semen, mon a pe debourye menm, lo kote Kato avek Belonie. Mon zis demann zot pou reste en pe pasyante. Mr Speaker mon pe lans en lapel avek mon bann zabitan.

Onorab Naidu li menm tousel pa pou kapab anmenn sa transformasyon dan son distrik. Zot tou zot annan en rol pou zwe. Alors mon pe lans en lapel avek zot.

Nou pou fer plizyer lanons pandan sa lannen, vin donn mwan en koudmen. Ansanm nou ava transform nou distrik. Mersi Mr Speaker.

MR SPEAKER

Mersi Onorab. Nou a pran *pause* la, nou a donn 30 minit *break*. Nou a rebran 11er 10. Mersi.

(BREAK)

MR DEPUTY SPEAKER

Bonzour tou Manm Onorab e tou dimoun ki pe swiv

deliberasyon Lasanble Nasyonal nou pou kontinyen avek bann lentervansyon lo repons diskour Leta Lanasyon. Mon apel Onorab Michel Roucou.

HON MICHEL ROUCOU

Mersi Mr Deputy Speaker. Bonzour tou koleg Onorab. En bonzour spesyal pou zabitan Mont Fleuri e tou bann ki pe ekout nou ozordi.

Mr Speaker sa diskour Leta Lanasyon ki Prezidan ti fer dan nou Lasanble isi, in anmenn bokou lespwar e in vin en diskour ki vreman fran.

Kot la in envit nou Seselwa pou form par dan sa transformasyon. Mr Speaker dan lepase ki nou ti vwar kot Gouvernman ti pe fer tou pou nou pep.

E menm ou pa ti pe gannyen en lanmson pou al lapes. E Gouvernman ozordi Mr Speaker, zot pe envit Seselwa pou zot form par dan sa transformasyon dan en fason ki demen si i ariv okenn epidemik dan nou pei, kot Seselwa kapab konnen ki mannyer pou debout lo li menm Mr Speaker.

Mr Speaker sa 16mwan ki'n pase i pa'n fasil pou bokou nou e lemonn antye. In en letan kot nou'n vwar nou tou nou'n

tourn ver Bondye Mr Speaker. kot la mon oule remerci bann ki'n tonm lo zot zenou parey Onorab William in dir pou zot pri y pou nou pei.

Mr Speaker sa pandemik ki'n pase, in osi donn nou en leson. Kot la in edik nou Mr Speaker ki manner nou bezwen leve debourye. Pa zis asiz dan en kwen e konplent Mr Speaker, Prezidan sa langazman ki'n anvoy kot nou pep ozordi se ki vini. Pa zis gete ki ou pei kapab fer pou ou. Ou osi gete ki ou kapab fer pou ou pei Mr Speaker.

Mr Speaker lavi isi Sesel napa personn ki'n dir se ki lavi pa ser. Parey bokou i konnen se ki nou depan lo bann komodite ki ganny enporte. E parey Prezidan i dir fran se ki *container* bann pri *container* in monte Mr Speaker.

E ozordi Sesel Mr Speaker pa tou keksoz ki nou ou kapab dir ki nou pei ki fer. Mr Speaker ler ou get ou pti pei Sesel ozordi nou bezwen bokou bann lezot pei. E parey nou Prezidan pe fer se ki i pe zwenn bann larestan *partner* dan bann pei pou zot kapab ed nou. Ed nou dan nenport ki fason Mr Speaker. Akoz nou en pti pei ki nou bezwen travay avek tou nou bann vwazen.

Mr Speaker, Bondye li menm li in donn nou en zoli pei. Nou pei Sesel kot ozordi nou vwar bokou viziter i admir nou labote.

Mr Speaker avek bann defi ki pe arive partou dan lemond, nou pa kapab reste a lekar pa kit en lizye lo ki pe pase dan lemond antye.

Mr Speaker nou, nou pe demande ek nou bann frer nou bann ser la deor, pou zot pa zis asize esper Gouvernman pou vini pou zis donn nou en kwiyer. Nou bezwen nou osi vini Mr Speaker e zwenn tou bann ki deza pe travay.

Mr Speaker, mon'n tann bokou mon bann koleg lot kote latab koz lo lanplwa, nou tou le semenn dan nou *mail* nou gannyen bann ou kapab dir bann landrwa ki pe rod bann travayer. E mwan ansanm avek mon bann koleg ek mon tim tanzantan nou met lo *Facebook* bann pozisyon travay ki annan Mr Speaker.

E nou vwar souvandfwa i annan bann zabitan dan mon distrik ki apros nou, ki dir nou ki dir wi zot in kapab ganny en plas travay.

Mr Speaker mon pa dakor sa zafer kot nou dir se ki etranze pe pran tou plas.

Mwan mon annan serten zabitan bann biznes dan mon

distrik ki'n apros mwan pe rod led pou zot ganny travayer. Me souvandfwa Mr Speaker ki nou vwar. Ler nou anvoy serten bann kandida zot ale zis pou 2 zour, apre zot pa retourn ankor.

Mr Speaker Lepep Seselwa i bezwen realize poudir dan sa transformasyon, nou bezwen tou nou tou vini parey en mayon pou nou kapab bouz devan. Pou ou kapab ed nou pei pou bouz devan Mr Speaker

Mr Speaker dan sa transformasyon nou'n vwar poudir nou rezerv total ki ti'n ariv \$702 milyon. En sif ki pa'n zanmen arive dan leparse. E sa i akoz, akoz i nepli annan koripsyon i annan plis lord, nepli annan sa zafer donn bal Mr Speaker.

Nou pe anmas plis reveni dan lendistri touris, menm avek bann fre bann fret transportasyon ki'n ogmante an deor e sa i annan en lenpak direk lo nou vi ki e preski tou komodite i ser Mr Speaker.

E nou Gouvernman pe kapab marye sa Mr Speaker, kot i kapab soutenir pou nou pep pa pey keksoz tro ser.

Pri lavi ase stab pou nou sitwayen. Zis mazine kot nou ti pou ete si Dolar ti ankor R23 si Ero ti ankor R25 Mr Speaker. Nou pa ti pou kapab *afford* bann senp komodite de baz

menm si pri *container* in plis ki pe double parey avek 2019.

Mr Speaker mon osi mon annan bokou zanmi ki travay kot *Air Seychelles*. Ki nou ti vwar an 2008 Mr Speaker, kot ti annan bokou zot ti perdi zot lanplwa. Preski 200 *staff*. Dan sa transformasyon nou Gouvernman pa'n les zot ater. Ozordi nou vwar ki laplipar bann *staff* zot ankor la pe travay. Zis enn de zot in anvi ale pou rod lezot fasilite lezot landrwa travay Mr Speaker.

Nou v war poudir nou Gouvernman pe fer tou ki nou *airline* ki nou annan nou paviyon lo la Mr Speaker ki kontinyen fer nou paviyon mont pli o.

Mr Speaker ler mon'n koz avek enn de bann zanmi ki travay kot *Air Seychelles* zot in dir mon enn de zot bann konsern. Mon bann frer Gouvernman i tann zot. Me nou pe lager pou nou kapab kit nou *airline*, ki zot tou nou konnen poudir dan sa travay ki zot fer zot in al *course* ladan Mr Speaker kot zot lanmour i dan sa travay Mr Speaker.

Lapolis Mr Speaker, dan sa transformasyon mon vwar ki Lepep Seselwa i annan plis sa konfyans dan Lapolis ozordi. Akoz bann rezilta ki zot pe anmennen.

Mr Speaker mon vwar poudir se ki Lapolis pe donn tou ozordi, zour i annan en lensidan en vol oubyen kek ki afekte nou pei lannmen menm ou tande poudir sa endividi in ganny arete.

E Lapolis li menm li pe fer tou pou fer sir ki i reganny sa konfidans e reganny sa konfyans dan lakominote.

Mr Speaker mon pa pou mank sa - mon pa pou rat sa sans la, pou mon kapab remersi sa tim ki pe travay dan Kord Gard Mont Fleuri, sa i ASP Sophola avek son lekip. Nou annan en bon lantant Mr Speaker.

Mon priye ki nou kontinyen travay koumsa pou nou kapab bouz nou distrik pli devan. Mon konnen poudir i annan bokou lezot landrwa pou zot kapab aranze e mon konnen poudir zot pe fer zot mye Mr Speaker.

Me mon vwar osi poudir i annan bann akt malonnet ki'n arive dan sa lafors. E la nou'n vwar poudir napa plas aksyon pe ganny pran kont bann ki vin detri limaz sa lafors.

Mr Speaker nou'n pran en nouvo lapros ansanm avek Stasyon Kordgard Mont Fleuri, kot la nou pe demande kot plis vizit i ganny fer dan kominote. Mon vwar poudir vol, kas

transpor, kas lakaz in ogmante. Me solman nou konnen poudir nou pa kapab zis depan zis lo sa lafors pou zot fer tou.

Nou dan kominote nou bezwen groupe. Nou bezwen vin pre ansanm dan plas asize fer bann nwizans, fer bann akt anti-sosyal pou nou *disturb* lakominote.

Nou bezwen groupe pou fer sir ki nou kominote i vin pli byen. Nou koste plis ankor pou nou *deal* avek bann sityasyon. Zis mazine ki pou en kominote pou fer grandi en zanfand.

Mr Speaker mon oule remersi tou bann ki'n vin devan pou zot kapab donn koudmen, pou nou batir dan sa transformasyon.

Mr Speaker *STC*, parey mon'n tann dir oparavan ki mon pa dakor ki *STC* in vir son ledon avek lepep Seselwa.

I pa vre Mr Speaker. akoz *STC* sa transformasyon i pe fer son mye pou li kapab tenir bann komodite debaz.

Anba *RRP* Mr Speaker, nou'n vwar poudir bann komodite ozordi si ou pas kot *STC*, ou pou vwar bokou dimoun pe fer zot konmisyon. Sa *RRP* Mr Speaker in ede pou fer bann marsan dan bann lezot laboutik pou pez en pe bann pri lo komodite.

E nou'n vwar avek ledikasyon ki *STC* pe pran atraver medya kot sa pe kapab edik nou pep pou kapab edik nou pep pou zot konn en pti pe ki mannyer zot pou kapab fer zot depans e kote bann landrwa zot kapab ale pou zot kapab fer zot *shopping*.

Mr Speaker, nou konnen poudir ozordi Lopozisyon pe targe *STC*, akoz dapre zot nou Gouvernman in met en madanm profesyonnel - en madanm ki annan en leker pou travay pou son pei Mr Speaker.

Mr Speaker, an 2021 *STC* ti mazine pou fer en pert apepre 20milyon. Be avek *RRP* Mr Speaker in plito fer en profi 8milyon Mr Speaker. ki sa ozordi ansanm avek bann *rent* ki zot ti peye oparavan, ki sa ti fer pri lo bann komodite monte.

Mr Speaker mon oule remersi sa *Board* kot *STC*, avek son *CEO, management* zot pou sa travay ki zot pe fer, pou fer sir ki sak pep Seselwa i kapab desann vin fer zot pti konmisyon Mr Speaker.

In ler pou nou aret anmenn politik, pou nou *tag* bann profesyonnel lekel ki ek nou, lekel ki ek nou pa ek nou. Lekel ki aktivis. Tou Seselwa i travay pou son pei ler i ganny kriye.

Mr Speaker mon distrik Mont Fleuri i enn ki annan bann pli zoli zabitan. Bann dimoun ki vremen *welcoming* ki annan en pe dan tou Mr Speaker.

Mr Speaker nou'n vwar sa transformasyon osi dan nou distrik, kot la nou'n vwar poudir i annan bann proze, ki pe ganny fer anba sa R740 ki'n ganny donner anba bann pti proze. Kot la Mr Speaker si mon kapab nonm en proze. Semen Dan Gale Mr Speaker ki plis 40an in ganny promet ki sa pou konmanse. Byento avek bann ki'n konmanse nou pou vwar se ki sa proze pou ganny demare par premye faz.

Mr Speaker mon bezwen remersi ki sa bann zabitan bann ki'n annan bokou pasyans Mr Speaker pou zot espere tou sa letan.

Menm si i annan ki'n kit nou ti pe lager pou sa proze e mon konnen kot zot ete zot pou byen fyer, ler zot pou gete ki sa proze pe al konmanse.

Mr Speaker i annan bokou bann lezot proze ankor ki'n konmanse. E ki pou kontinyen an menm tan ki nou ale. Me la nou pe dir ki bann proze ki nou pou fer i pou benefis tou zabitan. Nou pa pe fer bann proze endividyel mon bann frer. Akoz nou anvi ki bann proze ki

nou fer i benefisye nou kominote.

Mr Speaker i annan osi lezot proze parey semen kot lafanmir Cedras, ki sa nou swete ki byento zot osi nou ava kapab bouz devan pou nou kapab konmanse.

Nou remersi bann Lazans ki pe travay avek nou lo kote distrik, nou remersi zot pou zot sipor. E menm ki annan serten bann Lazans ki ankor pe trenn lipye parey in ganny dir. E nou Mont Fleuri nou pe demande ki zot vin ed nou dan sa travay.

Akoz nou osi nou pou bezwen met nou lipye ater kot nou vwar ki i annan zot pe trenn lipye.

Mr Speaker nou konnen poudir nou Gouvernman i nouvo. Me selman i annan bokou keksoz ankor ki bann departman zot bezwen revwar zot fason fer.

Mr Speaker zis parey mon ava donn ou en legzanp zis pou koup en pye dibwa ki en menas pou en lenfrastruktir i annan tro bokou Lazans ki ou bezwen ler ou al kot enn i dir ou al kot lot, lot i anvoy ou kot sa enn laba. Ki sa pou mwan i kapab rann zabitan fristre. E nou, nou pe demande ki sa i ganny revwar.

Mr Speaker nou anvi remersi SLTA - Lazans SLTA lannen 2021 nou'n vwar ki'n fer

bokou, bokou pou nou distrik. Sa par met koltar dan bann semen ki pa'n zanmen annan, met lalimyer dan distrik e osi nou vwar la dan Bidze ki'n pase ki pou annan sa *roundabout* la pres kot NIE.

Ki sa pou soulaz en pti pe trafik anpese ki annan aksidan ek lezot ankor. E osi nou vwar lagrandisman semen Bois de Rose. Ki sa pou ed en pti pe avek mouvman trafik lo sa kote semen. E osi avek bann motoris.

Mr Speaker depi ler mon'n vin dan Lasanble mon'n toultan koz lo elazman semen Rochon.

Nou pe ganny bokou difikilte, aköz i annan bokou dimoun ki pa oule donn *way leave*. Me si zot pa donner nou pa pou kapab fer sa proze. E nou, nou pe anvoy en lapel avek zot pou zot donn sa permisyon sa *wayleave* pou nou kapab fer sa proze. Ki sa i ava soulaz transpor ki pe mouvman lo sa semen.

Mr Speaker i annan bokou koze lo lapovrete. Nou Gouvernman pa'n dir pou dir napa lapovrete. Nou rekonnet pou dir i annan bokou dimoun ki pe seye la deor. Me selman Mr Speaker nou pa kapab fer politik bonmarse avek poudir se ki Gouvernman pa pe tande pou dir i annan lapovrete.

Mr Speaker nou lekol Mont Fleuri nou de lekol annefe zot osi zot pa'n mal debourye pou lannen 2021. Mon oule tir sapo bann *teacher* ek nou bann *Headteacher* ek bann zanfan ki'n kapab anmenn bann bon rezilta. Ek bann osi tou ki'n seye mon dir zot pa bes lebra. Annou kontinyen e zot ava vwar poudir demen zot ava aport fri.

Mr Speaker nou distrik i en lafors dan spor. Mon vwar poudir Mont Fleuri i annan bann bon zwer ki'n sorti dan nou distrik ki ozordi lo nivo enternasyonal zot pe monte nou paviyon.

Mr Speaker mon anvi anvoy en lanons avek NSC pou zot pa neglig nou kort *basketball*. Nou konnen poudir nou bann tim sport zot desann tou le *weekend* zot fer kot zot kapab. Me i annan *meeting* ki'n ganny fer Mr Speaker. Me ziska ozordi nou pa ankor vwar okenn mouvman lo kote nou kort *basketball*.

Mr Speaker mon anvi ankouraz osi bann ki pe met zefor bann ki anvi zwenn bann tim sport vini vin devan. Nou vwar poudir tim Baie Lazare in formen e nou konnen poudir byento zot pou batay avek tim Mont Fleuri Mr Speaker, e nou pou bat zot tou.

Mr Speaker, mon osi re anvoy en lanons Mr Speaker, avek bann lezot lekip ki anrezistre Mont Fleuri, pou zot vin devan pou donn nou en koudmen pou nou tir nou bann zenn dan bann fleo.

An apros bann zenn vini gete ki mannyer nou kapab fer po ed nou lakominote.

Mr Speaker mon anvi remersi Minis pour Lakaz, ek son lekip pou sa travay ki zot ti pe fer dan nou distrik pou revwar bann bout later parey in anonse, pou gete ki mannyer pou soulaz lalis ki nou annan nou osi.

E mon osi dir avek sa Minister ki nou anvi sa redevlopman i konmanse parey nou ti'n koze. Mon konnen poudir i annan en pti pe problemm avek kontrakter me selman zabitan i pe espere kot sa i ganny demare Mr Speaker.

E osi nou anvi dir ek Minis pou li revwar en pti pe lo kote Corgate Estate kot i annan sa bann *low cost house* Mr Speaker. Sa bann lakaz i date pou bokou letan pou sitan bokou lannen i annan en bon pe problemm laba.

Annou revwar mannyer nou kapab get bann zabitan ki ankor pe esper en lakaz e ki zot annan bokou pasyans ki zot pe

espere akoz lakaz pe ganny bokou problemn avek.

Mr Speaker mon pa pou mank sa loportinite pou mon remersi tou zabitan. Ler mon'n pas kot zot bann dyalog ki nou'n gannyen. Mon anvi remersi nou *DA* en nouvo *DA* Mr Steve Noel ki la pe donn koudmen ek son lekip. Mon anvi remersi mon *clerk* Ms Bettina ki la ler mon pa la li ki vwar bann kliyan e gete ki mannyer pou soulaz zot Mr Speaker.

Mr Speaker mon anvi remersi osi mon fanmir ki la dan mon kote ki konpran mwan ler dan sa travay ki mon pe fer.

Mr Speaker en keksoz ki'n ankouraz mon dan distrik ler ou vwar Ms Antonia Tirant dan sa program *Tremolo* si mon pa tronpe. Letan mon'n pas kot sa fiy souvandfwa mon pa ti konnen si i annan sa talan. E mon anvi ankouraz li e mon anvi dir li poudir se ki distrik i la deryer li pou donn li sa koudmen, malgre ki i annan son problemn lasante. E nou lo kote distrik nou anvi ed li fer li bouz devan Mr Speaker.

Mr Speaker avan mon terminen mon pa pou kapab manke pou mon remersi Mr Dominique Chang-Waye avek Mr Dwayne Lucas. De zabitan ki'n vin devan pou ed nou avek

bann pti proze ki pe ganny finanse par bann biznesmenn dan Mont Fleuri. Mon dir zot mersi Mr Speaker.

Mon oule dir ou mersi osi nou Gouvernman avek son lekip pou tou sa ki i pe fer pou nou. Mon oule dir mersi nou *Caucus* akoz mon en nouvo *MNA* pou sa bann gidans ki zot in donn nou.

Mr Speaker mersi osi pou pous zot pou 2021 zot in la avek nou ki zot in donn nou sa gidans pou sa bon lantant travay.

Mr Speaker mon priye ki Bondye nou Papa i kontinyen get nou pei. I kontinyen beni nou pei i kontinyen gid nou dan sa proteksyon. Mersi Mr Speaker.

MR DEPUTY SPEAKER

Mersi Onorab Roucou. Nou prosen entervenans Onorab Egbert Aglae. Selman nou annan en *issue* parske nou bezwen rann lantern *SBC* midi. Akoz zot konnen poudir i annan en levennman ki pe pas an direk lo televizyon avek radyo. E ler mon pe get ler mon konn Onorab son bann lentervansyon mannyer i ete, i pa pou *fair* pou nou demann li pou koup son lentervansyon. I pa pou fer pou nou *rush* li, so nou ava *adjourn*. Nou ava

repran 2er *unless* lo kote *LDS* lot Manm i vini i konnen i kapab koz dan lespas 20 minit *but I don't think so*.

Right mon ava ganny gidans le de *leaders*. Wi *Chief Whip US*.

HON SYLVANNE LEMIEL

Mersi Mr Speaker. mon krwar petet plito nou *adjourn* apre nou fer en sel retournen. Mersi.

MR DEPUTY SPEAKER

Very good Chief Whip pou *conquer. LDS? Ok very good. So* nou ava *adjourn* e nou ava repran travay 2er apre midi.

(BREAK

MR DEPUTY SPEAKER

Bon apre midi, tou Manm Onorab. Byenveni pour, bonn retour. E osi bann dimoun ki pe swiv nou. Nou ava kontinyen avek nou bann larepons lo diskour Leta Lanasyon. E mon pou apel Onorab Egbert Aglae.

HON EGBERT AGLAE

Mersi Mr Speaker. Bonn apre mid tou koleg Onorab, tou zabitan Port Glaud ki a lekout. E tou Seselwa, ki a lekout nenport ki landrwa kot ou ete. Mr Speaker i en privez ankor enn fwa pou mwan kapab, adres lepep lo size Leta nou

Nasyon ki'n ganny delivre par Prezidan Larepublik.

Dabor mon swet, byen retour de koleg *MNA*, Onorab Ernesta e Onorab Larue dan sa Lasanble.

Mr Speaker, avan mon komanse mon ti a kontan, met lo rikord ki size nou resanz, zour Leta Lanasyon, e ki'n ensit serten largiman ki'n ganny fer par Onorab Sathya Naidu, atraver ou Mr Speaker.

Mon pe dir ki, si Onorab i anvi anmenn *Standing Orders*, pour reflekte lo labiyman, fer li dan son fason, si li anvi petet en R18mil, parey bann Minis in gannyen, pou zot aste palto. Me pa anmenn *US* avek li dan sa lager, silvouple.

Mr Speaker, mon fyer pou reste dan en sa pei kot bokou etranzer atraver lemonn i reve pou vin pas zot sezour. Kot bokou i anvi vin dir wi, dan sa vokasyon maryaz, kot bokou i reve pou vin admir sa laverdir e losean. Sa zoli lans manifik, sa lakwizin Kreol apetisan. E sa lakey *chaleureux* par sa pep Seselwa.

En pei kot napa lager sivil, kot napa tapaz fizi ki pe rezonnen dan tou kwen. En pei, kot bann servis esansyel de baz i annan an plas. E pe fonksyonnen malgre defi.

En pei kot ou larelizyon, ou kouler, ou lapo nepli en kriter, ouswa en swa pou akse ou resevwar okenn servis partou kot ou ale. Sa Sesel ki nou pe viv ladan, e ki bokou ki pe viv an deor, i vwar li koumsa. Mon pa pou zanmen sanz mon pei Sesel.

Mr Speaker me dan e lot kote, sa zoli paradi, tou *coin* i annan li de fas. Mr Speaker ozordi parey Angle i dir, *if you were to go deep down*, i annan en manman de zanfan ki pe tous li en saler omwen R8500, ki bezwen pey en lakaz *PMC* environ R2000, en *Home Improvement Loan* environ R2500. Bil *PUC average* R1200 par mwan, en servis *mobile* e enternet omwen R1500.

En *Cable TV*, ouswa *Intelvison* omwen R800, en komisyon de baz pou lakour omwen R2500. E larzan bis pou travay e al lekòl omwen R1200 pou zanfan.

E en total apepre R100 par zour, pou sa 2 zanfan osi kapab al lekòl. E si nou adisyonn tousala ansanm Mr Speaker, i fer environ R12mil par mwan. Me li koman sa *single parent* ki pe tous li 8500, sa i en realite, ki bokou pe viv ladan ozordi.

Mr Speaker keston se kote ki i ganny sa bann

ladisyon, pou sey fer *meet ends*, si i pa bezwen al demann prete e met fardo finansyel lo li.

Mon osi Mr Speaker, met en lot senaryo isi devan sa Lasanble. En lot senaryo ou vwar en fanmir, ki pe ganny en *combined salary*. En msye ek en madanm environ R25mil. Kot zot pe lwe en lakaz prive, omwen R10mil, an atandan ki zot kapab ganny en lakaz ek Gouvernman.

Kot zot annan en *loan* personnel pou transport environ R5mil, bil *internet*, delo, elektrisite, omwen R2500. Larzan pou komodite de baz environ 2500, larzan pou *fuel* par mwan, environ R4000. I depan kot ou reste, larzan pou zanfan al lekòl, environ R1500 par mwan.

E pa bliye ki zot osi, met en pti larzan de kote environ R3000, sa pour tel ki farmasi, lopital eksetera. I fer en total environ plis ki R28mil, kan i annan zis R25mil ki rantre.

Mr Speaker, mon met sa de senaryo akòz i de kart. Mr Speaker mon pa ni pe egzazere, ouswa ni koz lalang, ouswa envant okenn zistwar. Sa i en realite, ki sa de group Seselwa, pe viv ladan, ouswa pe pas atraver lo en baz regilye.

San pran bann depans pou lanmizman, e mon salye

tou bann ki konn son priyorite e konn balans son lavi. Mon osi pou osi salye, tou bann papa malgre ki zot in separe avek zot zanfan, zot vwar li nesese pou zot kontribye osi.

Mr Speaker apre ki mon'n ekout mesaz lo Leta Lanasyon, mon pli konvenki ki *leadership* pa vreman konekte ek larealite Leta nou Lanasyon. Nou ki annan responsabilite, parey dan en distrik, byensir nou pou konn vre Leta nou Nasyon. Leta nou Nasyon ozordi, se ki malere in vin pli pov. E sa ki annan, pe pli byen anrisir zot.

Sa dekalaz e lekar ant sa ki pli ris, in vin pli elarzi. E sa kous, ki dan *middle class* i riske byento vwar zot dan *bracket lower class*, si zot pa konn manev byen.

Toulezour nou pe vwar, fanmir pe trimouse e pe tap laport vwazen, vwazin pou kapab met en bouyon lo lasyet son zanfan. Larzan goute, larzan bis, pou pey son bann bil. Nou bann *leaders* la anndan pe temwannayaz sa prose lo en baz toulezour. Nou lo sa kote nou pe temwannayaz sa. Eski lapovrete pa pe anvair en parti nou pti sosyete?

Mr Speaker, la ki preski tou laport, lespwar led in fermes, ouswa in vin pli difisil

pou akse, sityasyon pe vin pli pir. Sa ki'n andete e pe pli andete avek kredi komodite kot sa laboutik Endyen dan son kominote.

Pou zot, in vin en kosmar lafen dimwan. Bann ki bezwen pey zot bil par porsyon. Akoz sa matematik priyorite, ki zot bezwen fer pou, pou fer sa de bout zwenn, pa zanmen zwenn. E zot pe sey fer mirak pou zwenn.

Mr Speaker, lekspektasyon sa pep an Oktob 2020, se en meyer lavi, larzan dan zot pos, plis liberte e swa dan zot lavi. Pou bann zenn, se plis loportinite e swa, lespwar zot prop lakaz, ouswa biznes. Lespwar ki bann servis vin pli meyer e pli aksesib. Me eski sa in arrive? Eski ou, ou'n vwar ou lavi vin pli meyer ki avan, san ki mon bezwen ziz ladministrasyon lepase ek ozordi?

Mr Speaker, nou dir ki Sesel i en pei beni, e Prezidan pe demande pou annan plis linite, plis gerizon, plis lantant. Me pour sa arive, si nou pa sanz nou bann fason fer e panse, tan ki annan ki pas nou letan pou fer nou ditor, dimal nou oponan, nou prop koleg, nou prop frer e ser.

Tan ki nou glorifye bann aksyon ki pa imen, ki pa

reflekte dezir nou kreater, tan ki nou les sa pei aksepte bann norm anti sosyal, e imoral e malsen sa pei pa pou vini en pei beni, ouswa en pei sakre parey nou, nou anvi vini.

Tan ki nou, bann *Leaders* pa renons bann move aksyon. Nou Sesel pa pou prospere lo non Bondye. Nou politisyen nou pa bann Sen, me lesansyel se fer dibyen pou sa pep. Kot nou pep pe soufer, i nou devwar poudir tyonbo en kou anvoy lavwa pou redrese.

Bann ki annan gro lavwa, ki abitye koz for e fer, fer li zot devwar pou koz lo non sa pep. Aret per, akoz pouvwar i reste touzour dan lanmen sa pep.

Mr Speaker, Ladres lo Leta nou Nasyon i mank en pe lespwar e laspirasyon pou sa pep rezouir, pou sa pep regannyen sa sourir.

Pou redonn lespwar sa pep ki ti fyer, ozordi kot ou pase ou dir en bonzour koman ou sava. Larepons se, "mon pe *survive* napa sava." Ki lavi in vin pli dir, zot lavi pe deteryore e zot pe deplizanpli pe perdi lespwar.

Silvouple, annou redonn sa pep lespwar. Sa pep ki pe viv dan en lafreyer modern ozordi. Bokou labous i fermen, bokou ki ti vokal in trankil.

Menm dan landrwa travay i annan ki pe ganny menase e dir reste trankil. Ouswa ou ganny dir, aret met sa bann post e *comment* lo *Facebook* si ou anvi gard ou plas travay. Mr Speaker i en realite.

Mr Speaker koman en zenn politisyen ozordi, dan sa *era* modern, I letan pli difisil dan politik Sesel. Wi, sa pei ki apel Sesel, in pas dan diferan sok ekonomik. Nou'n pas dan diferan peryod ser sang. Nou'n pas dan letan napa, serten komodite, mankman deviz etranzer. Nou'n pas atraver reform ekonomik.

Me en keksoz ki mon konstate, malgre tou sa bann soufrans, sa bann difikilte, sa bann sakrifis, sa ladministrasyon ki ti la, ti fer sir ki son pep pa ti mor lafen.

Diferan mekanizm *safety net*, ti met an plas pou anpar bann ki tonbe. Ti napa okenn *Red Cross* ki ti pe donn lasarite. E mwan mon pou tir mon sapo avek sa ladministrasyon oparavan.

Mr Speaker, eski nou pa ti kapab fer pli byen? Wi nou kapab, selman se ek volonte. I byen ki, ek reserve pei i grosi e lekonomi i rebran. Me eski i normal ki pei i vin pli ris, me son pep pe bezwen mandyan e soufer lo en baz regilye? Bokou

politik popilis, ti ganny fer lo size kof vid.

Me sa ki mon konstate e mazine, ki Gouverner Labank Santral Madanm Caroline Abel, ti dir ki avan sanzman 20 Oktob, ki Sesel i kapab mentenir en nivo lenportasyon an deviz etranzer pou apepre 18mwan - pa 3mwan parey nou ti pas ladan oparavan. Alors eski kof ti vid ler zot ti pran ladministrasyon?

Mr Speaker Sesel, i en pei ki'n ganny rekonnet pou sakrifis e travay dir, pou ariv kot i ete ozordi. E bann Lendeks e *benchmark* enternasyonal i aprouv sa. Sa pa'n ariv pandan sa 16 mwan, ki zot o pouvwar.

Sa pa'n ariv aköz sanzman le 20 Oktob. Sa in ariv aköz zefor kontinyel. E lantant lot kote latav, ler ki zot ti dan Lopozisyon. Wi zot ti en Lopozisyon ki ti pouse, met presyon lo ladministrasyon *SPPF*, Lepep, *US*.

Be ki arive ozordi, eski zot krwar sa travay in fini, ler ou'n ariv lo some sa montanny? Non kontrer plis travay, pou ou reste lo sa tronn. Plis regar i bezwen ganny mete lo amelyorasyon dan sa pei. I pa letan pou diverti kontan, monte desann, zwe gro lebra, ouswa dir ou ki la.

Me non mon frer, ser. Sa i letan pou prouve ki ou pli

meyer. I letan pou montre ki ou kapab fer pli byen pou sa pep. Mon mesaz se ki pa les zot pri dan azanda revanz e personnel.

Mr Speaker, tou pei ki pe swiv bann norm demokratik e ki krwar dan lazistis sosyal, e ki krwar dan *rule of law*, e ki krwar ki diferans dan ideoloji politik, i pa kapab pas son letan, ouswa vwar li pe rod tou fason, pou detri bann ki pa krwar dan sa menm filozofi.

Mon enn ki pa krwar dan fer ditör Sesel, ki swa lokalman, enternasyonal parey serten politisyen Lopozisyon ti fer dan lepase. Mon enn ki krwar, dan sa profes lape, linite e respe dan tou son adversite e diversite politik.

Me aköz ki serten i krwar dan sa lanver? Aköz ki zot le fer nou disparet, parey bokou lot kote i le profetize, ki zot ler fer nou disparet isi lo sa kote.

Eski zot le retourn dan en *one party state*? Atansyon, Bondye ki ziz-e, i pou annan en zour ki apel en zour.

Mr Speaker, Prezidan in pas o bor sa size kou lavi, kot in mansyonnen ki pri lavi pa pou desann. Me se ki en logmantasyon saler, ki Minis li menm in dir nek an 2023. Me Prezidan, pe fer nou konpran, i posibilite arive an 2022. Nou a espere, nou a vwar.

Me sa ki enportan, se ki poursantaz logmantasyon zot pe mazin lo la. Ki pou reflekte sa nivo lenflasyon omwen 10poursan? Lot eleman lo size logmantasyon, se eski sa pa pou vedir osi, en lot logmantasyon dan kou servis, ki pou egalman nitraliz sa logmantasyon, a tou pri ki zot pou anvizaz-e donnen?

Ki a lafen dizour i fer ki, sityasyon finansyel i reste parey kot ou ti ete avan sa menm logmantasyon. Pwen kardinal se, si Gouvernman i donn logmantasyon saler. Eski Sekter Prive, pou swiv sa menm legzanp.

Eski tou, ki dan sa sekter pou kapab *afford*, ouswa serten pou bezwen vwar li, pe *lay off* travayer, si sa i vin mandatwar? Bokou kestyon, baze lo leksperyans lepase Mr Speaker.

Mr Speaker en lot eleman dan Ladres se, *fairness* dan *trade* ki enkli profit *margin*, ki Prezidan li menm li i rekonnet kot parfwa, serten marsan i azir dan en fason dezonnnet. Kestyon se ki, ki pou ganny fer.

Eski sa nouvo lentansyon *Fair Trading Act*, pou ede adres sa problenm. Lot eleman enportan, se rol *STC*. Bann ki memwar i re-kolekte, rol *STC* se pou stabiliz pri e osi anmenn sa eleman *subsidy*. Pour fer ki

napa gran sanzman, dan pri komodite esansyel.

Me ki nou vwar ozordi? Legzanp resan, se ponmdeter ki pri in monte drastikman. Akoz ki Gouvernman, pa ti vwar li neserer pou *subsidize* sa kou? *STC* i sipoze antre dan reform finansyel, in nepli pe pey sa *gro rent*, ki zot ti pe fer tapaz lo la.

In ferm laplipar son bann *outlet*, ki taler mon'n tann Onorab proporsyonnel sorti Baie Saint Anne, in re-demande pou re-ouver sa bann *outlet* ki son Gouvernman li menm, ti deside fermen. Onorab fodre ou reste dan *gear* ek ou Gouvernman.

Mr Speaker, kestyon se akoz Gouvernman pa oule konsider *subsidize* en pe, sa bann kategori. Pou fer ki pri, sirtou nou bann kategori komodite esansyel i ava reste touzour abordab? E ki ava osi tenir e stabiliz *pouvoir d'achat* nou bann konsonmater.

Byensir pa bokou dan Sekter Prive ki pou an faver sa. Akoz sa rezon ki zot ti pe lager pou fer fermen *STC*. E pour zot si sa i arive, i pou en gran laviktwar. Me eski sa Gouvernman i pli vomye apiy serten gro marsan, dan plas regard byennet son pep?

Mr Speaker lo size *public service*. Mon le dabor salye tou

travayer servis piblik, ki pe leve e delivre pou sa pep. Menm si parfwa kondisyon travay i parfwa egzizans, e pa tro *conducive*.

Mersi e kontinyen zot bon travay. Me dan Ladres lo Leta nou Nasyon, travayer servis piblik pa'n ganny gran mansyon neser. Sa lankourazman ki zot ti pe espekte, lenpresyon ki'n sorti se ki Seselwa pa travay, ase.

E glorifye bann travayer Seselwa ki aletranze, ki pa pe viv anba menm kondisyon, e ki pa pe ganny menm saler. E ki saler ki 4-5 fwa plis ki Seselwa, ki pe anmenn kot son lakour ozordi. Eski i normal sa?

Mr Speaker i annan en kantite Seselwa ki leve travay ozordi. I annan deza pe fer de travay, e menm en trwazyenm. Akoz i bezwen pey son det, nouri son fanmir. I annan ki annan pti biznes ki'n bezwen kit sa biznes e al anploye, ouswa rod en *part time* pou kapab kit son biznes alaflot. Sa i en larealite Leta nou Nasyon.

Mr Speaker lo en lot kote kot i konsern travay, avek labolisyon *URS* e lezot *Scheme* travay, ki ti anpar Seselwa. Malgre mansyon, ki serten pe tous de a trwa plis, ki i ti pe gannyen. Mon ti a voudre konn vre sif, konbyen apre ki

abolisyon sa *Scheme*, in ganny en lanplwa formel, pou mwan larealite *is far from the truth*.

Mon ankor vwar bann ki pe *text* mwan, koz ek mwan pou en travay. Mon ankor vwar sa bann, ki ladministrasyon ti'n tire o bor semen retourn kot sa lans, dan kwen sa laboutik, anba pye bodanmyen. In retourn menm landrwa e zot dir ou, zot pe rod en pti zournen.

Mr Speaker, en kantite travay i annan pou fer administrasyon fer. Mr Speaker sa i vedir, ki sa bann dimoun zot anvi travay. Me kot zot al tap laport, zot pa pe *succeed*. Si nou anvi ed sa bann kategori, fodre ki nou sanz en pe sa *mindset*, parey Onorab William, in oule fer nou krwar atraver ou Mr Speaker, ki se nou lo sa kote latab, ki bezwen sanz nou *mindset*.

Kan nou lo sa kote latab, ki vwar larealite. E ki donn lanmen kree tou sa ki zot pe zwir ozordi. Ou ti form parti sa lalit Onorab, mon respe pou ou. E mon priy menm Bondye ki ou.

Mr Speaker, mon siport i anver tou travayer Seselwa ki serye. E ki pe fer zot travay dan en fason profesyonnel. E dan en fason nob. En pei pou li progrese, atraver bann desizyon i anmenn, lenpak lo son

popilasyon i bezwen annan bokou refleksyon.

I fasil dir pran aksyon vitman, drastik. Me dan sa prose osi, i anmenn avek li bann diferan reaksyon. Swa pozitiv, ouswa negative. E pou mwan i kler, e vin rezonnab ki wi, ou pa pou kapab satisfere tou dimoun a o menm moman.

Me pou mwan, si ou'n kapab satisfere, en pli gran mazorite, mon pou dir ou *well done* e sey rod fason pou satisfere sa pti group osi. Mr Speaker, mon pe dir sa aköz konsiltasyon i lakle vre devlopman e progre.

Prezidan i merit okouran, ki i annan en kous lazenes la deor, ki laspirasyon son lalit dan son karyer politik ozordi, i pa sa menm laspirasyon kot i ti komanse. Zenn i oule vwar plis loportinite e mwens politik dan son devlopman. Sa i realite lanaliz ki bann zenn pe fer ozordi.

Ler nou koz lo size later, e pou zot ganny zot prop lakaz. En plan konkret i merit ganny etabli, e en analiz pli profon merit ganny fer. Nou tou nou konnen, ki lamazorite zenn pa pou reisi ganny en bout later. Me i posib pou zot ganny en lakaz.

Me eski nou pe reflexir lo ki direksyon nou pe ale? Napa

mansyon, lo okenn program dan sa direksyon fas avek sa mankman teren. Ni en resers lo ki kantite teren i reste pou fer alokasyon.

Mon swete a lavenir vwar bann *fact reel*, ki sitye dan sa domenn. Nou bezwen vwar plis teren pou konstriksyon e devlopman. Ki sa i vedir a lavenir, plis konblaz. Mazin osi di-si dan 15an-20an. Nou annan bann Zil Pros, kot i konsern plasman nou popilasyon, aköz nou pou vremen vin pli pti.

Mr Speaker kot i konsern distribisyon larises. I byen ki Sesel, pei pe met lanfaz lo nou rezerv. Me fodre pa bliye, se ki lasyer travay e larzan Seselwa ki dan reserve. E i *appartient* a li. So tou desizyon, tou manev i merit reflekte son byennet. Me pa pou en pti group privilezye.

Kot i konsern lord ek lape, i tourmant mwan ler mon vwar bokou lanmor pe arrive. I tourmant mwan, ler mon vwar bann bagar, perdi lavi, lespri revanz e destriksyon fabrik nou sosyete. Sa pa pou anmenn plis lape ek trankilite dan nou kominote.

E la mon lans en lapel ek tou akter konsernen, ki mandate pou etabli lord ek lape dan sa pei. Pou fer zot travay dan en fason efikas e

serye. Tout an respektan *the rule of law*. E sa ki zot Lalwa i gid zot pou fer.

Me en bon travayer parey dikton i dir, i merit en bon saler. Annou regard byen, sa kategori travayer, ki pe fer sa bann travay nob. Donn zot bon bagaz, donn zot bann bon *training*, donn zot en bon reminerasyon. Ki ler zot leve pou al travay, zot konnen ki annan en ranman a lafen dizour.

Mr Speaker, la mon pe koz lo nou Lafors Lapolis, tou travayer medikal, nou bann frer ek ser militer ki pe vey nou souvrennte.

E tou lezot, ki enplike direkteman, ou endirek dan etabli lord ek lape e tou nou bann servis esansyel. Get dan zot *welfare* silvouple. Pou bann ki asize otour bann latab, ki pran bann desizyon. Ekoute, analize dan lentere sa bann travayer parey.

Mr Speaker, mon lans en lapel ek sa pep, ki enkli tou zabitan Port Glaud. Pou annan respe e tolerans anver enn a lot. Aprann pardonnen, e retir lespri vanzans. E osi sa ki enportan, pa ensit okenn form vyolans dan kominote e an zeneral.

Mr Speaker, i annan en lafreyer e en lenkyetid dan kous

nou popilasyon. Larepons wi, i annan. Akoz sa ki mon koz avek i rekonnet sa. Eski se pa en lafreyer, ler en endividi i *call* ou, e i le donn ou en lenformasyon e i dir ou i pa pou kapab koz, lo *call* normal, servi *WhatsApp*?

Eski se pa en lafreyer, kan en travayer, i vwar serten keksoz dan son travay. E i ganny dir, ou kit ou labous fermen si ou anvi reste dan ou pozisyon?

Eski se pa en lafreyer, ouswa en entimidasyon, ler ou dan en pozisyon ou vwar serten dokiman, ou tranzaksyon sipe pe arive. E ou pa kapab dir nanryen akoz si ou koze ou pou ganny met a laport? Wi Mr Speaker, sa pe arive, Sesel.

Mr Speaker lo size *Air Seychelles*; Mon apresye negosyasyon ki'n ganny fer lo size det, sa lakonpanyen. E sa a ede gard nou travayer Seselwa dan zot lanplwa. Sirtou nou bann *crew*, ki enkli pilot. Ki an se moman, pe fer bokou sakrifis. E plizyer kad travayer, ki depi komansman sa lepidemi, zot in aksepte en koupir ant 20-30poursan zot saler.

Me Mr Speaker, mwan lo sa size privatizasyon, serten servis avek bann lakonpanyen etranze, i annan bokou kestyon. Mon ti a kontan, ki

Gouvernman i vin pli kler a lavenir lo sa size, lo ki bann servis ki sa bann tel, ou tel konpanyen i anvizaz-e vin pran.

Mr Speaker kot i konsern mon distrik Port Glaud, mon rekonnèt travay Ladministrasyon Distrik. E mon oule met lo rikord, ki travay kolaborasyon ek mon nouvo DA, e mon nouvo *office manager* i lo en bon nivo.

Mersi pou zot korperasyon, avek tou bann *supporting staff*, ki pe travay ansanm. Lotorite Distrik, i en zouti enportan dan devlopman en distrik. Me parfwa mon santi, ki merit annan plis konsiltasyon, sirtou avek bann Departman Ministeryel.

Nou kapab fer en kantite devlopman, e en kantite aktivite dan nou distrik. Me resours ki vremen limite, menm si atraver lokal, Gouvernman Lokal, i met en pe resours. *Still* i annan defayans. I annan bann prosedir ki long, tarde pou akse resours. Tro bokou birokrasi e mank konfyans.

Dan sa modernite e lavansman teknolozi, e dan lespri desantralizasyon servis. Mon santi, ki nou pe retourn an aryer. Mr Speaker i paret ki annan en mankman konfyans, kot i konsern zeran resours.

Akoz tou i santralize ozordi, ki fer ki i koz bokou retar, pou enplimant serten aktivite. E sa pe osi anmar lanmen DA. Mon dir koumsa akoz, mon konn sa bann leksperyans.

Annou revwar nou *Ease of doing business*, fer li dan sa konteks *ease of giving services*. Mr Speaker, Port Glaud parey tou distrik i osi annan son laspirasyon. Mon swete ki sa proze pou *mitigate* lenpak, delo lo semen, i komanse anvi ki larzan in ganny mete dan Bidze.

Mon osi enplor sa ladministrasyon, ki ler pe diskrit bann proze lo en baz nasyonal, mazin nou osi dan Port Glaud. Annou distribye byen nou larises. Nou ankor pe esper fasilite pou nou bann peser, kontinyite dan proze lakaz, prezervasyon e restorasyon nou bann sit lanvironnman istorik, ki plizyer touris i vizite.

Mr Speaker, ler mon pe koz lo touris. I sagrinan pou tand e vwar, kot nou prop frer ek ser pe azir malonnet dan zot aktive anver touris. I neser regard en pe pli profon, zeran nou bann lans. E vwar meyer fason asir lord ek lape e trankilite nou bann lans, sirtou la mon pe koz sa enn Port Launay.

Tro bokou konplent mon pe resevwar, sirtou dan *weekend*. E menm zabitan i dir nou nepli kapab *enjoy* nou prop lans. Eski i normal e akseptab sa? Kote nou pe ale? Mon lans en lapel, pou tou zabitan e pep Seselwa pou montre respe, pou nou bann aki e pour fitir zenerasyon ki pe vini.

An konklizyon Mr Speaker, mon le tous sa size laz retret. Mon konpran lentansyon, me *timing is not right*. Ozordi nou pe vwar, en *life expectancy*, ki kontinyen desann, ki fer ki, pli bokou dimoun e ouswa endividi pa pou arive laz 65an.

Nou pe fer fas ek lepidemi, sa i koz lanmor. I annan bann sirkonstans lavi, bann maladi. Ki fer ki plizyer pa pou benefisye sa menm pansyon. Alors mon enn ki pa tro *subscribe*, lo fer monte sa laz pasyon, san ki nou regard bann lezot opsyon pli profon.

Premyerman Mr Speaker. Konsider gradyelman logmantasyon en poursantaz dan kontribisyon, ki a *spread* lo en peryod letan, san ki nou annan gran lenpak, lo saler ki nou pou anmenn dan lakour.

Dezyenmman petet, mazin revwar fason ki larzan sa pansyon i ganny investir e konsider bann lenvestisman pli

rantab. Kategoriz bann ki resevwar bann ki resevwar bann *special pension*. Akoz napa bokou zot. E baze lo zot kart lanplwa.

E dernyerman se revwar lafason bann peyman i ganny fer, fas a sa kontribisyon e koleksyon ki sa travayer i bezwen kontribye e kolekte. Mr Speaker lo lot kote latab, pe enport kot ou reste, ozordi zot in penn en portre, ki soley pe pli briye lo Sesel.

Kot preski tou keksoz, i *ok* dan sa pei. Nepli annan problem dan sa pei, sa i fason ki zot in vwar. Me la deor, bokou in vwar li diferaman. Sa manman, sa fanmir, sa pti biznes, sa peser, sa planter, sa etidyan, sa drayver bis, sa *teacher*, sa zofisye Lapolis, travayer sosyal, sa *welfare officer*, e bokou lezot. Sa nyaz nwanr i ankor par lao zot.

Serten kous nou pep i ankor dan difikilte. Pri lavi i kontinyen ogmante, *fuel* in ariv R22 en lit, pri gas in ogmante, san ganny anonse. Pri bann servis pe ogmante.

Me saler sa pep i ankor parey. E zot espekte, ki sa pep i viv en meyer lavi. *The equation simply don't add-up*, frer pep Seselwa. Mon demann lo non Bondye, ki i pa les okenn zanfan Sesel, mor lafen.

Bondye kit en lizye lo nou pei Sesel. Mersi.

(APPLAUSE)

MR DEPUTY SPEAKER

Mersi Onorab Aglae. Mon ava aprezan pas laparol avek Onorab Norbert Loizeau.

HON NORBERT LOIZEAU

Mersi Mr Speaker. Bonzour Madam Clerk, Deputy Clerk, tou mon bann Manm koleg Lasanble Nasyon, tou Lepep Seselwa a lekout. E en bonzour spesyal, pou tou zabitan mon distrik Bel Air.

Mr Speaker i en plezir ankor enn fwa, pou mwan reponn diskour lo Leta Lanasyon, ki ti ganny fer le 22 Fevriye 2022 par Prezidan Larepiblik, Mr Wavel John Charles Ramkalawan.

Mr Speaker, apre 16 mwan dan lofis e osi pandan en moman difisil kot COVID ti pe tap nou for menm. Me avek en bon program vaksinasyon, Gouvernman ti bezwen pran serten desizyon drastik. Tel ki ouver nou Erport, koup FA4JR, aboli URS, e ankouraz dimoun pou rantre dan en lanplwa formel.

I pa'n en desizyon ki serten ti kontan. Me in ede pou redres nou pei, e redres nou

lekonomi, e fer nou ariv kot nou ete ozordi. Avek sa bann mezir, in fer ki bokou dimoun, in reste dan en lanplwa e garanti en lapey tou le mwan.

Akoz dapre konpran, ler nouvo ladministrasyon ti antre, ti pran labar, ni en lapey ti napa pa ti garanti. Sa Mr Speaker, i enn bann pli gran lakonplisman ki nou Gouvernman in fer. Avek louvertir Erport, menm si i annan, ki ti pe dir tro boner, in fer ki bokou bann vol in rantre dan nou pei.

Avek en program vaksinasyon ki ti pe mars tre byen, plizyer pei lemonn ti rekonnèt, ki Sesel i sa landrwa ki zot dimoun i kapab vini, pou vin pas zot vakans, an pe e dan trankilite.

Sa in osi fer, ki nou Lendistri Touris ti rebran Mr Speaker. E sa ti ed nou relans nou lekonomi, dan en fason progresiv. Tel ki loportinite pou bann Seselwa, ganny en lanplwa. E osi fer ki pri Dolar pe stabilize, e pe anmenn plis loportinite lenvestisman dan Sesel.

Malgre tou sa bann, tou sa lakonplisman, i annan pe sey fer nou krwar ki tou keksoz pe al mal dan nou pei. Zot pe osi fer nou krwar, ki serten ketsoz mal ki pe arive ozordi dan Sesel fek arive, anba sa nouvo

Gouvernman. Kan depi lontan, sa bann keksoz ti pe arive.

Me zot koman en Gouvernman iresponsab, zot ti vir zot ledò lo la zis pou rezon politik. E ozordi, tousala pe pet an fler avek nou. *Leader* Lopoziyon in dir, ki ozordi dimoun pa kapab fer de bout zwenn.

Mr Speaker, be zis ozordi anba sa nouvo ladministrasyon ki sa pe arive? Pandan 43an dimoun ti pe fer fas avek en lavi difisil. Apre ki zot, zot ti pe donn bal dan nou larzan, diverti kontan antre fanmir e dalon. E se nou isi lo sa kote latab Mr Speaker, ki ti lager pou en ogmantasyon lapey pou tou travayer Seselwa.

Nou ti lager, pour ki *minimum wage* i sorti R3200 pou ariv R5700 or R750. Nou ti lager, pour ki tou dimoun ki ganny lapey 8000, napa *tax*, ki ganny tire lo zot.

E nou ti osi lager, pour ki tou nou bann dimoun ki ganny sekirite sosyal, nou bann vye dimoun i ganny en logmantasyon dan zot sekirite sosyal.

Sa bann letan ti annan zis zot dan Lasanble Nasyonal, akòz nou pa ti partisip dan eleksyon e zis zot ki ti la. E nou, nou ti koz lo en *pickup* sa letan. Ou konnen ki zot ti dir Mr

Speaker, ler nou ti pe lager pou sa bann keksoz. Zot ti dir nou fou, nou pa konnen ki nou pe dir, kot pou ganny larzan pou fer sa ?

Selman Mr Speaker, apre vi ki Eleksyon ti pe apros-e, zot ti trouv larzan pou zot donn en logmantasyon. Mr Speaker me la, nouvo ladministrasyon in dir, ki pou annan en revizyon lo tou saler. Si tou keksoz i al byen. E mon panse, ki sa i ava en lot pa, dan en bon direksyon.

Me par kont Mr Speaker, pri lavi in toultan reste en konsern pou tou Seselwa. Avek bann levennman ki pe arrive dan lemonn, keksoz i kapab agrave. E nou konman enn Pti Leta Zil, nou pou ganny tape en pe for.

E nou konnen, alors nou pou bezwen aprann depans byen nou larzan, e nou pou bezwen fer serten sakrifis.

Malgre i annan pa pou kontan mon dir sa. Me mon konnen, ki Gouvernman, nouvo Gouvernman i kontan son pep. Dan sa moman difisil, mon konnen ki nou Gouvernman atraver *STC*, pou fer sir ki bann komodite esansyel ava reste a en pri, ase abordab.

Nou osi bezwen konpran ki Gouvernman *LDS*, in vin o pouwar dan en moman tre difisil. Alors nou bezwen annan

linite koman en pep, si nou anvi bouz pli devan, napa plas pou laenn ek rankin. Nou tou nou Seselwa. Menm si nou annan diferan lopinyon, akoz si Sesel i tonbe, nou tou nou pou tonm avek li.

Ozordi tou dimoun i lib pou koze, dir sa ki zot anvi. Dimoun i annan drwa rasanble, zot in swiv prosedir ki an plas. Mon pa vwar, akoz i annan pe dir zot pe ganny drwa fer li. Nou isi lo sa kote latab, ki ti napa drwa fer li. Kot nou ti'n anmenn en lager sanses.

Kot menm Prezidan Larepublik ozordi, ki ti la, ki la ozordi dan lofis, son latet ti ganny kase le 3 Oktob 2006. Sa Mr Speaker, nou pa pou zanmen bliye. Me nou pou fer sir, ki zanmen i pou ariv ankor.

Leader Lopoziyon, in dir konmela nou kontan nou larme. Wi, Mr Speaker nou kontan nou larme, parey zot ti kontan zot larme.

Ler zot ti o pouvwar, zot ti sante pou zot larme Mr Speaker. La dernyen fwa, Onorab Desheila Bastienne ti fer mon mazin msye, zot santer vedet Medaris Mussard. Ki ti sante pou zot Larme. Be nou, nou kontan nou larme.

Me diferans avek nou Mr Speaker, se ki nou kontan nou Larme. Akoz ozordi nou larme,

zot lwayote i pa anver en parti politik. Me zot lwayote i anver Leta e defann zot paviyon, parey Prezidan ti dir dan son diskour.

Nou larme i lib, konmela zot kapab koze san lafreyer, ki zot pou ganny raporte e menm ganny torture. Mon'n zwenn en zofisye ki dan larme en lot zour. I rankont mwan, sa sanzman ki pe arive dan Larme, kot zot pe vin en Larme, vreman profesyonnel.

Kot zot bann konsern pe ganny adrese vit. E ki Prezidan i en boug, ki zot kapab koz avek. E in menm dir mwan, Mr Speaker ki Prezidan i desann pli ba posib avek zot. E i dir mwan ki i menm desann tro ba. Se sa *the spirit*, se sa, se koumsa en Prezidan i travay.

Mon pou felisit nou larme, pou sa bon travay ki zot pe fer, ek sa lapros profesyonnel, kot sekirite ek lape i renye dan nou pei.

Mr Speaker, ozordi nou osi pe vwar sa transformasyon dan nou Lapolis, kot bann krim pe ganny detekte vit. Kot en lalit asarnen, pe ganny anmennen pou lalit kont drog. I annan bokou bann arestasyon ki pe ganny arive. Me zot pe rankontre bokou difikilte. E *manpower*, i en lot pli gran defi.

Mon panse ki i annan zefor ki pe ganny fer dan sa

direksyon, pou fer ki zot a vin pli efikas, e deservi lepep Seselwa dan en fason pli byen. Ozordi sa transformasyon i partou kote. E dan mon distrik Bel Air osi, sa transformasyon pe arive.

Premye transformasyon ki'n ganny arive se fer, se lo nou Ladministrasyon Distrik kot en gran renovasyon in ganny fer. Kot aprezan i pli *conducive* pou travay, dan sa ladministrasyon. Kot sa portre, ki ler dimoun ti pase ti gete, sa portre in sanze. Nou'n met en nouvo portre lo nou, Ladministrasyon Distrik. E dimoun, pe kontinyen frekante.

Tou bann proze distrik pe ganny demare. I annan proze ki date depi 2018, pe ganny demare. Lalimyer pe ganny mete partou. Nou telman annan lalimyer, kot i menm reste nou, dapre mon DA, ankor 20 pou nou mete. (Non, personn pa pou gannyen).

Resurfacing, lo nou bann semen segonder parey Roch Lane, semen Dan Karoutsou anler Curio Road, San Soucis dan FIBA. E sa pou kontinyen ziska kot bann *flats*, ziskan kot Mr Desire Ho-Khan. Dan semen an desandan kot PTi Peser osi, semen in ganny *resurface*. Me pli gro problem, se *way leave*,

kot serten pa oule serten proze ganny fer.

E sa nou pe rankontre partou dan bann distrik, kot dimoun pa le, ou pas lo zot later. Kan san realize, nou ti ganny kree ek lapousyèr, e nou pou retourn an *poussière*. Avek sa nouvo *Planning Bill*, ki pou pase byento, petet ketsoz a sanze.

Tousala Mr Speaker, se bann transformasyon ki pe arive dan mon distrik. E dan tou lezot distrik, mon panse pe arive. E lo kote spor, mon anvi dir ek NSC ek Mr Jean Larue, serye li vin aranz nou *fencing* lo *court*. Sansan i pou vwar mon vilen figir kot son biro !

Pa fini la Mr Speaker, i annan plan pou nou fer semen, pou deservi en bann fanmir anler Sans Soucis. Sa se lafanmir Anaou, Octave, Julie e lezot ankor. Mezir pou semen in fini ganny pran. Alor mon swete ki sa mezir pa reste dan tirwar e sa proze i a ganny demare tre byento.

Sa i a fer ki zanmen ankor Mr Speaker, ki nou bann dimoun aze ler zot mor, zot pa vwar zot ganny trennen dan en dra ziska lo bor semen, pou lanbilans anmas zot. Parey ti arrive dernyen fwa.

Pourtan sa bann fanmir dan sa rezyon, in tonbe leve

pou sa sistenm oparavan ki ti la. Me selman zot in toultan ganny met en kote, e ledò in ganny vire lo zot.

E la mon anvi, Mr Speaker felisit mon nouvo *DA* Mr Nigel Payet, pou sa bon lantant ki nou annan. E pou sa ekselan travay, ki pe ganny fer lo nivo distrik.

Ozordi dan sa transformasyon ki pe ganny arive. *DA* avek *MNA* i konn zot rol. Bann letan kot *MNA* ti fer krwar, ki tou keksoz, ki li ki pe fer tou keksoz in fini. Mon anvi dir en gran mersi mon *constituency clerk*, Miss Agnes Gerry, Ki pe fer en travay ekselan, pou fer sir ki mon biro i reste ouver, pou ki mon bann *constituent* i ganny asiste dan mon labsans. Mwan mon kapab dir, ki i mon lanmen drwat.

Aprè ki mon'n koz lo tou sa bann lakonplisman e sa transformasyon. Mon anvi refer sorti, ki annan serten keksoz ki pa pe mars byen, sirtou dan sèkter piblik. Nou bezwen onnet, avek nou lekor.

E la Mr Speaker, mon pou koz koman *Vice-Chair Committee of Government Assurances GOGA*, ki mon *Chairperson* i Onorab Lemiel. E la mon anvi dir Onorab Lemiel, felisitasyon dan sa bon travay

ki nou pe fer ansanm. E byensir i annan bann lezot Manm, lo sa Komite ki pe fer en travay ekselan.

Mr Speaker, nou pe ganny en pe difikilte avek serten Minister e serten departman osi. Kot zot pa pe reponn nou, ler nou ekri zot. E sa i rann nou travay koman en komite, difisil. Mon pa konnen, si sa pe ganny fer par ekspres, pou destabiliz nou Gouvernman ek bann Minister. I annan i servi rol *COVID*, pou zot pa zwenn nou.

Alors mon le dir zot, pran nou serye. Mon konnen Mr Speaker, zot konfortab dan zot plas. Akoz nou dan Gouvernman, e nou annan en mazorite dan Lasanble Nasyonal.

Mr Speaker, mon anvi dir zot ki sa pa mars koumsa, Lasanble Nasyonal i annan en rol. E bann komite i annan en rol tre enportan pou li zwe dan devlopman nou pei.

E de plis ki sa Mr Speaker, nou anvi dir zot. Mon konnen i annan pe dir, mon pa pe kraz mon Gouvernman. Mon anvi mon Gouvernman fer pli byen ki sa. Nou anvi dir zot, ki nou Manm Lasanble, Prezidan ki ti al lo teren, pou al rod vot pou zot kapab vin Minis ek Depite ek nenport ki zot ete.

Alors ekout nou pa met nou ater, konpran nou. E nou a konpran zot.

E la Mr Speaker permet mwan koz en size ki vreman trakasan, dan nou pti Sesel. Ozordi tou dimoun i arme, avek enn pti kouto. E ou vwar sa en pe partou. E sa pa pe donn en bon zimaz bann viziter, ki *visit* nou. Zot pa santi zot an sekirite. Mon panse ki sa en size ki Lapolis i merit pran o serye.

Anvil partou Mr Speaker, dan tou kwen, tou dimoun i mars ek en pti kouto konmsi en bolpenn ki zot travay avek. E sa i fer bokou nou bann sitwayen, pa zis etranze, per. E zot pa santi zot an sekirite. Bokou *stabbing* pe arive Mr Speaker. I annan bann ki ganny rikorde, e annou zis mazine, bann ki pa pe rikorde.

Dernyen fwa ti annan en *video* lo lans, kot touris ti pe filmen. Ensidan ki ti konklir en msye, en garson avek en kouto.

Aprezan Mr Speaker i fer mwan al lo sa pwen, ki Prezidan in koz lo la. E i kontinyen koz lo la sak fwa, i vin dan nou Lasanble.

Wi nou bezwen pran nou responsabilite, konman en paran pou edik nou zanf an lo bann bon valer lavi. E bann zanf an osi, zot bezwen pran zot

ledikasyon serye, pou ki zot a fer bann bon swa pli tar.

Kot demen, si zot decide swazir en karyer, ou a konnen ki kalite benefis, ki i vin avek. Si ou decide vin en zournalis par egzantp. Ou pa ava esper 52an pou ou konnen, ki ou pa ganny en pansyon a laz 55an. Alors ou pa ava vin lager avek Manm Lasanble.

E la Mr Speaker, permet mwan pas en mesaz ek Onorab Uranie. Mon zanmi dan mon Komite, Onorab mon gran zanmi. Dan son lentervansyon i ti dir. Konmisy on pa pake, e ki dimoun La Digue in dir ek Prezidan pou konstri en Lopital, konstrir enn pli gran. Enn pli gran menm, ki tou dimoun La Digue a antre ladan.

Wi Mr Speaker, nou pou fer enn gran menm, pou kapab pran zot tou, en sel kou. E osi ki pou annan plizyer lezot servis, enkli en *incinerator*, ki nou kapab bril bann lezot lobze.

I osi enportan ki nou konstrir en gran lopital. Akoz i pou permet ki tou bann dimoun La Digue, akoz i paret ki tou bann dimoun i tonm malad zot tou ansanm.

Alors i ava annan ase plas Mr Speaker, pou zot tou. E menm pou osi kapab antre avek zot bisiklet ladan! E osi pou annan konstriksyon Por. E

nou pou fer enn pli gran menm Mr Speaker lo La Digue. Akoz zot kontan keksoz ki gran, gran menm. Nou pou fer enn gran.

Mr Speaker, mon byen kontan ki Onorab Ernesta, in koz lo lakonplisman enn mon *constituent*, Miss Clementina Agricole. Mr Speaker sa zenn fiy, pa fek anmenn meday Sesel. Lontan i a pe anmenn meday Sesel.

E mon ti a kontan demann, ki zot in fer pou li dan lepok ki zot ti dan Gouvernman? Nanryen Mr Speaker. Ozordi sa zenn fiy in vin en manman. E i ankor pe *struggle* pou li kapab ganny en morso later, ou en lakaz pou li kapab viv li ek son zanfan ek son fanmir.

E la mon anvi dir avek mon Gouvernman, pou li get dan *welfare*, sa zenn manman. Pa kit li ater parey Gouvernman lepase in fer. In fer bokou, Mr Speaker.

Annou rekonnet li, e fer son rev vin vre. Son laz pe monte, i ankor *still* pe *compete* e i pe fer sikse. Annou pous li pou li kontinyen *deliver*, delivre. E kontinyen fer Paviyon Sesel monte, Sesel e osi aletranze.

An konklizyon, mon anvi dir avek lepep Seselwa ki zot dan bon lanmen. Lafason ki

nou'n pas dan sa movetan. I montre nou, ki nou Prezidan i konpetan, i kapab. Nou annan en Prezidan, ki pa per pran desizyon. Menm si sa desizyon pa fer li popiler.

Me plito bon pou pei, akoz popilarite pa enportan. Me se progre e bon planifikasyon ki enportan pou pei. Pou bann ki pa kontan, ki sanzman in arive, zot pou bezwen viv ek sa sanzman. Pou ankor bokou letan, zot pou viv ek sa sanzman.

La mon anvi, Mr Speaker an terminan, remerisi tou dimoun dan mon distrik ki'n ede siport mwan, dan okenn fason, pour ki nou a kontinyen travay ansanm, pou byennet nou distrik.

E la mon anvi personnelman, remerisi en dimoun ki'n toultan la pare sa se Mr Guy Savy, Harry ek son fanmir ki'n toultan pare pou ed nou, swa lo kote sport. E dan nenport ki keksoz ki nou bezwen led, son lebra i toultan ouver.

Avek sa ta pozitivite ki pe arive dan nou pei, napa plas pou negativite, akoz i pou met nou retar. E la Mr Speaker an terminan, mon anvi dir ek mon bann koleg, mon anvi dir ek tou mon bann zabitan Bel Air. Annou mazin nou frer Brian

Victor, ki pe al pran, ki pe al fer en loperasyon dan son latet. Akoz i ti ganny bate Sans Soucis, dan bann lepok parti inik.

Ozordi i annan en douler terib dan son latet, ki in bezwen *raise fund*, ki nenport ler i kapab al fer son loperasyon. Mon anvi dir zot annou priy pou li, annou priye ki i a sorti byen, e ki ava retourn parmi nou, ankor.

Mr Speaker avek sa de mo, mon anvi remersye ou. E mon anvi dir tou dimoun ki a lekout, mersi pou ekout mwan e a laprosenn fwa. Mersi.

(APPLAUSE)

MR DEPUTY SPEAKER

Mersi Onorab. Mon ava aprezan pas laparol avek Onorab Regina Esparon.

HON REGINA ESPARON

Mersi Mr Speaker. Bonn apre midi tou Manm Onorab e piblik ki a lekout. Mr Speaker dan lavi ler en dimoun pe noye, sa pli pti lapay ki pas o bor li dan milye kannal. En nenport bakaylo pou trape an krwayan i kapab anmenn li ater, mon poz sa la.

I fer preski 15mwan ki Sesel e pep Seselwa, in temwannyan en sanzman Gouvernman. En nouvo letap ki

bokou, ti pe espere. E kantite ti pe reve pou vwar sa gran zour. Mardi pase Prezidan Ramkalawan in delivre en SONA, ki kler e napa okenn fo promes ladan.

Malgre i annan zot ki pa pe kontan, me finalman sa pei in annan en Prezidan, ki pa pe imilye son pep, e ni menm son prop lekor. Nou'n vwar en tranzisyon ki mon kapab dir in deroul dan lape, kot in napa versman, disan paret 1977.

Me kot in plizoumwen annan sa respe, pou enn a lot. Sa enn ansyen ki'n sorti, e sa enn nouvo ki'n vini atraver en eleksyon, lib e zis.

Sa i model pou lavenir, e standar ki Sesel in fini adopte. La aprezan nou bezwen me ti bann latous enportan lo bann prosesis tranzisyon legalman.

E mon'n note Mr Speaker, ki ler LDS sa parti ki mon pe reprezante isi dan sa Lasanble, ti al dan eleksyon 2020 ti annan detrwa pwen fondamantal, ki ti aspire e viv son kanpanny lo la.

Tel parey linite Nasyonal, promot loportinite pou tou, annan en servis piblik ki efikas e delivre, rann kont e annan latransparans kot larzan piblik i konsernen. Lazistis sosyal e lentegrite, pri lavi pou donn Seselwa sa ki meyer. E respe

pou Lalwa, zis pou nonm enn de.

Ozordi mon poudir ki Gouvernman pe travay, e dousman, dousman pe komans delivre lo sa bann promes. E sa transformasyon, pe arive e i remarkab ki i annan sa bon planifikasyon, ki pou ede pou anmenn devlopman nou pei, lo en nivo ankor pli o.

Annou par egzanp, domenn lasante piblik. Sa dernyen 2an nou pei in ganny frape par sa pandemik COVID-19, ki'n afekte plizyer milye nou zabitan e kout lavi plis ki en santenn nou frer ek ser.

Se par vizyon e lapros diseziv e dinamik, sa nouvo Gouvernman ki nou ti anbank lo en program vaksinyasyon serye. Sa i fer ki lamazorite dimoun, ki devret vaksinen in fer li. Ki ozordi ant 80a 85poursan nou popilasyon, in pran premye doz e dezyenm doz vaksen kont COVID-19, ki protez nou en kantite dan sa pandemik.

Me par kont, i dezapwentan ki zis 33poursan ki'n pran zot *booster* ouswa trwazyenm doz. Menm si ankor nouvo varyan sa viris. E sak dimoun ki mor, avek sa viris i enn tro bokou. Alor mon lans en lapel senser avek bann ki pa ankor pran zot *booster*, pou fer

li avan sa vaksen, son letan i ekspire.

Akoz laprev i la. E nou'n vwar ki lamazorite, savedir plis ki 75poursan lanmor ki'n arive, i parmi dimoun ki pa'n pran vaksen. Annou profite pou protez nou lekor e osi protez sa ki dan nou lantouraz. Nou'n osi vwar ki Gouvernman, in met tou sa ki i kapab a dispozisyon son pep.

Plis lopital, plis lili, plis *oxygen plant*, e fasilite vantilater, pou *deal* ek nenport evantyalite, ki COVID i kapab anmennen. E mon swe, ki pos COVID Minister Lasante, i kapab donn plis *training* bann ners e lezot personnel. Ki travay avek pasyan COVID, ou dan evantyalite en lot pandemik.

An sa ki konsern sityasyon drog, se atraver sa bon partenarya ant bann pei vwazen, e lezot tel parey Langleter, *L'Inde*, *La France* Lanmerik. E bann lorganizasyon tel ki UNODC, ki ozordi Sesel pe fer serten lavans dan sa lalit kont trafik ilegal bann drog kontrole.

Sa i zis en komansman, dan sa transformasyon ki sa Gouvernman LDS i anvi anmennen dan sa lalit kolektiv, kot sa fleo. E i kler ki sa partenarya pe marse. E i annan ankor bokou, ki nou ti a kontan

fer pou elimin sa fleo drog, ki ozordi pe ravaz tou kominote, Mahé, Praslin e La Digue.

Pour ki nou pei i reisi dan sa lalit, i depan lo sakenn de nou, pou donn en koudmen. Me i malere poudir ki resaman nou pe vwar, en lot leksplozyon kriminalite dan nou pti pei.

E i kler ki sa bann krim i annan en lyen direk, avek sa trafik drog ilegal. E bokou lezot aksyon malonnet, parey kas lakaz, vol touris e lezot bagar ki pe arive, ki teoriz kominote. Pe ganny komet plizoumwen par dimoun ki pa oule travay e ki pe abiz sibstans.

Se zot menm ki rekolte, kan zot pa pe plante. E zot menm ki pe vann plis ki sa enn ki pe trimouse, dan gro ker soley pou plante. Nou pa kapab kontinyen dan sa direksyon, Mr Speaker.

Bokou fanmir ozordi, i ankor pe soufer avek sa fleo drog ki Gouvernman LDS, in erite. Mon lans en lapel avek nou tou, pou nou pran nou kominote o serye. E atraver plis solidarite, korperasyon, bann lotorite konsernen. Mon plis ki krwar, ki nou kapab ranport laviktwar.

Mon santi ki pou nou kapab anmenn plis sikse dan sa lalit, i nesese ki i annan en revi afon, pou transform sa lazans

ANB. Menm si an zeneral, i annan zofisye sa lazans ki pe fer en travay an bonn fwa. I malere poudir, ki ankor annan serten Zofisye, ki pe travay dan en fason dezonnet, ki pe met retar dan rezilta zefor ki zot kanmarad i fer dan sa konba.

Nou pa kapab kontinyen, avek sa kalite performans kot serten i met a risk misyon ki sa lazans i antreprann, pou son prop gen personnel. Ozordi mon pe osi demann Gouvernman pou reget ankor en kou, sa program *methadone*.

Kestyon ki bokou pe demande, ziska ki tan pou donner? Eski nou kontinyen kit li, kot bann Ladministrasyon Distrik? Ozordi anvi ki, aprean i tonm anba Minister Lasante, i annan sa nesese revwar sa program enkli son landrwa, e ler distribisyon.

En lot keksoz ki pe afekte lekonomi, nou pei, se sa sityasyon lapes ilegal. E la ankor, travay sa partenarya avek pei vwazen e bann lorganizasyon rezyonal, ki annan plis patrol dan nou delo teritoryal e *zone* eksklizif.

Lotorite Lapes pe kapab met en pe kontrol, e annan plis sirveyans. Mon kontan vwar, bann zefor ki pe ganny fer. Me aköz nou en, ladministrasyon ki

anvi a pli lwen posib e *attend* bann o standar, mon senserman krwar ki Sesel, pou bezwen pran bann aksyon bokou plis strik.

Akoz tro souvan bann ki ganny atrape, i sape aköz Lalwa pa ase sever. Nou resours natirel i pou nou, e alor nou bezwen prezerv li, pou nou benefisye maksimonm.

Mr Speaker, *LDS* en parti ki krwar dan respe pou Lalwa e lord piblik. Ozordi nou pe obzerve, ki avek reform ki'n annan dan departman Lapolis. I fer ki serten landrwa, zot pe vin pli efikas, e en pe pli profesyonnel.

Me sa transformasyon i enn, ki pou pran letan aköz i ankor annan serten zofisye Lapolis ki pe azir gro lebra, ki pa pe profesyonnel. E ki pe servi lafors an ekse, anver nou sitwayen.

Mr Speaker an dizan sa mon osi salye, e rekonnèt ki i annan bann zofisye ki pe donn tou. E travay dan en fason, profesyonnel avek lonnekte e respe pou drwa imen. E mon tir sapo ek zot.

E lo sa *note* mon bezwen felisit *Regional Commander*, Marcus Jean dan rezyon nor, ki pe fer en bon travay. Me mon santi, ki i mank mendev kalifye dan son lekip pou kapab donn

sa servis alaoter, ki piblik pe ekspekte de zot.

Touzour konsernan travay nou lafors Lapolis, nou ankor annan en gro travay pou fer an sa ki konsern konfidansyalite dan zot bann loperasyon. I pa profesyonnel ditou pou en zofisye, devwal lidantite en dimoun avek en akize, ler i pe fer son louvraz.

Mr Speaker, zis detrwa zour pase, en sitwayen i fer en rapor kot en kordgard e sa Zofisye i telefonn sa dimoun e dir li lekel ki'n fer sa konplent. E la sa dimoun, pe menas sa enn ki'n fer sa konplent.

Nou pa kapab, kontinyen koumsa. Si nou anvi en lafors profesyonnel. Nou pa kapab annan o zofisye Lapolis ki ganny sispann pou aksyon kriminel. Tandis ki lot, i ganny deteni pour vole pandan ler travay.

Komisyoner ou annan en gro latas devan ou. Ou bezwen met en pe lord la!

Mr Speaker, enn bann pli gro defi ki Gouvernman pe fer fas avek. Ki i pa nouvo, se sa problemm mank fasilite lozman ek later, pou satisfere piblik.

Ozordi i annan bokou plis demann, pou later ek lakaz dan tou distrik. E zis dan distrik Glacis, i annan 370 aplikan pou lakaz, 113 ki pe pey zot

kontribisyon, *Home Saving Scheme*, 118 aplikasyon pou later ki aktiv, 96 ki kalifye anba *Land Point System, as of 2017*, e 16 aplikasyon pou 2020.

Nou tou lotorite konsernen, nou ti a swete ki tou proze lakaz ek later ti a bouze dan nou distrik. Me avek bokou kontrent sa i pa leka, akoz bokou defi ki Gouvernman pe fer fas avek.

Dan distrik Glacis, nou sityasyon i pli pir, ki lezet distrik. Akoz in napa okenn proze lakaz pou sa dernyen 15an. E lo kote *land bank*, malgre si i annan detrwa *land bank*, dan distrik Glacis. Sa i pas atraver en distribisyon Nasyonal. E zis detrwa, ki zwenn kriter ki reisi gannyen.

Mon kapab fer resorti ki annan sa bann, i annan sa bon partenarya travay ant distrik ek bann lazans. Me mon rapel nou zabitan ki touzour, nou komans sa enn ki dan bezwen nou bezwen fer en pe sakrifis.

E fer nou kontribisyon anver nou *Home Saving Scheme*, pou nou kapab kalifye. E apre, sa kontribisyon i ganny retire lo ou peyman ler alokasyon i ganny fer.

E la ki Gouvernman pe vin ek bann nouvo Polisi partenarya avek sekter prive, pou devlopman lozman. I

enportan ki zot swiv byen, e fer zot kontribisyon regilye. E mon bezwen fer resorti Mr Speaker, dan lepase in annan labi. Kot dimoun aste later *land bank* pou en pri tre ba, e apre zot in vann li pou milyon.

E i annan ki'n ganny plis ki en kare, dan *land bank*. Tousala i bann koripsyon entern, ki'n egziste dan lepase. Ki mon swete sa nouvo Polisi a adrese, pour ki i annan lazistis dan distribisyon later *land bank*.

Malerezman nou vwar ki later *land bank*, ki ti kapab benefisyen enn, ki vremen dan bezwen, in vin en mwayen pou en lot vin milyonner trankilman.

Mr Speaker, in ler pou annan en levanter later Leta, pou kapab met en bon lord. Vwar lekel ki'n aste, kwa, kote e konbyen, e ki i pe fer avek. An premye pa dan sa demars pou aret sa pratik malonnet, se pou annan en levanter. E pou aplik sa regilasyon, ki kan en endividi i anvii, vann en later ki in aste avek Gouvernman, i bezwen an premye lye ofer Gouvernman sa sans pou re-aste sa teren.

Menm si sa pa kapab sanze, menm si nou pa kapab sanz lepase, nou kapab sanz le prezan, pou amelyor lefitir. Mr Speaker i byen ki ozordi, nou pe

tann bokou koze lo sa zafer drwa imen. E kot dimoun, ki lo *remand*, oubyen dan kaso i bezwen ganny zot bann drwa de baz.

I byen ki la zot in konnen, ki drwa imen zot annan. E ki la ki zot annan laliberte lekspresyon, zot kapab eksprim zot lekor. E mon fyer poudir ki se sa Gouvernman *LDS* ki'n anmenn sa laliberte pour ki zot kapab eksprim zot e reklanm zot drwa san okenn lafreyer, ki ava annan reperkisyon ki swa lo zot menm, oubyen lo zot manm fanmir.

Sa i en keksoz ki zot ti napa avan, i en gran lakonplisman sa Gouvernman. Akoz nou ki ti koz lo drwa imen, dan lepase. E la mon anvi fer kler ki, Prezidan Ramkalawan pa ankor konstrir, en sel kaso depi le 24 Oktob 2020. Tou kaso ti ganny konstrir, swa par Angle oubyen *SPUP*, *SPPF*, Lepep oubyen *US*.

E se sa bann menm fason ki ti ganny servi pou detenir nou bann, lezot frer ek ser Seselwa ladan. Prezan ki Seselwa pe vwar ki mannyer dan lepase zot in abiz, drwa imen. Me selman, se zot menm ki swadizan pe ekrir let. Ki zot pa kapab pibliy larepons apre.

Mr Speaker, tro bokou marten soul tann, o bor larivyer

ki pa konn nanryen dan politik Lopoziyon.

Dan sa anviron 12an, ki mwan mon o servis zabitan Glacis, koman zot *MNA*. Mon'n toultan annan sa konsern lo pri lavi. E ki mannyer ki nou bann fanmir, sirtou bann manman tousel i kapab fer de bout zwenn, pou zot fanmir sirviv.

Dan sa konteks mon *welcome* sa lanons Prezidan, ki Gouvernman pe mazin donn en logmantasyon saler, diran lannen, depandan lo sityasyon ekonomik pei. Mon soulaze e mon swete ki sa ava realize, ase vitman. Akoz vremen i annan fanmir ki dan bezwen.

An menm tan mon oule ankor, enn fwa fer en lapel ek tou zabitan mon distrik. Pour nou annan en Bidze lafanmir, kot nou depans i reflekte reveni ki antre, e kot nou pa zis depans an bonnavini.

Annou osi annan pli gran korperasyon, pour ki nou kapab fer en bil delo, ou elektrik diminyen. Mon konpran ki sityasyon enternasyonal i enpakte bann problem parey *COVID*, i fer ki pri lavi pou kontinyen ogmante. E mon mazine ki sa sityasyon, ant *La Russie e Ukraine* pou osi annan en lenpak negativ lo nou.

Se sa rezon, ki malgre ki mon ti a prefere vwar pri lavi

desann, mon bezwen realis, e alor mon *welcome* sa linisyativ esey donn en logmantasyon saler.

Mr Speaker pep Seselwa ti pou *ok* li. Si larzan sa pep ti reste, lo kont sa pep e non pa, dan pos bann endividi ki'n zis donn bal lo lasyer sa pep. Mon vremen swete, ki bann marsan, e lezot ki ofer servis piblik, i pa fer monte tou zot bann pri, lemoman ki keksoz i agrave, pou nou kapab pas atraver sa koudvan ekonomik. Lemonn an antye, i vwar li ladan.

Nou pou bezwen, ini e pa annan en latitud, bef dan disab sakenn vey son lizye. Ozordi nou tann Lanmerik pe koz lo *economic patriotism*. E sa se petet, i en direksyon ki nou osi nou devret pe komans konsidere.

Touzour an sa ki konsern pri lavi, menm si keksoz i kout plis, nou bezwen trouv fason pou nou zer nou depans. Mon demann bann zabitan Glacis, e lezot pou met zot azour avek ban Polisi e stratezi parey sa *Recommended Retail Price (RRP)*, ki Gouvernman in met an plas. Ki kapab ed zot balans zot Bidze, lafanmir.

Konnen kisisa sa, e servi li pou zot prop dibyen. Pa zis aste keksoz dan en sel landrwa e apre kriy o sekour. Annou sey

mars an de, parey granmoun lontan ti dir. Si sa kargezon i vin par avyon, me pou nou, me pou annan ki pou vin par bato ki pou kout pli bon marse, dan detrwa zour, esper en pe.

Fodre ki nou adapte, e vin pli rezilyan kot i posib. Mon osi ankouraze, ankouraz bann zabitan mon distrik. Pou nou aste an gro. *STC* i ofer sa servis, osi byen ki lezot enportater.

Si i pa posib pou ou aste en kargezon, en kartron delwil oubyen dile, ou tousel, zwenn avek en lot manm fanmir, ou vwazen ki li osi, i bezwen. Met zot larzan ansanm e aste an gro e partaze. Akoz la ou pou, ou pa pou ganny sarze sa *markup price*. Sa *markup* ki marsan, ki vann an detay i mete pou son profi.

Mazorite Seselwa i dan menm bato. Akoz sa bann menm laboutik, ki mon'n nonmen, se sa kot zot fer zot konmisyon.

Mr Speaker nou imen nou, me menm zannimo i protez son piti. Alor mon zis pa kapab konpran, kwa ki fer ki en dimoun, i kapab abiz en zanfan seksyelman, ou menm fizikman? Ki kantite pouri ki son lasante mantal i pouri, pou li kapab fer sa?

Eski sa dimoun i vremen kapab get son prop figir dan

laglas, e annan lafyerte, apre en tel akt? E dan sa konteks, mon *welcome* sa nouvo *Model Law* lo proteksyon zanfan, ki'n ariv en gran zistans, pou sekirite bann zanfan.

Me son reisi i depan lo nou menm. Bokou pe dir fer santans monte ankor, ou ava vwar si ava annan enn ki pou anvi abiz en zanfan ankor. Pli bon Lalwa, pa anpes personn fer krim.

Alor nou bezwen reste vizilan. E sirtou nou bann manman, kan nou komans remarke, remark keksoz drol dan konportman nou zanfan. Sirtou anver en adilt an partikilye. Annou sey rode aköz, annou pret en zorey e ekout nou zanfan.

Nou bann manman, nou bezwen vin sa premye konfidan, nou bann zanfan. E zot sekirite, i bezwen vin, vin nou premye priyorite. Kan nou antre dan en nouvo relasyon avek en dimoun ki pa paran nou zanfan, fodre fer byen atansyon, konn sa dimoun filannegwir avan nou anmenn li kot nou, oubyen nou al kot li avek nou zanfan, ou kit nou zanfan tousel avek li.

Ou sa ser, sa kouzen, sa tantin, sa zanmi, sa vwazen, ler ou remark kek aksyon drol par en adilt vizavi en zanfan, pa ezite pou vin devan, ou aksyon i kapab sov en inosan. An sa ki

konsern lafason ki Lakour i *deal* ek bann kondannen, pou labi lo zanfan, si in fer enn fwa, i deza tro.

Donn li santans ki a fer ki zanmen ankor, i ava ni menm pas nide pou fer en tel aksyon. Sa i anmenn mwan lo size bann endividi e bann dimoun, ki pe fer prizon vin zot lakour. Bann *repeated offender*.

Setadir fer krim, i kondannen, i al prizon, i sorti. E i rekomans ankor, ziska ki i ganny atrape ankor enn fwa, ensidswit. Sa i en gran konsern. Aköz sa bann dimoun, pe teroriz nou bann kominote, e menm nou Lendistri Touris. Tou distrik i konn serten sa bann dimoun.

E letan zot dan prizon, distrik i anpe. Me zis koman zot sorti, kanton i ganny teorize. Fodre ki nou sosyete i adres sa size seryezman Mr Speaker. Zis en legzanp, en zenn *homme*, i atak en touris dan gran zour Beau Vallon. I ganny arete, i al Ankour, i kondannen detrwa mwan apre i sorti.

I al vol touris ankor lo lans. Be oli reabilitasyon ki sa imen in pas ladan letan i ti dan prizon? Ki zot in fer laba, pour ki i vremen realize ki lavi kriminel, pa en lavi sa? Mon'n menm deza antann en travayer prizon, koz lo en prizonnyen e

dir ki sa enn zot bann “*old faithful* sa”. Sa enn ki tanzantan i monte, i mont en kou.

Me non! Nou pa kapab annan dimoun ki sitan monte desann prizon, ki bann travayer laba i komans get zot koman zanfan lakour. Prizon pa devret en landrwa permanan pou personn. Si nou kontinyen koumsa, nou pe fel sa sosyete.

Alor mon demande, ki nou revwar kwa, ki nou kapab fer pour ki sa eksperyans kondannasyon prizon, i enn ki okenn dimoun pa ava anvi pas laba ankor dan son lavi.

Mr Speaker, mon vreman apresye serten travay dan mon distrik, vi ki i annan en kominote peser.

Si sa Gouvernman pa ti'n sanze, Glacis pa ti pou zanmen vwar konstriksyon en bazar. Ni en lapas fouye, pou bann peser. I fer lapenn, i fer lapenn osi vi ki en lepok, ti annan de *MNA US* sorti Glacis dan mon distrik, ki ti dan Lasanble. Me zot Gouvernman ti sourd lo zot.

Mersi ladministrasyon *LDS*, pou ekout nou kominote peser. E ozordi keksoz pe bouze, e byento sa bazar ava konplete. E lavi bann peser ava vin pli konfortab.

E an sa ki konsern negosyasyon pou zot *gear store* bann keksoz, pe ganny finalize.

E byento zot ava ganny met okouran. Nou osi vwar menm keksoz atraver pei, kot nou bann peser pe ganny plis sa fasilite.

Mr Speaker, a sa pwen, permet mwan dir enn de mo lo servis piblik. Mon kontan tann Prezidan anons sa zafer lo *performance-based budget*, bonous. Sa i en keksoz ki tre byen, akoz i ava ankouraz dimoun pou travay dir pour ganny plis benefis. I enportan pou tou travayer, ganny plis benefis. I enportan pou plis travayer konnen ki, pa zis bonous ki pou *performance-based*.

Me tou lezot laspe devlopman en travayer. Si en travayer dan en *management*, pa montre lentere dan son travay, akfer pey *SIM*, pou li al leson? Plito ankouraz sa *cleaner*, ki montre lentere dan devlopman, dan devlop li plis e asiste li, pou al en *evening class*, kot i ava kapab ranforsi son baz edikasyonnel, ki petet i a, in neglize letan i ti pe lekol.

Sak travayer dan servis piblik, i en mayon dan lasenn ki permet en Gouvernman enplimant son stratezi, son plan e son program. Parey nou konnen. Lasenn i osi for, kot son mayon i pli feb. Setadir ki en mayon fay, fay kote pou fer

en lasenn kase e dan sa Sesel ozordi, napa plas pou mayon ki feb.

Zis akoz i pa anvi lev son pti ledwa, pou fer kwa ki se swa. Tro bokou dimoun i santi, li byen dan en, dan son lapo, pou ariv travay 8er bomaten, 15 minit dan *restroom*, pou aranz son makiyaz, pran en lot 10minit pou li swadizan fer lapriyer. Al donn nouvel ek son dalon.

Lir en Nasyon, e apre anviron lerdan, met *on* son *computer*. E pran lakoler si kliyan in deza la pe espere. Bann travayer koumsa mon dir, mon dir zot, koman pake sentonm. E parey koze i dir, les pake sentonm trankil. Pa pran pou met dan lofis. Ler i trenn son lipye e i met retar dan travay. I pou fer piblik perdi konfyans dan sa administrasyon antye. E i pou kree fristrasyon.

Mr Speaker dan bokou ka, dan sekter piblik, i annan ankor landrwa ki mendev i plis ki sa ki nesaser. E en travayer, pou en travayer spesifik. Sa i parske dan lepase, sa bann landrwa in ganny, sistenm in ganny *inflate* pandan letan eleksyon. E zot in kree post ki pa ti nesaser.

Me mon rekonnet ki sak dimoun i annan drwa travay,

pou ganny son lavi dan en fason ki diny. Me dan sa ka, apresye sa loportinite, donn nou sa bon servis e delivre lo ou responsabilite. Aret kale e profit lo sa enn ki pli feb.

Mr Speaker, parfwa mon demann mon lekor, si pa ankor ler pou Gouvernman adopte en Polisi, vizavi servi telefonn *mobile* dan bann biro Gouvernman.

Akoz tro souvan, sa dimoun ki sipoze donn servis, i lo sa telefonn dan en konversasyon prive, e kliyan ki bezwen ekoute, ekout tou son bann lavantir, e zakasyon avan ki i ganny servis.

Sa osi in ler pou arete. Mon espere ki nouvo, biro servis piblik i ava regard sa osi.

Avan mon terminen, mon pou tous sa size koripsyon. E mon siport mon Gouvernman, a san poursan sa pozisyon ki nou pe, ki nou pa toler frod e koripsyon.

Ozordi nou pe vwar en, nou pe vwar e swiv bann premye zafer legal, kot Leta in komans pourswiv sa bann dimoun ki dan lepase in donn bal e abiz zot pozisyon dan Gouvernman pou fer frod e koripsyon.

Mon swete, ki sa bann prose legal, i ava ede, pou rekouver bann larzan ki nou pei

in perdi dan lepase. Nou pti pei Sesel in pas dan tro bokou, koripsyon. E mon annan konfyans ki dousman, dousman, ACCS ava fer son travay e nou pei ava annan, bann standar vreman o.

E sak sou lepep Seselwa, i ava ganny byen servi. Mr Speaker avan mon terminen, mon ti a voudre koz en pti moman, lo serten komanter ki dir, ki Prezidan napa plan.

Prezidan pa'n dir isi, pa'n dir laba, li. Les mwan met li koumsa, an dizan ki sa Prezidan ki la, i en Prezidan desizyon e aksyon. Dan son SONA, in napa *Wi-Fi* dan *Tata*, in napa tinel, in napa tren oubyen bann lezot fantezi.

Pa vin fer konmsi, sa bann problem ki pe arive Sesel, in komans le 24 Oktob, ler *Father* in mont *State House*. Lontan zot konnen ti annan sa bann problem, e zot konnen se sa bann problem in vin atraver fason, ki zot ladministrasyon ti pe travay. Malonnet e mank transparans.

Pa manz bannann epi anvoy lapo lo nou. Annou vin pli konstruktiv e vin avek bann lide, pli inovativ pou benefis nou pei. Se sa ki sa ladministrasyon pe fer, e Seselwa pou fyer anmezir ki transformasyon nou pei i kontinyen.

Pou terminen mon ava dir ki deplizanpli nou pe remarke ki nou bann distrik, pe rekomans ganny lavi. I annan bokou pti proze ki pe bouz dan, bouze dan nou bann distrik.

E mon demann bann zabitan, pou partisip dan devlopman zot kominote, pou pran par dan bann aktivite ki distrik i organize. E pou pran *ownership*, sa bann plan e proze.

Mon demann bann zenn, pou sezi loportinite ki a zot dispozisyon e donn tou pou reisi. Akoz ler zot reisi, Sesel i fleri. Mr Speaker, letan mon pe ariv lo mon konklizyon, mon realize ki sa lannen ki devan nou, i enn ki demann bokou determinasyon, pou nou kapab navige. E lespwar ki nou sorti venker. Annan konfyans ki anba direksyon Prezidan Ramkalawan, se Sesel e Seselwa ki pas premye.

Nou annan en ladministrasyon, ki pran meyer desizyon lo ki mannyer pou anmenn nou pei pli devan. Nou ladministrasyon pe travay pour moderniz nou pei. E se pour sa rezon, ki ozordi i pe ganny resevwar lebra ouver lo lasenn enternasyonal.

E lo lasenn enternasyonal, letan Prezidan i koze lemonn i ekoute, e Seselwa i fyer. Akoz

nou Prezidan i koz sa ki fer sans. Mon swet tou Seselwa kouraz, nou pou lager an solidarite, pour nou rekonstrir nou kominote. Avek determinasyon nou ava kas tou baryer ki bann fleo pe anmennen, ki detri nou zenn. E avek lasazes, nou ava pran meyer desizyon posibil, pou kontinyen sa transformasyon.

Nou annan en vre Kaptenn ki apel Prezidan Wavel Ramkalawan. *Father* i annan tou Seselwa aker. Ki Bondye i touzour beni e protez sak Seselwa. E ki nou kontinyen viv par lafwa, e mars latet anler koman en Nasyon. Mon remerisi zot, Mr Speaker.

MR DEPUTY SPEAKER

Mersi Onorab. E aprezan nou ava pran en *break*. Nou ava retournen 4er pou kontinyasyon deba.

(BREAK)

MR SPEAKER

Bonn apre midi tou dimoun. nou kontinyen repons avek entervansyon Onorab Richard Labrosse.

HON RICHARD LABROSSE

Mersi Mr Speaker pou donn mwan laparol dabor. Avan mon komanse mon ti ava kontan dir

bonn apre midi pou ou Mr Speaker.

Bonn apre midi tou dimoun isi dan lasal. Tou sa ki pe ekoute. Espesyalman Mr Speaker, zabitan Plaisance. Ki mon'n batiz zot koman en distrik pli entelizan dan Sesel.

Mr Speaker, se avek bokou loner ki mon'n donn mon repons lo dezyenm diskour Leta Lanasyon. Delivre par Prezidan Larepiblik, son Ekselans Prezidan Wavel, John, Charles Ramkalawan isi dan sa Lasanble.

Sa Dirizan ki zabitan mon bastyon byeneme Plaisance, ti defons bwat vote an Oktob 2020. Pou ansanm ek lezot distrik donn li en viktwar istorik, apre plis ki 42an anba en sistenm satini ki ti pe grat nou lo en larap parfwa pli fen ki en papay ver Mr Speaker.

Eleksyon 2020, in vreman istorik pou plizyer rezon. Ti osi premye fwa dan listwar Distrik Plaisance Mr Speaker, ki zabitan mon bastyon ti kategorikman zet anba sa sistenm *SPPF* ek son lekipaz. Ki ti swadizan kosto e konpetan.

An plis ki sa Mr Speaker, en gran mazorite elektoral Plaisance an traver zot vot, in reisi fer mwan Richard Labrosse fer listwar koman premye kandida Lopozisyon sa

letan pou defet enn zot kandida prezidansyel dan en eleksyon.

Mwan, Richard Labrosse en zanfan Plaisance, ki ti ganny dekrir koman en novis, ti donn zot sok. Ziska ozordi Mr Speaker *SPPF* i ankor pe met semiz rouz avek kravat nwar.

Mr Speaker, mon komans mon repons lo diskour Prezidan lo sa not, zis pou re afresi memwar bann ki pa ankor aksepte larealite. E respekte swa ki sa pep in fer pou elekte avek konfidans en nouvo Ladministrasyon pou govern nou pei Sesel.

Sa pei in pas atraver bokou. Sa ki'n soufer, in soufer menm. Sa ki'n donn bal in byen pase. Seselwa in koz atraver zot vot. E rezilta eleksyon in montre klerman ki Seselwa ti'n ganny ase.

A lafen de fen apre plis ki 43an kot sa pep in sibir sistenm Parti Inik, kot bann Dirizan in abiz zot pouvwar. Zot Dwa Imen in ganny vyole. E sa pep in ganny divize e viv lo bann fo promes, nou pei in ariv dan en faz transformasyon.

Mr Speaker, letan mon regard leta Sesel ozordi an 2022, mon vwar en Nasyon ki pli lib ki zanmen. Dimoun i eksprim zot lekor mannyer zot dezire. Zot demann bokou

kestyon. Zot pli enterese lo governans zot pei ki oparavan.

Se sa ki nou ti pe rode Mr Speaker - nou laliberte. Me selman nou osi nou bezwen admet ki parfwa i desot en pe limit.

Ki ou war nou annan laliberte total konmela Mr Speaker. Ki ou war menm i annan serten endividi menm i abiz lo la, kot zot deside pou asiz kot Lorloz avek zot *Jameson* pou bwar.

Nou bezwen pa bliye ki respe i lakle dan lavi. Mon mazin parol mon defen granpapa Ken Accouche ki ti kontan dir nou sa –" Ou kapab mizer be respe i anmenn ou lwen mon piti."

Mr Speaker sa pa manti. Akoz si mon ti napa respe, mon pa ti pou dan sa sez ozordi.

Nou bann zenn la deor ki pe ekout mwan, mon konsey pou zot, touzour pare pou konsilte e rod gidans avek bann ki pli aze, e annan plis lasazes ki nou. Annou valoriz zot kontribisyon e montre zot lapresyasyon anver zot.

Mr Speaker, koman en zenn dirizan, mon'n entrodwir en pti linisyativ pou fer montre mon apresyasyon pou bann pli aze dan mon distrik Plaisance.

Pou zot laniverser, parey mon fek sorti kot en zabitan

ozordi, sa i byen ganny apresye atraver bann sipor ki mon'n gannyen.

Sa lannen i annan endividi ki'n apros mwan pou fer son kontribisyon. Anfen ki plis nou bann aze ava resevwar en *pti token* letan zot selebre zot laniverser.

Koman *MNA* mon'n ganny loportinite pou rankontre plizyer endividi. Swa atraver mon lofis. Ouswa al vizit zot kot zot rezidans pou diskite bann sityasyon ki afekte zot.

Bann ka pli komen ki mon'n resevwar dan mon distrik lannen 2021 Mr Speaker, i osi sa fame leskandal laba Fairview Estate.

Ki mon pe swete ki Gouvernman ansanm ek lotorite konsernen i war en solisyon pou sa bann zabitan Mr Speaker. Tro bokou letan zot pe soufer.

Mr Speaker, i osi annan problem lakaz Mr Speaker. Mon'n ganny sans vizit serten leta mon bann zabitan. Mon bezwen admet ki dan serten lenstans mon vremen sirprann e sagrinen.

E menm demann mon lekor, akoz, konmsi ki mannyer sa bann dimoun ti pe reste dan sa bann move kondisyon pou plizyer lannen?

Mr Speaker, sagrinen pou vwar ki bokou bann zabitan i vremen bezwen lasistans la deor. E bann problem sosyal i fer sityasyon pli enkyetab.

Lannen pase Minister Later ek Lakaz ti delivre 40 *unit* dan ex-Kangard, pou soulaz bann fanmir ki'n esper pou plizyer deseni.

Sa lannen, pandan sa mwan ki pe vini. Gouvernman i espekte delivre ankor 8 *unit*. Menm sa Distrik Plaisance dan li menm i annan en backlog vremen enkyetan lo kote demann pou lasistans lakaz.

Parey nou konnen Plaisance teren i limite. I annan bann redevlopman ki mon krwar ti kapab ganny fer ler Sesel ti annan larzan.

La mon frer ek ser dan *Société de Logement*, byen koni Belvedere koman Kan Per, sa bann dimoun in tann plizyer zistwar. Plizyer plan in prezant avek zot. Sa Landrwa dan li menm i annan bokou konsern. Ki mwan koman *MNA* mon tre konsernen Mr Speaker.

Ler nou koz lo leta sa landrwa ek bann zanfan ki pe grandi, Mr Speaker mon ti ava kontan remersye Minis Rangasamy ek son lekip pou sa travay ki zot pe fer pou pli byen konpran sa bann ka. E rod solisyon pou amelyor sa

sityasyon, ki'n egziste pandan plizyer lannen anba Gouvernman presedan.

Mr Speaker, mon'n osi ganny sans asiste plizyer meeting ek bann zabitan. Sirtou lo kote lakaz.

Mr Speaker mon osi rekonnet presyon lo sa Minister Lakaz ek later. Menm sa, mon ankouraze pou vwar ki dan mon distrik i annan en lalis bann zabitan ki pe aktivman fer zot peyman azour.

Avek sa nouvo lespwar dan Sesel nou asire ki proze *ex-Kangard* i ava konplete. E sa dan li menm i ava kapab soulaz nou bann fanmir ki'n espere pou sitan lontan.

Mon osi swete ki Minister Later i ava ganny en dyalog fran e senser avek bann zabitan kot *ex- Société de Logement*, parey nou dir Kanper, en dyalog ki pa politize parey zot in toultan tande dan lepase.

Mr Speaker, Prezidan dan son diskour in donn lespwar lo leta lekonomi pei. Menm si in annan bokou defi. Sa Gouvernman in kapab navige. E ozordi nou pe vwar amelyorasyon, konpare avek kot nou ti ete an Oktob 2020.

Mr Speaker, koman en endividi mon kapab konpran tre byen ki Sesel koman en Pti

Leta Zil, i depan bokou lo lenportasyon.

Me parfwa mon demann mon lekor aköz bann ki ti pe govern nou pei, pa'n devlop nou bann zil depi lontan?

Mon mazinez ozordi nou ti ava kapab koup lo bann keksoz ki pe *drain* nou bann deviz. Mon santi pou en lager difisil pou fer desann pri lavi parey bokou nou ti ava swete.

Resaman mon ti fer konversasyon avek enn mon zabitan, ki travay kot *Land Marine* pou en pe letan. Kot in fer mwan ganny en konpran ki bann pri ki pe mont dan *container* e son *freight*. E sa li menm li mon krwar ki bann biznes *definitely* i zet sa lo kliyan. E la kekfwa la mon santi kekfwa Gouvernman ti ava kapab regard en pe ladan.

Me selman dan en kote, biznes osi nou kapab dir zot pe *struggle* deor. Sansan Mr Speaker zot pou faid.

Mr Speaker, mon kontan ki mon Prezidan in mazin al lo laliny pou revwar saler. Sa dan li menm i ava kapab soutenir, amelyor kalite lavi bokou bann fanmir ki ankor annan ki pe travay tre dir.

Me parfwa Mr Speaker, sa saler minimonm pa ase pou kapab ariv ziska le 15. *COVID* dan li menm in vin detri

lemonn. San realize ki in osi anmenn bokou lesan, e serten loportinite pou re aziste nou fason fer.

I annan ki'n sezi li lo semen biznes. E vwar zot fason fer. Menm adapte avek bann restriksyon.

Mr Speaker nou santi ki tre byen, nou pou kapab respir loder laliberte. Parey ler mon ti pe ekrir mon *speech* pa ti ankor anons bann sanzman ki'n arive.

Me nou osi fodre pa zanmen oubliye kot nou sorti. Kwa ki nou kapab re aranze? Kwa ki ou koman en endividi nou kapab amelyore?

Bondye in avek nou dan sa parkour pli difisil ki lemond in deza eksperyans. Me pou sa fodre pa ki zanmen nou oubliye ki pou dir mersi. E mon kontan ki Prezidan in fer sa ozordi Mr Speaker.

Akoz sa enn ki pli o, li menm li ki'n kit sa monn. Mon mazin osi bann ki'n kit sa mon'n Mr Speaker, avek sa malad. E la nou pou profite osi pou mwan anvoy mon senser senpati avek bann dimoun dan mon distrik, ki'n perdi sa enn ki zot ti pli kontan. Ouswa ti pli pros avek zot.

E nou remersye Bondye pou son benediksyon e proteksyon divinn lo sakenn de

nou ki'n leve ozordi. E ankor pe viv isi ba.

Mr Speaker, an 2021 avek lapwentman nou nouvo DA Ms Lilianne Biong, nou'n get bokou langaz pou travay an drwat kolaborasyon, pou etabli en fondasyon solid pou nou distrik.

Sa in vin avek en seri vizit, *meeting* ki nou'n fer avek diferan Lazans dan lakominote. Me parey nou konnen bann restriksyon COVID in met retar pou bann *meeting* piblik ki nou ti'n prevwar lannen pase.

Plaisance i resevwar en alokasyon R200 mil pou bann proze kominoter. Sa in promet nou fer 2 proze semen ki'n benefisye 2 group fanmir ki ti pe espere pandan plizyer lannen.

Mr Speaker mon santi ki sa size *wayleave* i merit ganny met lo latab. pour nou diskit lo li pli bon fason pou adres bann konsern ki annan pou fer avek bann demars pou Gouvernman negosye *wayleave*, pou proze pou benefisye lakominote.

Pou sa lannen 2022, sa alokasyon in ogmante sorti 200 mil pou vin 700mil. Depi komansman lannen nou'n demare kot nou pe target bann landrwa kot napa akse semen, kot bann landrwa ki'n fini demarke.

Bann proze parey in remarkab bokou dan nou distrik Mr Speaker. Bokou dimoun i ankor pe ganny difikilte ganny *access* pou ariv se zot dan bann kondisyon difisil e menm parfwa tre danzere.

Nou swete ki sa lannen atraver sa larzan ki nou'n gannyen, nou ava kapab amelyor sa sityasyon.

Lo sa not Mr Speaker, mon ti a kontan remersi Minister Gouvernman Lokal, son Minis, *PS*, ek son bann zofisye pou zot bon korporasyon pou asiste distrik Plaisance pandan lannen ki'n pase.

Zot in demontre en bon nivo profesyonnalizm e dezir pou transform kalite lavi nou bann zabitan. Nou swete sa lannen nou ava kontinyen lo sa menm laliny, pou anmenn plis devlopman ki pou benefisye lakominote Plaisance ek sosyete an zeneral.

Mr Speaker mon sezi sa lokazyon pou adres lo lape ek sekirite dan nou pei. Tou dernyerman nou'n vwar serten lensidan ki regretab pou dir. Sa bann keksoz nou ti souvan vwar ti pou ariv dan bann lezot pei etranze. Me malerezman larealite ti la dan nou pei.

Mon felisit bann zonm ek fanm dan liniform ki pe ede

gard nou souverente an pe e an sekirite.

Mr Speaker, la mon ti ava kontan lans en lapel anver Lapolis, pou vin pli serye lo kote *community policing*. E entansifye patrol.

Dan mon distrik Mr Speaker, dimoun i ankor pe viv dan kosmar akoz voler. Dimoun i travay dir i fer sakrifis. Al rod zot zournen, ler zot tourn kot zot lakaz, lakaz in kase. Keksoz in manke.

Dan serten lenstans ler zot al kot Kordgard, me dan plas ganny en rekour, zot pa tann naryen. E vol i kontinyen.

Ziska ki tan nou pou kontinyen koumsa Mr Speaker? Mon propoze ki *Leadership* Lapolis kekfwa i ava fer en dyalog avek Lasanble kot nou ava kapab demann zot kestyon posib.

Akoz souvandfwa bann viktim i vin tap nou laport *MNA* pou rod en konsolasyon. Nivo krim pe ogmante e i vin pli sofistike.

In ler pou Lotorite revwar lafason pou dil avek bann vagabon e voler. Sirtou bann sispe byen koni dan lakominote.

Fleo drog pe ronz sa pei, ki apel eroin. I pe fer bokou fanmir viv en kosmar. Bokou paran i mars avek larm dan zot lizye

akoz zot zanfan i tonm dan sa drog e bandisite ki apel eroin.

Me dan mon distrik mon komans soulaze pou vwar bann zenn ki pe servi bann servis sipor ki Gouvernman i met a zot dispozisyon, pou ed zot *rehabilitate*.

Mon ankouraz tou bann ki pe pran zot tretman serye, e ki pe re fer zot lavi, e menm retourn *back* dan lanplwa, pou kontinyen. I pa fasil, me napa naryen ki enposib mon bann ser ek frer.

Lot pwen ki mon ti ava kontan al an bref lo la Mr Speaker, i nou servis lasante. *COVID* parey mon'n dir pli boner in teste nou rezilyans koman en pep. E nou osi kapasite pou adapte dan en sityasyon difisil.

Mon salye e senserman remersye tou bann profesyonnèl lasante, tou bann support staff. Depi sa *porter* dan lanbilans. Ki souvandfwa nou war zot premye. Bann asistan ners devoue. E san oubliy bann ki fer *house keeping* pou fer sir ki tou zafer i annord e prop.

E la mon tir mon sapo ek bann ners ki'n sakrifye zot letan. Sirtou dan sa konpanyi vaksinasyon. Mon ser ek frer dan servis piblik. le moman in arive kot transformasyon in

demare. I zot sans la pou partisipe. Donn zot pwennvi e kontribye pou amelyore dan lavi sa pep.

I annan bokou defi. me nou pei i bezwen bon servis piblik. ou ki'n pran sa responsabilite, fer li avek ou leker patriyotik pou bouz Sesel devan. Aret ekout bann ki pe ankouraz ou pou fer sabotaz ou fer politik dan loubraz.

Sirtou bann ki'n byen raisir zot lekor. Le moman pou tir lanmen lo fren a-men in arive. Demontre ou abilite. E la mon le dir avek nouvo Sef Biro Servis Piblik Mrs Shella Mohideen.

En madanm ki mon'n pas dan son lanmen koman enn son etidyan. Mon napa dout ki i pou anmenn en kontribisyon valab dan nou servis piblik, ki'n tir pouri ek politik. Nou swete war en bon transformasyon ki Seselwa i merite.

Mr Speaker lazènes mon distrik in pli anbisye ki zanmen pou pran bann loportinite ki vin ver zot. La mon pe koz lakantite zenn ki mon rankontre ki determinen pou annan nou prop lakaz, swa zot prop bout later.

Bann zenn ki anbisye pou al etidye plis pou devlopman zot karyer. E bann ki osi annan nide biznes a ker. Se sa mesaz

ki lazenes Plaisance pe koze ozordi.

Wi mon'n remarke osi ki i annan bann ki bezwen sipor pou avans devan. Se la kot Biro *MNA* i antre ek bann Lazans. Parfwa wi i pa fasil pou serten kominikasyon.

Selman si demann mon konpare ek ler mon ti fek komanse. Mon'n war en gran amelyorasyon. Me selman ou santi sa lefe. E en latitud pou bezwen ganny adrese avek sa nouvo *Public Service Bureau*.

Lot *challenge* dan distrik ki mon ti ava kontan ki Gouvernman osi i adrese Mr Speaker, i sa *district boundaries* ki parfwa i ankor en pe konfizan.

Mon ava donn ou en legzanp Mr Speaker. ki manter *GS Pillay* i tonm Roche Caiman, selman Kordgard Mont Fleuri i tonm Plaisance? Konmsi mon krwar sa i en bout dezord ki Minister konsernen i merit revwar e *advice* nou. Prenon kont ki nou pa anvi kit personnalite.

Avan mon konklir Mr Speaker, mon ti ava kontan remersye tou dimoun ki'n siport mon pandan lannen 2021. La mon kriy bann dimoun volontarya. Bann biznesmenn.

I pa'n en lannen fasil, me selman nou'n kapab fer de bout zwenn pou nou distrik.

Mon osi rann lapel ek bann zabitan pou partisip pli aktiv dan lavi kominoter. Nou'n demare lannen pase. Plis zepol i zwenn ansanm. E sa i fer en lafors pli gro.

Mon remersi ou menm Mr Speaker pou tou ou sipor e konsey. Mon osi remersi Leader Gouvernman Biznes Onorab George pou son gidans. E san oubliy nou Deputy Speaker ek nou *Chief Whip* ki fer sir ki bann nouvo Manm, i ganny sa bon gidans, pou fer en bon travay.

E byesir mon bann fer ek ser dan *LDS Caucus*. San oubliy mon bann Komite Lasanble ki mon asiz lo la. Espesyalman Komite *COGA* ki nou'n fer en bon travay lannen pase.

E la mon le remersi nou Chairman ek Vice-Chair pou zot gidans. Ankor enn fwa Mr Speaker, ler ou nouvo ou pe aprann ou bezwen dir mersi.

Finalman pou terminen, mon ti a kontan lans en lapel avek tou Seselwa spesyalman mon distrik byeneme Plaisance. Annou inifye pou transform nou pei seri Sesel.

Lemoman in arive, plis ki zanmen pou sakenn de nou pran nou responsabilite e met an pratik nou bann

fondamantal *duties*. Parey Lartik 40 nou Konstitisyon i demann nou.

Annou transform nou pei kot nou promouvwar bann bon valer lavi, kot i annan bann bon gouvènanans ek respe pou drwa sak endividi i ganny respekte.

Kot lape ek stabilite i reste nou primordyal. Avek sa Mr Speaker mon a dir mersi.

(APPLAUSE)

MR SPEAKER

Mon ava dir ou mersi Onorab. E nou ava pas lo prosen entervenans. Repons Onorab Sylvanne Lemiel.

HON SYLVANNE LEMIEL

Mersi Mr Speaker. Bonn apre midi Mr Speaker. Tou mon bann koleg Manm Onorab. Tou bann dimoun ki a lekout. Espesyalman zabitan Distrik Anse Royale.

Mr Speaker, sa diskour lo Leta Lanasyon 2022, in fer mwan fer bokou refleksyon, lo tou sa ki'n arive depi apre dernyen eleksyon 2020.

‘I annan sa dikton ki dir ou, ‘fodre ou met ou lipye dan soulye ou kanmarad pou ou konnen ki i pe santi, oubyen manner ou pou marse dan sa soulye’.

Enn, fodre ki sa soulye i ou grander, pa ni pli gran ni pli kourt. Depi le 28 Oktob 2020 *LDS* in met son lipye dan sa soulye ki apel diriz en pei. E depi sa, mon'n remarke ki tou sa ki pa ti bon dan letan ki zot ti dan lopoziyon, ozordi i bon pou zot enplimante ler zot ki pe dirize.

Letan ki Prezidan Wavel Ramkalawan ti *Leader* Lopoziyon. Li avek son bann asosye ti touzour pe met presyon lo Gouvènanman o pouvwar. Ennler ou ava krwar i ti oule Gouvènanman i fer mazik e vin avek bann solisyon pou tou problem ki san leksepsyon.

Zot ti met presyon lo Gouvènanman pou rod tou fason pou amelyor lavi pep Seselwa. E sa letan, Gouvènanman ti bezwen akseler son zefor. E esey rod diferan solisyon sirtou pou sa problem pri lavi.

Bokou keksoz ti ganny fer. Tel ki donn ogmantasyon saler, entrodwi bann diferan sibvansyon, met plis komodite esansyel lo lalis prodwi de baz kot *STC*, ki pa ti ganny takse e plizyer lezot ankor.

Dimoun ki ti pe ganny en saler pli ba ti kapab ganny en pti soulazman. *LDS* ti vin avek en promes letan eleksyon. Sa se pou fer desann pri lavi dan 100

zour. Oli sa bann zoli promes ki ti ganny fer dan letan kanpany? Oli sa plan? Pep Seselwa i ankor pe espere.

Ozordi anba en Gouvernman LDS serten marsan pe konplent e pe dir ki zot pa pe ganny akse avek prodwi ki lo RRP kot STC. Problem pou zot ganny lafarin pou vann avek bann dimoun, ki fer zot pti biznes *bakery*, eksetera.

STC pa pe vreman zwe sa rol *anchor price* ozordi. I pe gradyelman bouz dan direksyon an deor son manda. E zot pe sarz konsonmater *full price* lo komodite. E sa pe vreman afekte konsonmater ki ti ganny sa pti soulazman atraver fer zot konmisyon kot STC.

Sityasyon pe montre nou ki sa ki ris pe vin pli ris dan Sesel. E sa ki pov pe vin de zour an zour pli pov. Oli sa bann stratezi ki LDS ti pou met an plas pou fer desann pri lavi, parey zot ti dir avan eleksyon?

Mr Speaker, sityasyon lapovrete pe vin pli alarman isi Sesel. Menm si pa nou tou ki oule admet, e serten i menm dir ki napa mizer isi Sesel - san realize ki i annan fanmir ki pe manz zis en repa par zour aköz i napa pou ganny plis ki sa.

Mon rapel pandan dernyen kanpany eleksyon

Prezidansyel dan en deba televize, Mr Ramkalawan ti dir avek *ex*-Prezidan Faure. Ki kot in pase dan bann distrik in war bokou mizer e kondisyon ki pa akseptab ki serten dimoun ti pe viv ladan.

Se pou sa ki i ti demann pep Seselwa pou fer li konfyans e vot pou li vin Prezidan. E donn LDS en mazorite dan Lasanble pou li kapab travay e rezourd zot problem.

Me, Mardi le 22 Fevriye 2022, 16 mwan apre ki pep Seselwa in fer li e LDS konfyans, i vin fer son dezyenm diskour Leta Lanasyon e dir pep Seselwa ki Leta pa la pou fer tou pou zot.

I paret mwan ki lanmen Mr Prezidan pa lo pou pep Seselwa. E in dekonekte avek sityasyon reel son pep. Ser pep Seselwa, sa sityasyon ki nou ladan ozordi se bef dan disab sakenn pe vey son lizye. Mon pou enplor Mr Prezidan e son Gouvernman, pou silvouple zet en regard pli profon lo sa bann dimoun ki vreman bezwen led e lasistans. Aköz bokou sa bann dimoun i bezwen Leta pou ed zot.

Annou atrap zot lanmen, e met zot lo sa semen ki apre zot a kapab kontiny zot larout san lasistans Leta. Ozordi bokou keksoz pe pase dan sa pti pei

Sesel. Pep Seselwa pe ganny dir pou aret negativ e inifye. Wi Mr Speaker, mon tout afe dakor ek sa akoz linite se lakle progre.

Negativite pa pou anmenn nou lwen. San linite nou pa pou progrese. O kontrer nou pou regrese. Be lekel ki devret pe anmenn sa vre linite parmi pep Seselwa?

Mr Speaker, in ler pou nou tou dan sa pei, depi Prezidan ziska sa endividi dan nou bann kominote. Pou pa zis pres linite, me annou viv sa vre linite dan Sesel. In ler pou aret abes Seselwa ki pe viv isi Sesel. E ki pe travay tre dir, lannwit koman lizour, botan koman move tan pou anmenn plis devlopman dan sa pti Sesel.

Annou aret imilye dimoun e mank respe pou dimoun. Apre nou oule ki tou dimoun i respe nou. Ozordi dimoun pe viv dan lafreyer. Menm si nou pa kontan, dimoun pe viv dan lafreyer.

Serten dimoun i per pou koze. Per pou kritike e dir kot ki mal pangar zot ava ganny entimide oubyen menm ganny met dan en kaso.

Mr Speaker, si Mr Prezidan i vreman oule linite parmi pep Seselwa, fodre ki i *'really walk the talk'*. Pa zis pres linite me annou pratik e viv sa vre linite. Si sa i arive, i pou war

ki i pou kapab ganny plis korperasyon e kolaborasyon tou Seselwa.

Letan mon fini lo sa size linite mon oule tous sa topik la demokrasi ki Prezidan in koz lo la dan son diskour. Mon'n ganny pwennvi plizyer dimoun lo sa diskour. ki mon ti ava kontan fer resorti enn de.

Serten dimoun in dir ki zot pa'n ekoute. Sa ki'n kapab ekoute zot dir ki napa bokou keksoz ladan. Serten in demann mwan, be ki vre leta nou Nasyon akoz pa'n dir nou?

Me pwennvi serten zenn e lezot dimoun en pe pli aze in fer resorti ki zot per pou la demokrasi isi Sesel. Akoz zot santi ki la demokrasi pe komans ganny menase. E si nou pa fer sir, i pou pti a pti mor. Akoz pli ale se la diktatir e lafreyer ki pe rennyen dan nou pei.

Nou bezwen fer sir kote nou pe ale avek sa bann tel latitud. Akoz sa, pou anmenn bokou divizyon dan nou pti pei. Wi nou bezwen lord e disiplin dan nou pei. Me annou pa servi nou pouvwar pou enpoz nou lotorite lo sitwayen. An krwayan ki sa bann dimoun ki ganny afekte pa pou reakte.

Ozordi plis ki zanmen, preski tou konversasyon telefonik i ganny ekoute. Wi Mr

Speaker, telefonn pe ganny ekoute ! Menm si Prezidan i vin dir isi dan sa Lasanble ki napa okenn telefonn ki pe ganny ekoute.

(Off-Mic)

HON SYLVANNE LEMIEL

(Taler ou ava ganny ou sans koze!)

Prezidan in osi koz lo rod laverite. Mansonz lo *Facebook* eksetera. Be lekel ki ti komanse tousala? Mansonz e kalonmni, lekel ki'n fer plis lo zot kanmarad?

Mr Speaker, mon poz sa la. I vreman fermal ler dimoun I fer sa bann keksoz lo ou. Me par kont ler ou ti pe fer lo ou kanmarad ti gou?

Ozordi medya pe ganny menase. Zot pe ganny dir ki pou fer, me ler zournalis pe sey lenformasyon, zot ganny dir ki la zot pe al en pe tro lwen. Be ki manner Seselwa pou konn laverite? Ki manner ki mansonz pa pou kontinyen sirkile? Mwan mon pou ankouraz bann zournalis pou kontinyen rod laverite. Menm si par ler zot ganny imilye.

Mr Speaker, Seselwa i en Nasyon ki debourye e tre fyer zot travay. Wi, travay dir ti

komans par nou bann paran e gran paran depi letan ki *PWD*. Sa bann ki'n eskente kot gran blan, lo zil eksetera, pou kapab ganny zot lavi.

Mon salye e rekonnet zot travay dir. E mon oule remersye zot pou tou sa bann travay dir e nob ki zot in fer letan zot ti kapab.

Mr Speaker, mon konstate ki sa lanmour pou travay i ankor la. Seselwa i en Nasyon ki travay tre dir. Pe enport si i pe travay Sesel oubyen aletranze.

Mwan mon pou felisit tou Seselwa isi Sesel, ki pe travay tre dir. E partisip dan devlopman nou pti pei. Prezidan in dir ki i annan travayer servis piblik ki zot lipye dwat i lo fren e lanmen gos lo fren a-men. E zot pe ganny menase.

Mwan mon pou konsey zot sa bann travayer ki tonm dan sa kategori ki Prezidan in dekrir. Pou tir sa lipye lo sa fren e sanz zot gir. Si zot ti dan ler, met dan segonn oubyen trwazyenm, akseler en pti pe, montre zot vre potansyel e delivre sa bon servis a pep Seselwa.

Ou sa enn ki ti lo *URS* ki'n sanse pou kapab ganny en travay anploye. E menm fer sa zefor pou annou ou prop biznes,

mon dir ou felisitasyon. Kontinyen travay pou kontribye dan devlopman ekonomik Sesel.

Par kont sa enn ki ti lo *URS* oubyen menm ki'n perdi en travay, Mon ankouraz ou pou kontinyen rode. Nou'n ganny dir ki travay i annan. Mon espere ki sa lannen 2022 ou a kapab reisi.

Prezidan dan son diskour in koz lo lafanmir. Kot paran i devret pran zot responsabilite e donn zanf an bon komansman. Sa i byen.

Nou koman paran ler nou'n met en zanf an monn, nou devret konn nou responsabilite. Nou bezwen montre nou zanf an sa bon savwar viv, savwar fer e osi annan sa savwar et.

Nou paran, nou devret en model pou nou zanf an. Ou pa kapab viv an delenkans, pa okip ou zanf an e krwar ki sa *teacher* oubyen lezot dimoun, ki pou bezwen pran ka avek ou zanf an. In ler pou nou tou paran revwar nou fason viv avek nou zanf an.

Kot ki mal annou aranze e demontre sa vre sans responsabilite anver nou zanf an e nou lakour.

Dan son diskour, Prezidan in tous briyevman lo lasante, kominote e osi kriminalite. Mr Speaker, en kominote ki an

bonn sante e i anmenn bokou lazwa de viv pour tou dimoun ki reste e form parti.

I tre enportan alors ki tou dimoun ki form ki parti en kominote parey dan bann *housing estate*, pou zot pratik bon vwazinaz. E fer sir ki zot landrwa i enn ki an sekirite.

Akoz ozordi nou pe vwar ki la kantite krim sirtou kas lakaz e vole in ogmante konsiderableman. Minimiz tapaz lo bann *estate* e pran ka avek lanvironnman ki otour zot.

Zet en bon regard lo bann zanf an. Pa les zot tousel oubyen avek dimoun ki zot pa konnen aköz, ozordi labi lo zanf an pe ogmante.

Dimoun pe pran son kanmarad otaz. E bokou lezot nwizans pe arive dan nou bann kominote.

Alors mon demann tou dimoun pou silvouple vin pli vizilan. E raport okenn sityasyon ki zot vwar pe arive dan zot kominote koman i komanse.

Me par kont si Leta pa donn nou vre *Leadership*, vre direksyon. Nou pa pou kapab war sa bann kominote nou anvi war. Fodre Gouvernman i arete avek sa *pattern* leskiz e pran son responsabilite.

Ser zabitan Anse Royale, lannen 2021 in en lannen kot

bokou zot in pas dan bokou difikilte. Bokou fanmir in pas dan dey. Swa en paran, en frer, en ser, en msye, en madanm oubyen en lot manm fanmir pros in kit zot. Mon senpatiz avek zot dan tou sa bann difikilte ki zot in fer fas avek.

Bokou zot pe travers bann moman difisil, swa zot in perdi travay, swa bezwen aret travay akoz en maladi oubyen zot pe fer fas avek bann lezot sirkonstans lavi. Dan tou sa, mon reste touzour la akote zot pou aport mon sipor e soutyen.

Ler mon regard nou bann zenn, mon vreman konsernen avek sa ki mon war pe pase. Sa fleo drog e lalkol pe afekte bokou zot. Mon oule demann zot pou leve, debout for e pa les sa bann move lenfliyans afekte zot lavi.

Pou bann zenn ki pe fer byen dan lavi, mon dir zot felisitasyon, kontinyen lo sa bon semen. Kontinyen pran lavi o serye. E donn lanmen atrap bann ki'n tonbe e esey lev zot.

Mon reste akote zot bann zenn an ka ki zot bezwen mon sipor. Mon rekonforte ler mon war bann ki'n apros mwan e rod mon led, swa pou asiste zot pou ganny en lanplwa oubyen lezot kalite lasistans. Mon vreman apresye ozordi pou war zot pe

reisi e zot pe al ver en bon direksyon.

An sa ki konsern nou bann etidyan lekol, mon oule enplor zot pou reste serye e *focus* dan zot letid. Mon oule profit sa lokazyon pou felisit tou bann etidyan ki'n travay dir e fer byen zot legzanmen Nasyonal e *IGCSE*. Mon swet zot bonn sans dan zot fitir parkour ki zot pe anbark lo la.

Mon oule osi sezi sa lokazyon pou felisit bann paran ki'n la akote zot zanfand, e donn zot sa sipor total dan zot letid. Akoz se atraver zot zefor e komitman dan letid zot zanfand, ki zot in kapab fer tre byen. Kontinyen donn zot zanfand sa sipor dan pos-segonder e dan zot lavi an zeneral.

Mon enplor bann *Leadership* Ledikasyon pour rod tou loportinite posibil. Pa blok lorizon nou bann zenn. Annou fer sa, pou ki nou bann zenn i kapab devlope e avanse.

An terminan Mr Speaker, mon demann tou zabitan Anse Royale pou nou reste ini e kontinyen travay dir pou plis devlopman dan nou distrik pandan sa lannen 2022. Ki Bondye beni e protez zot. Mersi Mr Speaker.

(APPLAUSE)

MR SPEAKER

Mersi Onorab. Prosen repons i pou Onorab Naddy Zialor.

HON NADDY ZIALOR

Mersi Mr Speaker. Koleg Onorab. Lepep Seselwa, bonn apre midi.

Tre souvan letan i annan en nouvo lannen. Sakenn nou koman en imen nou fer en pti tour lorizon ver en refleksyon lannen ki'n pase, lo kote ki nou'n annan bann pwen feb, kote ki ti nou pwen for. Kwa ki nou'n akonpli. E ki direksyon nou pran pou sa lannen ki devan nou.

Mr Speaker, lepep Seselwa, se sa fason pli senplifye. E menm fason pli anlifye ki mon rekonnet en diskour Leta Lanasyon.

Le 22 Fevriye. Sesel in ankor enn fwa vwar en Sef Deta ki'n vin devan nou koman en dirizan fran. Kot in senpleman koz avek lepep Seselwa lo vre leta nou pei.

Wi vre leta nou pei. Kote nou ti ete? Ki defi nou'n fer fas avek koman en pei? Kwa ki Sesel in akonplir anba son *leadership*? Me pli enportan ki direksyon nou pe ale? E ki direksyon i pou anmenn nou a la venir?

Tre souvan sanzman dan Gouvernans en pei i parey en

zansan ki'n ne. i grandi, i pas son staz adolesan. Avek sipervizyon son paran, e pli tar dan son laz mazer i swazir son prop desten.

Sesel in grandi anba en Gouvernans prensip en sel parti pou plis ki 40an. E dan son demokrasi modern lepep Seselwa dan son mazorite in fer en swa. En swa sanzman. Pou nou pran en lot direksyon Gouvernans. E la aprezan i enportan ki nou regard lavenir.

Mr Speaker, mwan mon fyer, e tre fyer ki mon ti form parti pou anmenn sa sanzman Mr Speaker.

(APPLAUSE)

HON NADDY ZIALOR

Me sa ki enportan ozordi. Sa ki tre enportan se prezan mwan avek ou, nou, nou bezwen travay pou anmenn sa vre transformasyon ki Sesel i bezwen.

Me par kont, nou pa'n la pou 40an. Nou pa'n la pou 5an. Me nou'n la pandan 15 mwan. sa ki mwan mon apresye se ki mazorite Seselwa i konpran ki transformasyon nou parti e Prezidan i anvi anmenn Sesel.

Ozordi mazorite Seselwa i annan en nouvo fason vwar keksoz. En *mindset* ki pe

transformen baze lo nou realite. E i annan en balans ant la realite e lekspektasyon.

En fason dousman, dousman nou pe anmenn Sesel ver sa nouvo mezir. E sa, sa pou sa arive se mantalite nou pep ki bezwen sanze.

Aprè midi mon ti ava kontan redir en keksoz ki nou'n toultan dir. Nou koman bann dirizan, fodre ki nou konnen keler ki nou fer politik. E kan ki nou edik nou pep pou ki nou premye nou ava pe ede pou anmenn sa transformasyon ki pei i bezwen.

Me pli enportan, ki nou fer koman bann dirizan pou ki nou pep i vin en pep endepandan. En pep ki viv lib. Me pli enportan en pep ki pa depan selman lo Gouvernman. Sa i krisyal dan ver leta Lepep Seselwa.

Mr Speaker, mon ek ou nou vwar serten latras fernwar ki pe met serten *task* dan nou larout koman en pei e en Gouvernman. Nou osi konnen ki i annan bokou keksoz pozitiv ki'n arive pandan sa dernyen 15 mwan ki nou'n annan en nouvo *leadership* Mr Speaker.

Annefe si ou permet mwan, lakonplisman Wavel Ramkalawan koman Prezidan Larepublik Sesel, i lakonplisman Sesel e tou Seselwa Mr Speaker.

Letan lo lasenn enternasyonal mon vwar nou paviyon ble, zonn, rouz, blan, ver, reprezante par Wavel Ramkalawan ki pe sanpyonn e *echo* lakoz lanvironnman e lekonomi. Mr Speaker i fer mwan fyer koman en Seselwa. Parske sa i lakonplisman Sesel Mr Speaker.

Wi, nou'n fer sanzman. Me nou bezwen kontinyen travay pou anmenn sa transformasyon. Koman en pti pei, nou'n toultan ganny regarde koman en *welfare state*.

Me mwan mon'n realize ki enn parmi nou lakonplisman pandan sa 15 mwan, se ki nou'n reisi fer en travay kot lakantite dimoun ki ti pe depan lo *welfare* in redwir plis ki 50 pousan.

An kontan restriktirasyon ki pe kontinyelman arive dan Lazans Proteksyon Sosyal, in permet nou realize ki byennet sa pep pa pe ganny mezire lo lakantite dimoun ki depan lo *welfare*.

Me plito *mechanism* ki ganny met an plas pou ki nou kapab fer sa dimoun pas dan en tranzisyon. E pli tar *empower* li pou vin endepandan.

Par kont, i reste bokou pou fer. Mon konpran ki i annan serten travay ki pe kontinyelman ganny fer, pou ki

i annan bann restriktirasyon pou permet sa Lazans vin pli dinamik.

E la mon pa pou kapab delivre mon diskour san ki mon fer mansyon lo sa *Scheme Carer*.

In ariv en moman pou nou fer serten refleksyon lonterm. Se ki eski en *carer* i merit kontinyelman ganny regarde koman en *Scheme*? Me ouswa plito - eski pa'n ariv sa moman pou nou formaliz li, E fer li vin en *full time employment*. Sa I ava permet sa paran ki pe travay avek son zanfan dezabilite, pou li osi benefisyè avek en *loan* labank ouswa en *loan HFC*. Dan lespri fer sa paran vin endepandan Mr Speaker.

Mon koz dan sa fason se pa akòz nou anvi ki sa bann dimoun i kontinyelman ganny regarde konman bann dimoun vilnerab. Me senpleman nou anvi ede pou transform nou pei e *empower* nou pep. Depi sa enn ki a la baz ziske sa enn ki pran desizyon Mr Speaker.

Egalman dan lavenir nou merit annan en konversasyon lo bann mezir ki an plas an ki konsern '*one-size fits-all*, pou bann dimoun ki pe ganny serten benefis dezabilite oubyen envalidite.

Par egzanp, eski en dimoun ki *bedridden* avek en dimoun ki *physically challenged*, avek en dimoun ki annan en kondisyon lasante sever, i merit pe ganny mezire a la baz menm benefis? Sa i bann konversasyon ki mon ti ava kontan koman en pei nou fer li pli tar.

Letan ki mon pe koz lo bann keksoz pozitiv e transformasyon ki'n arive e ki pe arive Sesel, mwan personnelman mon'n vwar ki par egzanp in annan bokou *awareness* e vizibilite an ski konsern bann dimoun ki otreman kapab.

Ki swa an se ki konsern zot dwa e zot byennet. Ouswa loportinite egal e *empowerment*.

Zis isi menm dan sa Lasanble Mr Speaker, in annan Lalwa ki'n pase pou fer sir ki letan Lalwa i pase nou enkorpor enklisivite.

Pou asire, wi Mr Speaker. Pou asire ki sa transformasyon i arive. E la mon mazin lamannman dan *Physical Planning Bill*. E egalman dan Lalwa Zidisyer.

E tre byento, parey Prezidan in anonse. Pou osi annan Lezislasyon lo *Hate Crime*, ki mon prezimen pou osi anvlop sa group dimoun.

Mr Speaker, depi komansman mon diskour mon'n dir ki nou'n fer sanzman. Me la i reste pou nou travay pou anmenn sa tranzisyon e transformasyon.

Mon anvi fer resorti ki tranzisyon e transformasyon pe arive. Pe arive parske zis dernyerman la lannen pase, in annan 8 dimoun ki otreman kapab ki'n swiv en formasyon.

E ki'n *graduate* avek en sertifika ! Premye fwa, premye fwa avek en sertifika ! E menm ganny loportinite pou zot al swiv zot kou lo nivo pos-segonder. Ouswa ganny plase dan en lanplwa formel.

Sa i bann tranzisyon pozitiv e transformasyon pozitiv ki pe arive Sesel.

(APPLAUSE)

HON NADDY ZIALOR

Mon profite pou mwan felisit bann diferan *partners* pou bann tel linisyativ. Sepandan, mon osi anvi profit lokazyon pou ankouraz sektè governmantal, sektè prive pou ler bann tel program i tap lo zot laport, pou zot vin devan e ankouraz sa bann tel diferans.

Donn nou, donn sa bann dimoun sa loportinite pou zot devlope. E la mon mazin detrwa zanmi ki otreman kapab ki'n

apros mwan. Par egzanp Mary lo Praslin. Ruben. Jean-Eve Au Cap.

Ki zot osi zot pe *echo* pou ki zot osi sa transformasyon e tranzisyon i tous zot personnelman Mr Speaker.

Permet mon fer en pti refleksyon. Letan mwan avek ou nou leve dan bomaten. Byen bomaten kok sante, e nou retourn lakaz soley kouse.

Satisfè ki nou'n debrouye e travay pou anmenn sa dipen lo latib dan lakour. E nou'n satisfè ki nou'n kontribye ver nou pansyon pou lavenir.

Ouswa menm satisfè ki nou'n kontribye anver *tax* pou garanti ledikasyon lezot zenerasyon ki pe vin apre nou Mr Speaker. Sa i fer nou fyer koman en Seselwa. Se sa transformasyon ki nou pe koz lo la.

Pli gran transformasyon ki fer mon fyer, ler nou koz lo *URS*. Zis tar lannen pase mon ti vremen apresye enn de dimoun ki mwan menm mon letan mon ti kot lanplwa. Mon'n plas zot lo sa program.

Par egzanp letan mon al kot Por, mon vwar sa zenn ki ti lo *URS field technician*. Perseverance ozordi i pe travay koman en *Security Officer*. E in ganny anploye.

Sa i en transformasyon Mr Speaker. I en tranzisyon Mr Speaker.

Letan mon al kot *X-ray* e mon vwar sa fiy ki ti ganny plase lo *URS* pou plis ki lan, i ganny anploye koman *record clerk*. Sa i transformasyon Mr Speaker.

Letan mon al Port Glaud e mon vwar sa 2 fiy ki ti lo *URS* pou plis ki 2 an koman *general helper*. Ozordi zot in ganny bagaz e zot ganny anploye koman *teacher assistant* avek Minister Ledikasyon. Sa i transformasyon Mr Speaker.

Letan mon vwar mon zanmi May-Lise ki li i annan problemn tande. I ti komans lo *URS* Baie Lazare koman *bus assistant*. Ozordi i anploye malgre son difikilte. Sa i transformasyon Mr Speaker.

Pandan ki mon pe koz lo lanplwa. Mon anvi profite pou felisit tou travayer kot Departman Lanplwa e sa Departman, pou zot kre sa platform pou ki nou kapab annan en pep travayan. E osi loportinite pou travay.

Sepandan lefe i reste ki i annan ankor serten defi ki nou pe fer fas avek. Ouswa ki pe afekte bann anplwayer, anplwaye, ou menm sa dimoun ki pe rod en lanplwa.

La ki mon'n aprann ki sistenm *LMIS* in ganny met an plas, nou swete ki sa problemn kot bann *post vacant* pa an *alignment* avek kalifikasyon. Ouswa saler ki pa pe neserman ankouraz Seselwa pou *apply* bann pozisyon, i ganny dil avek enn fwa pour tou.

Sa i ava elimin sa persepsyon ki i annan serten mannev ki pe ganny fer, ki ti pe ganny fer, pou ki i kre lespas pou bann - se pou serten sekter *apply* zot *GOP* pli tar.

Mwan mon reste konvenki ki Seselwa i en Nasyon travayan e entelizan Mr Speaker.

Nou lekonomi i reste priyorite sa ladministrasyon. Atraver bann desizyon brav. Lekonomi Sesel ozordi in stabilize. In sirmont pos *COVID*.

Sa ti enn bann misyon dan Manifesto *LDS*. Nou Nasyon i bezwen reste rezilyan. E kontinyelman konn nou priyorite letan ki nou pe depanse.

En lot size ki mon santi mon bezwen tous lo la ozordi, se pri lavi.

Pri lavi i reste en konsern pou tou dirizan dan sa pei. Ler nou koz pri lavi, mon anvi dir ki napa plas pou nou fer politik bonmarse lo sa size.

Nou bezwen kontinyelman travay sanses pou ki nou pep i ganny en meyer dil lo market. Mon profit sa lokazyon pou mwan lans en lapel avek bann diferan Lazans;

Tel koman *Fair Trading Commission*, pou nou rekomans sa konpany pou edik nou dimoun lo sa size mars an de. Pou ganny en meyer pri a en meyer dil.

Ler ou mars an de, ou ava kapab ganny en pri ki abordab. E la mon anvì koz avek bann marsan ouswa bann *wholesalers*. Pou zot servi medya pou promouvwar zot bann prodwir. Sa i ava donn Seselwa plis swa e meyer pri konpetitiv lo *market*.

Lot size ki nou rekonnet i annan en kou ouswa i annan en lenpak lo pri lavi, se telekominikasyon.

Tar lannen pase nou rekonnet ki, nou rekonnet travay ki'n ganny fer pou ki konsonmater i ganny sarze zot *call* par segonn dan plas par minit.

E egalman, bann *package* ki baze lo *speed of internet* olye zis en *package* dapre ou *GB*. Malerezman, nou osi rekonnet ki bann konsonmater pe egzize ki plis lanfaz i ganny mete lo servis e valer zot larzan.

Konsonmater pa kapab pey pou en servis o mwan, me dan o mwan i resevwar zis 15 zour en *channel* oubyen en servis Mr Speaker.

Mon lans en lapel avek bann *service provider*. Pou zot osi *pull up* zot *socks* e donn Sesel en meyer dil.

Lepep Seselwa, apre midi mon anvì salye nou bann zonm ek fanm dan liniform, pou sa travay formidab anver devosyon e rezilta ki zot pe anmennen pou Sesel.

Tel rezilta i ankourazan. Letan ou vwar en transformasyon dan nou servis Lapolis. En transformasyon dan nou Ladefans. En transformasyon dan *Leadership mindset of thinking* nou bann zofisye ki pe pran desizyon Mr Speaker.

Par kont mon pou zwenn avek lezot mon bann koleg, pou mwan osi lans en lapel avek serten zofisye ouswa endividi ki dan lafors. Nou napa plas pou toler koripsyon.

Nou napa plas pou toler bann dimoun ki kontinyelman kas Lalwa lo non lafors. Sa i ede pou ki nou pep i perdi konfyans dan nou lafors. Me par kont nou pou kontinyen donn sipor pou ki i anmenn sa diferans remarkab.

Mon pa pou kapab delivre mon diskour sa ki mon fer mansyon lo nou lazenes. Nou lazenes i reste sa konpa pou lavenir. Malgre i annan bokou komantr negativ ki kontinyelman penn nou bann zenn.

Nou reste konvenki ki nou bann zenn pe egalman kontribye ver devlopman Sesel.

Nou bezwen rod fason pou kontinyen atrap lanmen bann ki'n tonbe e kontinyen kree nouvo loportinite pour zenerasyon lavenir.

Parmi bann Minister dan Gouvernman. I annan en Minister ki pros kot mon leker. E sa se Minister Lafanmir.

Sa departman in anmenn en transformasyon ase remarkab. E pe asire ki vreman in annan bann rezilta konkret ki swa ki'n tous lafanmir. Ki swa in tous dimoun aze. Ouswa dimoun ki pe viv avek dezabilite menm lo nivo sport.

La fodre fer resorti ki nou tim foutbol in fer Sesel fyer. Bann atlet ki atraver zot sport respektiv in kre serten awareness lo diferan size.

Sa, pe anmenn en nouvo *mindset* dan sport. E pe osi motiv lezot. nou bezwen par kont retourn an *grassroot* pou nou idantifye la relev.

Letan nou koz servis piblik. mon toultan konpar lotelri avek nou servis piblik.

En kliyan ler i *check in* dan en lotel. I resevwar en servis avek en sourir. Egalman ler i *check out*, i resevwar en servis avek sa menm sourir.

Mon swe, mon swe se ki nou anmenn sa menm nivo servis i ganny reflekte dan nou servis piblik, pou ki nou vreman met sa servis a en standar akseptab.

Letan nou koz Leta Lanasyon, petet kritik i ava dir ek nou, be ki mannyer Mrs Florentine in ganny touse avek bann devlopman oubyen bann keksoz ki pe arive lao Grand Anse?

Ki mannyer *constituent* Baie Lazare dan V'aldendor i ganny touse avek bann devlopman ki pe arive lo nivo Nasyonal?

Ki mannyer sa *constituent* Anse Royale i war ladiferans yer ek ozordi?

Annefe tou sa ki nou materyalize lo nivo nasyonal i reflekte la baz dan nou kominote.

Depi sa proze bazar Perseverance, Cascade, Anse Aux pins, Anse Etoile, proze *ice plant e cold store*. Lopital Perseverance, proze *Daycare*. Restriktirasyon *STC*, proze re

sirfas koltar, alokasyon lakaz e plizyer lezot.

Sa in bezwen tous en endividi ouswa en fanmir dan nou kominote. Sepandan mon anvi profit sa lokazyon pou osi fer resorti ki nou bezwen rod fason pou diversifye aktivite a la baz kominoter.

Fodre ki nou aprann viv ansanm. Napa plas pou laenn, vanzans, kalonmni, propagann, lager. Annou travay ansanm pour lape e larmoni e progresyon sak distrik.

Mr Speaker, mwan pandan lannen 2021, dapre mon kapasite e mon resours, mon'n fer li mon devwar pou swa rann en vizit enn mon frer ki pe viv avek en dezabilite.

Ki swa dan leo Val Dan D'Or, ki swa Beau Vallon, ki swa Port Glaud, Anse Royale, Menm Glacis e lezot distrik, in permet mwan pou vin pli pre avek ou, avek zot.

In permet mwan pou mwan konpran ou. Pou mwan konpran zot. In permet mwan pou mon koz pou ou e koz pou nou.

Mon reste konvenki ki ansanm nou pou anmenn sa transformasyon ki Sesel i bezwen.

A sa pwen mon anvi remersi tou dimoun ki'n aport sipor anver mon travay. E ki'n

osi atrap mon lanmen dan bann moman difisil. Mersi.

(APPLAUSE)

HON NADDY ZIALOR

Pou terminen mon zwenn avek Prezidan Larepublik, pou terminen mon zwenn avek Prezidan Larepublik pou nou vwar en Sesel ki ini. En Sesel kot nou paviyon i vin sa senbol linite.

Kot nou kapab viv dan diversifikasyon e diferans lopinyon. Sa ki nou pa bezwen, se ki nou pa bezwen ay kanmarad.

En Sesel kot nou batir ozordi pou nou zanfandemen. En Sesel ki nou atrap lanmen nou frer. E gid sa enn ki bezwen direksyon, i fer nou ini koman en Nasyon.

“Sesel ou menm nou sel patri. Annou viv dan larmoni.” Annou demande ki nou kapab fer pou nou pei. Annou demande ki diferans ou avek mwan nou kapab anmenn pou Sesel.

Pou lannen 2022 annou travay pou anmenn transformasyon Sesel. Mersi Mr Speaker.

(APPLAUSE)

MR SPEAKER

Mersi Onorab Zialor. Nou ava
aret la pou lazournen. Nou ava
repran bann repons demen
bomaten 9er. *Adjourn.*

(ADJOURNMENT)